

支偉成著

清代樸學大師別傳

李根源署



上海图书馆藏书



A541 212 0014 9244B

清代樸學大師列傳
下冊





小學家列傳第十二

敘目

聲音訓詁爲治經之塗徑，故凡屬經師，大率先通小學。使備列之，將不遑枚舉。然若鐵橋未谷允倩、菴友等之於說文，葆琛仲容等之於古籀，晉三蘭甫等之於音切，皆竭畢生精力，始能貫通；溯六書之源流，抉七音之秘奧，可稱前無古人，後鮮來者！著爲專篇，俾知其重要如此。至於錢氏答問，雖僅一卷，而內多深思獨到之處；俞氏撰古書疑義舉例，亦與經傳釋詞差堪伯仲。則用互見例，期不沒其苦心耳。

〔黃生〕（改入先導大師列傳）

吳穎芳

嚴可均附弟章福

姚文田

錢大昕

附弟大昭 從子坵 釋
(見吳派經學大師列傳)

江聲

(見吳派經學家列傳)

邵晉涵

(另詳史學大師列傳)

嚴元照

(見浙粵派漢宋兼采經學家列傳)

汪龍

(見皖派經學家列傳)

鈕樹玉

附袁廷禱 徐承慶

陳璩

(見吳派經學家列傳)

薛傳均

附子壽

桂馥

洪亮吉無
所發明應

刪
(太炎)

孔廣森應
兼入
(太炎)

王筠

許槿

張惠言(見皖派經學家列傳)

(洪亮吉)

[孔廣森](見皖派經學家列傳)

朱駿聲

劉熙載

胡秉虔

丁履恆

許翰

鄭珍(見皖派經學家列傳)

莫友芝（另詳校勘目錄學家列傳）

莊述祖（見常州派今文經學家列傳）

俞樾 孫詒讓（并見皖派經學家列傳）

江有誥

龐大壘

（戚學標）

苗夔

田寶臣

戚不足道
（太炎）

吳穎芳

吳穎芳字西林，自號臨江鄉人，浙江仁和人。少端重寡言笑。年十五而孤。一應童試，爲隸所訶，曰：『是求榮而反辱也！』自是遂不復爲制舉業，壹志讀書。嘗怪鄭樵通志務與先儒爲難，於是取六書七音樂略爲之從流而溯其源。其用力，則自樂始。謂：『律管音調，諸儒能致其說而不能習其器，俗工能習其器而不能得其說，遂以爲不可究詰。』乃案典籍，證衆器，成吹豳錄五十卷。次及六書，悉本許叔重。謂：『今本說文取一字爲篆書，而細書爲注；其實許氏原文，上下相連，皆當作大書。又許氏所列文字間有未備，每於說中見之，如某字从某，則所从之字可以補正文。』成說文理董四十卷。因六書而及音韻，謂：『字讀有古音，有正音；經傳反切，皆經先儒審定，不可執後人口音以取證。』成音韻討論四卷。又因說文而考制字之原，分六類，各溯其所從始，而沿其孳生。成文字源流六卷。又取鐘鼎文字有成篇可讀者，箋釋其文義，詳論其前後倒

互之例，讀之皆能文從字順。成金石文釋六卷，兼通內典，所著關於「因明」「唯識」者復數種。晚年名益重。通州雷翠庭，武進莊方耕，視學兩浙，均躬造其廬訂交焉。惜遺稿多散失，僅吹豳錄及理董後編六卷有寫本。而臨江鄉人詩四卷獨傳。邇來競倡道古金石文學與夫佛學之相宗，不知百數十年前，先生夙已開之，轉以詩人目先生也，嗟夫！

嚴可均附弟章福

嚴可均字景文，號鐵樵，浙江烏程人。於學無所不通，尤邃於許氏書。少嘗負糧課校官，甚焉，遂跳入京師，舉宛平籍鄉試。明年試禮部，主者貴人索其卷欲魁之，以詩失諧斥。或勸詣謝，貴人喜，且謂之曰：「君大博通，顧詩失諧何！」卒瞠目對曰：「唐始以律詩取士，今所傳失諧者十九矣！」貴人失色罷。性好遊，足跡幾半天下。疊受姚文田、孫星衍校書之聘。

道光二年，選授建德縣教諭。義烏有高才生某，爲忌者所誣，見棄於其父，事聞之官，大吏欲解之，苦難措辭，爲作甲癸議一篇，大吏覽而韙之，據以定讞，某生遂爲父子如初。在任數年，大修學宮，并葺嚴子陵祠，旋引疾歸，著書不輟。

四十年中，所撰輯等身者，再統經史子集爲四錄堂類稿千二百餘卷。最後復輯全上古三代秦漢三國六朝文七百四十六卷，使與全唐文相接，多至三千餘家，皆一己寫定，不假衆手。清代著述之富，蓋無有過之者。惟卷帙既繁，多不能自刊，往往贈人刊刻，卽署他人之名。署本名已刊者，全古文外，僅說文聲類二卷，說文翼十五卷，唐石經校文十卷，金石題跋四卷，漫稿八卷而已。

先是，爲說文長編，以撰疏義未成，聲類卽長編第四種，翼卽長編第七種。孫星衍勸先作提綱，遂爲校議，半年而竣，合姚文田說共三十卷。長編稿藏遵義鄭氏，亦未梓行。并其他餘稿聞藏南潯劉氏，咸同間，燬於火，良足惜也！

生平自負學識，睥睨羣流。有某進士來見，叩以漢書中事，不盡了了，則曰：『君僅知時文耳，我失言矣！』晚年白鬚朱履，莊然儒者。一日過書肆，遇少年驟詢之曰：『誰也？』熟視久，乃指架上書某冊曰：『將來！』少年以進，則固先生所著，曰：『是卽余矣！』少年駭走。然雖玩世傲物，而遇後進好學之士，輒多方獎掖，有問必答，略無少忤。蓋嚴於嫉俗，而實篤於愛人云。

附 第章福號松樵。廩生。亦精小學，著說文校議，刊入吳興叢書。

姚文田

姚文田字秋農，浙江歸安人。乾隆癸酉，由拔貢生領鄉薦，召試，得內閣中書。嘉慶己未成進士，以一甲一名及第，授職修撰。充國史館，唐文館纂修，會試總裁一，廣東等省正副攷官四，廣東等省學政三。累官祭酒，詹事，內閣學士，戶禮兵諸部侍郎，左都御史，終禮部尚書。予諡文僖。享年七十。

公生平以文章經術結主知，嘗謂：『士或泥於古而戾於今，是迂儒之爲也。』故其久督撫之任，寬州縣之攷，及急農桑，緩刑獄，諸疏，當時多見施行。後善化賀氏復甄采以入經世文編。

數十年來，學人盛談攷據，率尊漢詆宋，公獨持議稱：『三代以上，其道皆本堯舜，得孔孟氏而明。三代以下，其道皆本孔孟，得宋諸儒而傳。五代以後，人道不至陵夷者，宋諸儒之力。至其所著之書，豈得無一誤。惟文字小差，漢唐先儒亦多有之，未足以爲詬病。』然公持己端方，居官清慎，雖本宋儒，而博覽羣書，精於攷覈，則一取漢儒爲法。既與嚴可均同撰說文斟議三十卷，說文攷異三十卷，自著者尙有說文聲系三十卷，古音譜八卷，四聲易知錄四卷，均有裨於小學。其餘易原一卷，廣陵事略七卷，邃雅堂學古錄七卷，詩文集十卷，兼通麻算，有春秋經傳朔閏表二卷，旁及天文五行雜占醫經，著書復若干種。

鈕樹玉附袁廷檣 徐承慶

鈕樹玉字藍田，自號匪石山人，江蘇吳縣人。家洞庭東山。隱於賈，不事科舉之業，而篤志好學，精研文字聲音訓詁。本本元元，獨有心得，與許澆長結異代同心之契。謂『說文一書，懸諸日月而不刊者也！』既著說文解字校錄十五卷，復爲攷異三十卷。一字一句，莫不旁徵博引，備加辨晰。時段注初行，多以己說強傅古義，則撰段氏說文注訂八卷以糾其失。又念後人多所新附，致淆本文，則撰說文新附攷六卷，續攷一卷。如玦卽瑁，緌卽纜，劬卽鈎，塾卽壇，本後代增加；剝卽剝，拋卽抱，贈卽贈，乃傳寫譌溷；打卽打，辦卽辨，勘卽戡，乃吏牘妄造；一一疏通證明之，而其字之不必附不當附，遂瞭然如視諸掌。

兼精音律，偕青浦王蘭泉司寇欲以八音調合宮商，俾復古樂。惜未果。善鑒別宋元本書。晚歲嘗主黃蘗圃士禮居，相與校讎，恆窮日夕弗倦。事母至孝，母老病聾，每作

孺子戲爲娛。母九十四終，君年亦六十六，而哀慕不衰。後八十餘卒。尙有遺文一卷，及匪石日記一卷，潘文勤公收入滂喜齋叢書。

附 袁廷樞字又愷，一字壽楷，江蘇吳縣人。上舍生。家世故望族，資尤饒。築小園於楓江，有水石之勝。得先世所藏五硯，爲樓弃之。聚書萬卷，多宋槧。元刻及傳鈔祕本。以紅蕙一叢植於階，名曰「紅蕙山房」。日坐其中，丹黃不去手。與顧廣圻鈕樹玉輩爲友，而錢竹汀王西泚段懋堂三寓公亦時相過從，作文酒之會。於是四方名流，聞聲景附。事親以孝稱。少孤，母自教之。詩文清峭，無凡俗之累。惟旣嗜書，遂不屑治生產，且揮霍，數急人難。家坐中落。乃奔走江浙間。會觸暑致疾，卒於家，年四十七。於書無不窺，尤精校讎，遂小學。其論說文解字「鞠以秋華」「麀麀牝者」「液盡也」。「布古文實爲豕與豕同」諸條，時見新義。而於滂字下引司馬相如說淮南宋蔡舞滂喻謂七言爲句，係凡將篇逸文，舉李注文選及藝文類聚所引爲證，更確切。

不移。撰著甚多，惜其子稚魯，不能守父書，所有稿本，散失無傳矣。

徐承慶字夢祥，自號謝山，江蘇長州人。舉乾隆丙午順天鄉試。大挑以知縣分發山西，補孟縣，調陽曲，擢平定州，轉解州，署汾州府知府，引疾歸。夙通經義，覃精小學。於許書致力尤深。雖風塵鞅掌，暇輒留心考訂。初，段懋堂欲注涑長之書，先成說文解字讀，密行細字，每冊厚寸許，凡四十餘冊，晚始刪繁就要以作注，又恐老而不及期，未免求速，轉多疎略。君乃作說文段注匡謬若干卷，借正懋堂之失，心平而氣和，辭達而理舉，與鈕匪石段注訂同意而說加詳，不獨叔重之功臣，抑亦段氏之諍友也。

薛傳均附子壽

薛傳均字子韻，江蘇甘泉人。縣學生。初工駢文，以肄業梅花書院，聞山長歛人洪梧講論，自慚聞見淺陋，乃與劉文淇包世榮等五人者相結，爲本原之學，積三載，各聚

書至五七千卷，交相假閱質難，遂博覽羣籍，強記精識，於十三經注疏及資治通鑑用力尤勤，反覆至數十過。注疏本，手自校勘，發明毛鄭賈服之說，其魏晉諸儒不守師法者，概置焉。讀史則重在研究治亂得失，遺文瑣事，亦復強記，而大端必數小學。就許君原書鈎稽貫穿，洞其義而熟其辭。當時精許學者，稱嘉定錢氏，金壇段氏。段氏徒衆尤盛，獨謂其時雜臆說，不若錢氏精審。終推究得失，而右錢氏。潛研堂集中有說文答問一卷，深明通轉假借之義。乃博引經史以證之，成說文答問疏證六卷。又嘗以文選中多古字，條舉件繫，疏通證明，成文選古字通疏義十二卷。草創未竟，文淇諸人爲纂輯繕副，并集錄其十三經本丹黃手勘之語，尙廿餘卷。

家始裕，緣嗜讀書，輒中落，而好讀之志未嘗少挫，每曰：『富貴不敢期，但有暇讀書則願足矣。』既十赴省試報罷，生計日迫，乃就福建學使陳用光聘，見所著書，恨相見之晚。會隨陳按臨汀州，邁執疾歿於試院，年四十有四耳。

附

薛壽字介伯，晚字价伯，江都人。學於同縣梅蘊生植之。兼通詞章小學。二十補諸生。道光戊辰，祁文端歲試拔置第一。會蘊生遊浙，復受經劉文淇，業愈進。所居曰「學詒齋」。羅列書史，日聚友論學，日事點勘。省試輒不利，力學不輟。咸豐初，遭亂喪其貲，以客授自給。嘗從事淮南書局，運使方濬頤，龐際雲并禮異之。最後，應湖北學使張之洞聘，主經心書院講席，以疾歸。卒年六十一。生平專力許書，於音韻尤有深造。好以讀若例說詩經，用韻正轉，又欲分廣韻入聲緝合，蓋爲一部，葉帖以下爲一部，皆未有成書。所著續文選古字通二十卷，讀經劄記二卷，學詒齋文集二卷，外集二卷，詩集二卷。

桂馥

桂馥字冬卉，號未谷，山東曲阜人。先世籍貴溪，明初以從征功世襲尼山衛百戶，因家焉。少嗜學，於書無所不讀，尤究心小學金石，工篆隸。乾隆戊子，用優行貢成均，得

交翁閣學方綱，相與攷訂，所造益精。已而教習期滿，補長山訓導。病後生多空疏，與歷城周永年置借書園，藏書萬卷，并祠漢經師其中，貧士好學者輒貸與之。己酉，舉於鄉。越明歲，成進士。時年五十餘矣。尋授雲南永平縣知縣。永平故爲滇邊邑，臥閣以治，境宇帖然，政簡刑清，遂得以暇自理經生業。

嘗謂：『士不通經，不足致用。訓詁不明，不足以通經。』乃自諸生至通籍，四十年間，日取許氏說文與諸經之義相疏證，成說文義證五十卷。輾轉推通，徵引賅博，前之段若膺，後之王藁友，差相鼎足，均爲許氏功臣。又繪祭酒而下，迨二徐，張有，吾邱衍之屬，作說文統系圖。因題其室曰「十二篆師精舍」。蓋畢生精力咸萃於是。

他著有札璞十卷，攷據亦詳，瞻明確，不讓錢竹汀之養新錄。復有繆篆分韻五卷，晚學集八卷，詩集四卷，兼嫻刻印，世人比諸文三橋，然特末技，未足爲先生重也。年七十卒於官。

王筠

王筠字貫山，一字藁友，山東安邱人。道光元年舉人。博涉經史，尤深說文之學。遊京師三十年，出任山西寧鄉知縣。縣在萬山中，民樸事簡，暇則抱一編不去手。旋權徐溝曲沃，并號繁劇，二縣皆治，亦未嘗廢學。

著有說文釋例二十卷，卽詩書而釋其條例，猶杜元凱之於春秋也，共分五十二目，自指事至列文變例，皆論篆籀；自說解正例至雙聲疊韻，皆論說解；自稅文至末，則皆臆說。存疑數卷，專訂許氏及段玉裁之誤。其例目失之繁多，論說或涉穿鑿，不無遺憾。而其精確之處，如論象形之字當分平看豎看，又有當放低看者，時契文尙未發見，可謂創獲。

復著說文句讀三十卷，雖多采段注，及桂氏義證，然貫以己意，折衷一是，初不依傍於人，說文補正二十卷，句讀補正三十卷，則輔翼兩書者。說文繫傳校錄二十卷，又

所以紹述大徐之學，足以驟斬錢鈕焉。斯爲王氏說文五種。

他著：禹貢正字一卷，毛詩重言一卷，毛詩雙聲疊韻說一卷，夏小正義一卷，弟子職正音一卷，蛾術編二卷，小學三支別，四書說略四卷，教童子法一卷，亦不落講章語錄窠臼。馬首農言一卷，典雅翔核，有六朝地志風度。卒年七十一。光緒中曾由國子監將所著書擇要進呈，奉旨留覽。

許 槿

許槿號叔夏，字珊林，浙江海寧人。生而絕慧，讀書能推究民物，篤志經術，精治六書，尤喜研究律學。嘉慶二十四年舉人。道光十三年成進士。選直隸知縣，未赴。薦修國子監金石志，書成，改知州，得山東平度。始蒞任，決獄捕盜類老吏。河漫州田，爲開濬支渠，賦且大入。牧平度八年，鄰封有疑獄，大府輒檄委往勘，無不結正。或平反者，素留心檢驗屍傷損，訂洗冤錄詳義，俾後之刑官奉爲師法云。歷官淮安鎮江徐州知府，并著

捍災賑荒諸績。升江蘇糧儲道。方改海運，散遣內河水手，部勒周密，無譁者。

顧雖吏事精敏，而日不廢學。洞識古篆源流。攻說文解字，以爲其一家之學也。寢饋久，羅致古今撰述，獨推鈕樹玉王筠爲絕詣。纂說文疏箋巨篇高數尺，未寫定，寇亂散佚。別纂識字略，依韻戢音，蓋非初志。攷定金石文字，手自鈎撫。古均閣寶刻錄行世，亦不及十一。工篆隸，書勢茂密，與弟楣齊名。兼通醫術，博覽羣書，往往有所刊誤校正。咸豐間，兵事大起，流寓轉徙，書策淪失，所著不悉傳，承學之士惜焉。卒年七十六。

朱駿聲

朱駿聲字豐芑，號允倩，江蘇吳縣人。年十三，受許氏說文，一讀卽通曉，時有神童之譽。十五冠羣試補府學生。適錢竹汀主紫陽講席，亦十五歲入泮，因重遊泮宮，一見奇其才，遂受業門下，益專力古學。嘉慶戊寅，舉於鄉。屢躋春官，鬱鬱不得志。以知名早，蘇撫張師誠延入幕，繼復就館浙江揚州，登主江陰吳江蕭山各書院。會試數留京，又

因事出居庸大同。如是奔走風塵，窮愁落寞者積廿餘年，未嘗一日廢學。道光六年始用大挑詮點縣訓導。教諸生多暇，更肆力探討，著述日富。弟子恆數十人持筆札爲錄所著書。

研究許書，功深且久。嘗謂：『自二徐以後至本朝段錢嚴桂推衍已極精密，而六書中轉注段借二義究未有確詰。因獨創義例，以爲轉注者，卽一字而推廣其義，非合數字而雷同；其訓通其所可通者，爲轉注；通其所不可通者，爲假借。假借不異聲而役異形之字，可以悟古人之音語；轉注不異字而有無形之字，可以省後世之俗書。』乃成說文通訓定聲三十二卷。又取百六韻而權衡之，作古今韻，東韻，各二卷。循爾雅之條例，貫許氏之說解，作說雅四卷。會廣西學政孫鏘鳴奏請許海內文學士獻所著書，咸豐元年，遂繕定由禮部進呈。文宗披覽，嘉其賅洽，賞國子監博士銜。尋升揚州府學教授，未之官。居黟八年卒，年七十一。

餘所著初刊者，曰臨嘯閣羣書，爲儀禮經注一卷，一隅二卷，夏小正補傳二卷，春秋左傳識小錄二卷，小爾正約注一卷，通訓定聲補遺一卷，離騷補注一卷。其他續刊及刊入別家叢書者，爲春秋三家異文覈一卷，春秋亂蛾考一卷，小學識餘四卷，六書假借經徵四卷，歲星表一卷，經史答問二十六卷。存稿校定未刊者，爲六十四卦經解八卷，尚書古注便讀四卷，春秋平議三卷，秦漢郡國考四卷，天算瑣記四卷。尙有未經校定者，爲學易札記等四十二種，又詩傳箋等七種，存稿已佚。

劉熙載

劉熙載字融齋，江蘇興化人。幼時，父嘗曰：『此子學問當以悟入。』晚年遂自號寤崖。少孤貧，篤行力學。爲人內清介而外和易，讀書嗜指識微，約言孱守中道。光甲辰進士，改庶吉士，授編修。咸豐癸丑，召對稱旨，奉命直上書房，并賜「性靜情逸」四大字。丙辰，京察一等，記名以道府用。不樂爲吏，請假客山東，授徒自給。久之，湖北巡撫胡

林翼延主江漢書院，疏薦其貞介絕俗，學冠時人。同治甲子，徵爲國子監司業，督學廣東，歷遷左春坊，左中允，行部所至，蕭然如寒素。暨乞病歸，襤被篋書而已。卒年六十九。

先生治經，無漢宋門戶。如論格物，兼取鄭義。論毛詩古韻，不廢吳棫叶音。嘗讀爾雅釋詁，至卬、吾、台、予，以爲四字能攝一切之音，以推開齊合撮，靡不若矢之貫的。復論「六書中較難知者，莫如諧聲。疊韻雙聲，皆諧聲也。許君時雖未有雙聲疊韻之名，然河可疊韻也，江工雙聲也。孫炎以下切音下一字爲韻，取疊韻；上一字爲母，取雙聲；非許君實開之乎？徐注說文字音取孫愐唐韻音切爲定，要之許氏之聲本可爲切，由古人制字，其中本具字母也。苟以許聲加孫韻，皆可爲切；而一切雙聲之字不可以類求乎？」因著四音定切四卷，說文雙聲二卷，疊韻二卷，且於音韻小學確抒卓見。外而潔身修行，與宋儒相爲表裏。日有心得，隨筆紀載，成持志塾言二卷。又探討古今人詩賦古文詞曲書法經義，深造淵奧，成藝槩六卷。其自著詩文，則總萃爲昨非集四卷，并旁

通曉人術，作天元正負歌，明加減乘除相消開方諸法。子彛程，遂以算學有聲於時。

胡秉虔

胡秉虔字伯敬，號春喬，安徽績溪人。嘉慶乙未進士。由刑部主事改官甘肅雲台縣知縣，升丹噶爾同知。卒於官。

君治經守漢儒家法，尤長於聲音訓詁之學。所著說文管見三卷：上卷爲說文引經佚文佚句考，古音分部次第一字兩句重文篆隸之變諸條。中卷專就各字疏通證明，并及假借義例。下卷爲辨許氏序徐氏繫傳新增十九字等。率有根柢，不務穿鑿。古韻論三卷，上自梁沈約韻譜，唐陸法言切韻，宋鄭樵七音略，以逮近世陳季立、顧亭林、江戴段諸家，莫不窮源竟委，存其是而正其非。大都取之東原者爲多。卦本圖攷一卷，以朱子謂「縱橫曲直，反覆相生，無所不可」，未免啓後世憑臆說經之漸。乃詳考諸儒之說，案之於經，是者從之，用漢人此本某卦此卦本某例，故曰「卦本」。尙書敍錄

一卷，則取書序百篇一一加以疏解焉。——凡四種。潘文勤嘗刊入滂喜齋叢書。別撰周易小識八卷，尙書小識六卷，論語小識八卷，毛詩序錄四卷，漢西京博士攷二卷，月令小識，四書釋名，小學卮言，經義同斯錄，槐南麗澤編，惜分齋叢錄，對床夜話詩集等。又若干卷。止博士攷與官張掖時采前明殉節諸臣事蹟，輯甘州成仁錄四卷，尙有傳本。

丁履恆

丁履恆字道久，別字若士，江蘇武進人。弱冠補諸生。嘉慶丁酉選拔貢，朝考報罷。戊辰應詔津召試入二等，充文穎館臚官。期滿，銓敍贛榆縣學教諭。尋保薦知縣，選授山東肥城。三載，以病足勉歸，未行，適母憂計至，驚悼拊踊，病益亟，末幾竟卒於聖室，年六十有三。

先生生性磊落慷慨，而所學又足助其識，堅其氣。漢唐兩宋儒先之書，無不旁搜

切討；然襲積武斷之說，性天愚誣之論，蓋未嘗一關其口。當時聞人，如錢塘盧文紹、段玉裁、莊述祖、張惠言，咸與處，師友間，學術文章相淬厲。居恆讀書史，至古先哲人，搢拄艱虞，遂以轉移禍福者，必反覆深求其道，或撫卷瞑目，至終日，故能通經術於治事，與苟爲誇耀淹洽矜詡章句之俗儒異矣。其治肥城，因本乎詩教，守毛公「烹魚煩則碎，治民煩則擾」之訓，聽受無留事。又時時存問耆宿，詢疾苦，民安其政，年穀順成。是以去任之日，老幼扶携泣送數十里。所著說文形聲類篇四卷，精核不在朱允倩之下，已刻入楊氏大亭山館叢書。尙有春秋公羊例、左氏通義、毛詩名物志，未刊。其餘詩文詞雜著札記各若干卷，皆有可采，尙非其意之所屬云。

許瀚

許瀚字印林，山東日照人。幼博綜經史及金石文字。年逾冠，入縣學。道光乙酉，道州何文安公視學山左，奇其才，拔貢成均。次年入都，卽寓何邸，得與公子紹基友，互相

考訂治小學，尤深於聲音訓詁之原。至勘定宋元明舊籍，精審復不減顧澗、黃、葛、圃、輦下知名士若張穆、苗夔、俞燾，皆昕夕過從，以學問相切劘。龔自珍素少許可，獨推爲北方學者第一。其見重於時如此。會校錄重修字典，議敘得州同銜。乙未，北闈鄉試中式；五上春官不利。應聘主講漁山書院，修輯濟甯州志。復選授嶧縣教諭。旋丁憂去官。丙午，河帥潘芸閣侍郎延校史籍，因識丁晏魯一同許榘，文字往還，契合無間。而商城楊鐸寶卿交最摯。己酉，爲山西楊氏校刊桂氏說文義證。時患偏痺，養疴里門，尙力疾從事。咸豐庚辛之際，赭寇犯東境，越日照，所藏書籍碑版悉付劫灰。幸先期走避，獲免於難。未幾遂卒。

所著惟攀古小盧文數卷梓行。遺著一卷，刻入滂喜齋叢書。韓詩外傳勘誤則僅存遺稿。其致楊寶卿書謂：「古人造字，實由於音。近代若王氏父子，及金壇段氏，略悟此義，惟未有專成一書者。欲治說文，宜從事聲音之學。」又謂：「說文中所列重文，治

之者咸不明其例。倘將說文所有重文勒爲一編，亦發前人未發之蘊。』此亦可見其小學之一斑矣。

江有誥

江有誥字晉三，號古愚，安徽歙縣人。二十二歲補博士弟子，不治舉業，壹志古學，戲門著述，寒暑無間。慨周秦後古音日舛，獲顧亭林音學五書及江慎修古韻標準，冥心推究，至忘寢食。謂江書能補顧所未及，而分部尙有罅漏。因於江氏十三部析幽侯爲二，支脂爲三；又於脂部中析出祭部，又析真文爲二。嗣得段若膺六書音韻表，所論多合，益自信。分古韻爲廿部。最後見曲阜孔氏詩聲類，析東冬爲二，遂改文二部爲中統，爲廿一部。書成，寄示段，段大稱許，曰：『余與顧孔一於攷古，江戴則兼以審音，而晉三於二者尤深造自得；又精呼等字母之學，不惟古音大明，亦且使今韻分二百六部者得剖析之故。』其推服如此。

所著已刻者有：詩經韻讀四卷，羣經韻讀一卷，楚辭韻讀一卷，先秦韻讀二卷，漢魏韻讀一卷，唐韻四聲正一卷，諧聲表一卷，入聲表一卷。以入聲表尤精，足正亭林之失，而補其未備。未刊者，尚有：二十一部韻譜若干卷，本段氏十七部譜例，就未分析者，更分析之，得一百二十八部。於是韻學大具。

晚益深六書，著說文六書錄，說文分韻譜，說文質疑，說文更定部分，說文繫傳訂譌各若干卷。復著經典正字，隸書糾繆，以祛俗學之誤。不戒於火，版稿悉付煨燼，而目已瞽，乃口授其子錫善重錄，并擬踵成例爲補輯若干篇。

龐大堃

龐大堃字子方，亦字厚甫，江蘇常熟人。以舉人官終國子監學錄，用子侍郎鍾璐貴，贈如其官。自祖父來，以治經世其家，至子方益能博通。既屢試不第，遂更致力於六籍，羣經皆有論議。晚年乃獨專心小學，於音韻之說尤深。

其言音韻曰：『不明等韻不可以讀書，不明古韻不可以讀古書。自崑山顧氏以經典用韻合之說文諧聲分鄭庠六部爲十，其義始明。婺源江氏演之而加密。江以傳休甯戴氏，戴以傳金壇段氏，授受相承，源流一貫。若曲阜孔氏，若高郵王氏，皆有所發明。而諸家分部互有出入者，以入聲配隸無準耳。入聲有正紐，有反紐。今音多從正紐，古音多從反紐。戴氏聲類表作於段氏音均表之後，實足糾段氏之失，集諸家之大成。惟今音古音相間錯出，猝難了晰，猶爲未成之書。』故用王氏說，別出緝盍爲十八部，陽類陰類各九部。陽奇陰耦，兩兩相配。一從陸法言爲定爲正紐，一從顧江戴王氏所定爲反紐。其轉音之法，復有五例焉。又謂：『欲明古音，必先究唐韻，乃可定其音切。』因取大徐所引孫涵音切，參以小徐篆韻譜，按部排纂，爲唐韻輯略五卷。備攷一卷。又以說文正字以聲相統，而別出其流變之字爲形聲輯略一卷。備攷一卷。又以說文諧聲，經典用韻，合之唐韻，以紐相承，而表出其分收之字，別收之字，爲古音輯略三卷。備

攷一卷。其論等韻，則謂：『字母三十六爲天地自然之音，不可增減移易。』取切韻指掌圖四聲等字切韻指南參互攷訂，合門法爲八分十六攝爲六十一圖。以唐韻廣韻集韻五音集韻及玉篇篇海之字按紐排纂，附注切音。爲總圖以提其綱，爲略例以舉其凡，爲備攷以覈其實；又推之玉篇廣韻皇極經世之論音，以暢其說；又推之天竺西番藏經十二家之釋字，以盡其變；爲等韻輯略三卷。凡所著作，學說如此。惜其書多遺佚，世或不能盡見云。

苗夔

苗夔字先麓，直隸肅甯人。不好制舉文，嗜六書形聲之學。治許氏說文，精研力索，若有夙悟。後又得顧亭林音學五書，慕之彌篤，曰：『吾守此終身矣！』年二十餘，卽纂毛詩韻訂，繼又纂廣籀一書。授徒窮鄉，教帖括不中程，學子稍稍引去，弗顧也。縣令王君聞而敬異，聘主翼經書院。道光辛卯，舉優貢生。高郵王氏父子觀其著述，折節下交，

與暢論音學源流，由是譽望日隆。初佐汪編修振基，衡文山右，繼入江蘇學使祁文端公幕，所至甄拔名宿，復以暇日編摩撰述，從事於其所謂聲韻之學。祁還京，乃釀金刻所著說文聲訂二卷，說文聲讀表七卷，毛詩韻訂十卷，建首字讀一卷。大旨以爲叔重遺書多爲後人妄刪或附益者，乃訂正說文聲類八百餘事。顧氏音學所立古音表十部，宏綱已具，然猶病其太密；而歌麻既雜西音，不應別立一部。於是併庚清及蒸登於東冬部，併歌戈於支脂部，定以七部，囊括羣經之韻。書出，識者歎其精審。後數年，襄校山東，未畢役先歸。至是亦齒衰而倦游矣。居京師，自祁公外，恆與何紹基、張穆、陳慶鏞諸人游，并爲曾文正公所推服。時時徒步過從，與辨論前世音學，暨江戴、段孔諸家部分之多寡，意指之得失，褒譏亭決，窮日夜不倦。卒年七十五。餘書尙有說文聲讀攷，集韻。經存韻補正，經韻鈎沈，各若干卷，未刊。

田寶臣

田寶臣字少泉，江蘇泰州人。家貧篤學，師事魏茂林，研精訓詁，不斷斷於一言半字。撰有小學駢支八卷，共一百五十三條。其自序：以說文爲主，以爾雅方言毛氏鄭氏爲根柢，而波瀾於孔賈郭陸，旁及荀子莊子淮南素問大戴記史記三家注班書顏注，范書李注，釋名水經注廣雅玉篇廣韻文選衆經音義，下逮二徐集韻類篇，以及乾嘉以來名家之說。欲溯其原始，故討論之詞多；欲暢其支流，故參互之說盡。云「駢支」者，事繫於駢雅，冠以「小學」者，因四庫全書以駢雅隸小學類也。初寫一本，意尙未已；欲取呂氏春秋高注管子房注列子張殷兩注，研求而更討之。咸豐三年，粵寇將破郡城，勢岌岌不可保。先生於風聲鶴唳，盜賊縱橫間，睠睠於是書，冀鴻碩君子爲之存焉。謝世後，藁藏於家，力不能刊，惟魏茂林駢雅訓纂補遺中摘其十之一耳。直至民國九年孟夏，今蘇省長韓國鈞刊入海陵叢刻中，而先生畢生精力所粹者，終賴以表白於世云。

清代樸學大師列傳

史學大師列傳第十三

敘目

明清之交，梨洲季野以一代文獻自任，實爲史學嫡派。及清廷開明史館，雖屢徵不就，然皆間接參與討論體例，別擇事實，蓋藉以寄故國之思也。故明史比諸遼金元，較爲完善。爾後有謝山二雲，私淑師傳，紹述家學，亦皆斐然可觀。又若會稽章氏，著文史通義，發明研究史法，與唐劉知幾氏儷堪方駕，則固史家之特色者也。至於宛斯紀事，復初表譜，體例獨創，識力尤高，謂非豪傑之士哉！

黃宗羲（見先導大師列傳）

萬斯同 附兄斯選 斯大 斯備 從子言 經

邵晉涵史
學過

〔餘姚邵氏祖孫傳〕 廷棨 晉涵

章學誠

於章學誠
之空論應
入此
(太炎)

馬 驥附王爾膏

顧棟高

萬斯同 附兄斯選 斯大 斯備 從子言 經

萬斯同字季野，學者稱石園先生。浙江鄞縣人。戶部泰第八子。生而異敏，讀書過目不忘。八歲在客座中背誦揚子法言，終篇不失一字。顧跡弛不馴，戶部閉之空室中。先生竊視架上有明史料數十冊，讀之甚喜，數日而盡。又見經學諸書，皆盡之。既出，時隨諸兄後聽其議論。會家課，先生欲豫焉，諸兄笑曰：『汝何知？』先生曰：『觀諸兄所爲，易與耳！』因雜出經義目試作之，千言立就。伯兄大驚，持之泣，以告戶部曰：『幾失吾弟！』戶部亦愕然曰：『幾失我子！』遂從黃梨洲遊，爲高第弟子，與聞蕺山劉氏之學。以慎獨爲主，以聖賢爲必可及。時甬江有五經會，先生年最少，遇疑義輒片言析之。嘗守先儒戒，以爲無益之書不必觀，無益之文不必作。遂專意古學，博通諸史，尤熟於明代掌故。康熙戊午，詔徵博學鴻詞，巡道許鴻勳以先生薦，力辭免。明年，修明史，相國徐元文延至京師。時史局中徵士，例食七品俸，稱纂修官。先生請以布衣參史局，不

署銜，不支俸。許之。諸纂修以稿至，主者皆送先生覆審，覽畢，謂侍者曰：『取某書某卷某葉，有某事當補入，某事當參校。』如言取至，無爽者。徐公罷，繼之者，張玉書、陳廷敬、王鴻緒，皆延請有加禮。明史稿五百卷，先生手定也。

先生病唐以後史官設局分修之失，嘗曰：『昔遷固才既傑出，又承父學，故事信而言文。其後專家之學，才雖不逮，猶未至如官修者之雜亂也。官修之史，倉猝成於衆人，不暇擇其材之宜與事之習，是猶招市人而與謀室中之事也。吾辭史局而就總裁所者，惟恐衆人分操割裂，使一代治亂賢姦之跡味晦而不明耳。』又嘗語方苞曰：『史之難爲久矣，非論其世知其人，具見其表裏，則吾以爲信而人受其枉者多矣。吾少館某氏，其家有列朝寶錄，吾默識暗誦，未敢有一言一事之遺也。長遊四方，從故家求遺書，旁及郡志邑乘，雜家志傳之文，莫不網羅參互，而要以寶錄爲指歸。蓋寶錄者，直載其事與言而無所增飾者也。因其世以考其事，覈其言而平心察之，則其人之本末，

十得八九矣。然言之發，或有所由；事之端，或有所起；而其流，或有所激，則非他書不能具也。凡實錄之難詳者，我以他書證之；他書之誣且濫者，我以所得於實錄者裁之。子盍就我所述，約以義法，而經緯其文，他日書成曰：『此四明萬氏所草創也。』吾死不恨矣！』蓋先生以遺民自居，而卽任故國之史事，以報故國。其至京師，特以羣書有不能自致者，必資有力者以成之。其後，乾隆中大學士張廷玉等奉詔刊定明史，皆以史稿爲本，而加增損焉。先生之志於是爲不負矣。

先生初至京師也，時議意其專長在史。及徐乾學居憂，請先生纂讀禮通考，自國卹及家禮，十四經之箋疏，廿一史之志傳，漢唐宋諸儒之文集說部無或遺者。又以其餘爲喪禮辨疑四卷，廟制折衷二卷。乃知先生故深於經。徐因請編成五禮之書二百餘卷。當是時，京師耆彥雲集，各以所長自見。而先生最閎淡，自王公以下，爭相從問古儀法，月再三會，聽講者嘗數十人，錄所聞共講肄，莫不呼曰：『萬先生！』而先生與人

往還自署祇曰『布衣萬斯同』未嘗有他稱也。故督師之姻人方居要津，乞史館於督師少寬假，先生屢數其罪以告之。有運餉官以棄運走道死，其孫以賂乞入死事列，先生斥之。父友馮侍郎躋仲諸子沒入勳衛家，先生贖而歸之。以康熙壬午卒於王尙書史局中，年六十。門人私謚曰「貞文」。

先生於前史體例，貫穿精熟，指陳得失，洞中肯綮。劉知幾鄭樵不能及也。馬班史皆有表，而後漢三國以下無之。劉知幾謂無關得失，先生則曰：『史之有表，所以通紀傳之窮。有其人已入紀傳而表之者，有未入而牽連以表之者，表立而後紀傳之文可省。讀史不讀表，非深於史者也。』所著補歷代史表六十卷，又紀元彙考四卷，安季忠義錄十六卷，南宋六陵遺事一卷，庚申君遺事一卷，河源考二卷，河渠考十二卷，儒林宗派八卷，石經考二卷，石經文考二卷，羣書疑辨十二卷，書學彙編二十二卷，周正彙考八卷，歷代宰輔彙考八卷，石園詩文集二十卷，而明史稿及讀禮通考別爲書。

(附) 兄斯選字某，梅庵先生第五子，於諸昆季中，最能紹蕺山之學。爲梨洲高弟。嘗謂：學者須驗之躬行，方爲實學。於是切實體認，知意爲心之存主，非心之所發。理卽在氣中，非理先氣後也。當時以康齋比之。年六十卒。梨洲哭之慟曰：『甬上從遊，可振蕺山絕學者，惟斯選一人耳。』

兄斯大字充宗，梅庵先生第六子。遭亂赤貧，惟藉授徒自給。師事黃梨洲，蓋父執也。歲丁未，偕同學十數子執贄其門，因爲講經之會於甬上。一時勝友如雲，質疑辨難，號稱極盛，而於其間肄業尤勤。以一再試有司不合，抽身隱退，日沈酣顛倒六經之中。專長於春秋三禮。其讀書大旨，以爲非通諸經不能通一經，非以經釋經則無由悟傳之失。治春秋有「專傳」「論世」「屬辭比事」「原情定罪」諸義例。——「專傳」者，經無事實，待傳而明。公穀左氏互有異同，左氏親承所見，事多詳覈，當以爲主。「論世」者，春秋二百四十二年，世皆無道，孔子但據事直書，是非自

別，初未嘗以後起之匹夫，責以往之天子。「屬辭比事」者，春秋一事必有本末，異事亦有同形；如「衛人殺州吁」、「衛人立晉」，此屬辭而見爲一人也。立晉則書衛人，主王子朝則書尹氏，此比事而見其有公私也。「原情定罪」者，如魯桓公見殺于齊時，莊公尙幼，法無可施，故書「薨」，書「喪」，至書葬，一似賊之已討者；及莊公既長，則書「如齊」，書「如莒」，莊于是不得辭其忘讎之責矣。——初纂諸家說，得二百四十二卷；癸丑，燬於火；辛酉，海昌陳令延主其家，以經義相質，尙力能著書，較前更倍；癸亥七月，至「昭公」而疾作，臨歿時，猶惓惓「季武子立後」一事，凡苦心壹志如此。惜傳者止讀春秋隨筆十卷，則編纂時間有獨得，另爲劄記，亦迄於「昭」；多以禮釋者，用其所長，猶康成之用禮注易箋詩，視宋人憑理妄說，有霄壤之判焉。若其治三禮於儀禮，則有商榷三卷；於禮記，則有偶箋三卷；於周官，則有辨非二卷；類能取甲乙之證據，剖前人之聚訟，而總義則有學禮質疑二卷。梨洲

稱其宗法八篇爲冠古絕今，必傳之作。他如論郊曰：「郊惟日至一禮，社穀不名郊。」論社曰：「大社在北郊，主月王社在國中。」論禘曰：「禘與祫一事，魯禘不追所自出。」論祖宗曰：「東周主文而宗武。」論泰壇明堂曰：「儀禮方明壇卽泰壇，卽圓丘，其宮方三百步，上有明堂，日至郊天，卽于方明壇。謂之方明，郊天主日也。季秋大享于明堂，明堂圓丘同在三百步內，非有兩地。」論喪服曰：「承重之喪，皆從夫服。」又曰：「庶子爲其生母之黨，服與適子爲其母黨服同。」悉皆發先儒所未發。爲人剛毅，見有不可者，輒形於色，而嗜義若飢渴然。張蒼水死國難，棄骨荒郊，爲醜金葬之南屏。居家兄弟怡怡，修輯譜牒成十卷，條理井如。雜文存丁災甲陽草各一卷，亦以說經爲多。足微病，因自號「跛翁」云。卒年五十一。

兄斯備字公擇，又字允誠，悔庵先生第七子。弱冠，耽意執筆，遂善隸草。悔庵書法斐亶，斯備偶然臨寫，便欲亂真；見者言履安遺影於是乎在。葢山死難，其遺書，君爲

藏之。全祖望稱爲「子劉子之功臣」云。

從子言字貞一，號管村。少涉獵記傳，隨諸父在講社中最精博，以古文名當世。由副榜貢生與修明史，獨成崇禎長編。故明仕宦子弟，多以賄入京，求爲先人末減，悉峻拒之。嘗一知五河縣，坐事當論死，值陝中開贖罪例，子承勛哀金五千贖之，不足同邑陳坊復爲之告於同人，卒贖以歸。歿於家。文筆獨出冠時，梨洲數稱之，以爲能撫震川之古淡，而加以剡源之色澤。季野亦云：「使吾有同筆，班馬不難到矣。」所著曰管村文集。

斯大子經字授一，號九沙。自幼濡染家學，受經說數百萬言於父及諸父，受明史紀傳三百卷與夫列代史表數十種於季父及其從兄言，而又講性理於應嗣寅，考地理箋釋於閻百詩，求漢隸源流於鄭谷口，梨洲至鄞，立證人書院，復師之，論蕞山之學。其學益浩博無涯涘。以康熙癸未成進士，選庶吉士，散館，授編修。充字典纂修

館。授編修。充字典纂修官。時方望溪適以南山集案牽連下詔獄，莫敢謀保釋者，君獨奮然送狀西曹，遂出之。舉朝高其義。典試山西，太原孫嘉淦從問學，一見卽推挹，卒成魁儒。又嘗識杭世駿，全祖望於髫年，以爲鄭漁仲之流。世稱其有人倫藻鑑。出督貴州學政，還朝，爲忌者所中，有通州修城之役。旣歸家，資悉罄，遂賣所作隸書，得錢給朝夕。乃增補充宗禮記集解凡數萬言；以春秋定哀二公未畢，續纂數萬言。又訂從兄言尙書說，輯成一編，以成萬氏經學。又重修季野列代紀年，暨貞一明史舉要，以成萬氏史學。乾隆初，舉博學鴻詞。已而，李侍郎紱再薦入三禮館，并以老辭。著述傳者，有分隸偶存二卷，收入四庫。卒年八十三。

餘姚邵氏祖孫傳 延案 晉涵

邵廷案字允斯，又字念魯，浙江餘姚人。曾可之孫。家世傳陽明學。九歲讀史，卽操槩爲徐達常遇春傳，有法度。曾可一日偶爲言宋儒語錄，聞之輒興曰：「其人安往耶？」

願得而事之！曾可察其志高，乃爲具衣冠送於姚江書院，使就學韓先生孔當。初讀傳習錄，無所得。既讀劉宗周人譜，曰：『吾知王氏學所始事矣。』年二十，補諸生，願恥爲制舉文，入則讀古書，出則古衣冠行市中，人傳以爲笑。久之，居祖及父憂，而書院諸老宿相繼歿，先生獨抱遺書，守其師說而不變。蠡縣李塉貽書論明儒異同，兼詢所學。答曰：『致良知者，主誠意。陽明而後，願學蕺山。』孝感熊賜履以關王學爲己任，先生曰：『是不足辨，願在力行耳。』嘗從同邑黃梨洲先生問乾鑿度算法，會稽董瑒受陣圖，保定王正中學西麻。將軍施琅征臺灣過杭，遭先生，相與縱談沿海要害，琅奇之，請與俱北，謝不行。間遊鎮江，與梁化鳳部將講坐，作擊刺之法，一日而盡。之淮安，從防河卒，問河淮離合狀。北入河南，訪黃流故道。西走窺潼關，喟然曰：『土則古所耕也，而水利亡矣，柰何！』歲辛巳，之黃岡，韋鍾藻建姚江書院於縣南，博訪有紹文成之學者，遂以禮幣聘先生主講。戊子，如京師，鄞萬經等欲招之，與一統志館，以老辭。南歸，未幾卒。

年六十四。

先生講肄宗陽明，而學問則貫串羣史。尤攻勝國懷宗末福唐魯桂諸王事迹，本末了了，作東南紀事、西南紀事二書。值禁網嚴，未獲傳布。近邵武徐氏始獲其遺稿，刻入叢書中。既倦游無所遇，復念師友淵源，懼及身而即斬，於是推崇陽明，扶世翼教，作王子傳、蕺山功主慎獨忠清節義，作劉子傳、王學盛行務使合乎準則，作王門弟子傳、金鉉祁彪佳張兆鰲黃宗羲等能確守師說，作劉門弟子傳。更作宋明遺民所知傳、姚江書院傳，及倪文正施忠愍諸傳，凡數十篇。門弟子爲編刊其思復堂文集二十卷。所持論如復封建，行井田，改學校，多言人所不敢言。有謂：『宋以後書一切束且勿觀，從事於孔顏曾孟之教。』唐確慎且援此相詆，論者淺之。好學晚而彌篤，常寄居蕭寺，草創傳記，及忠魂幽魄蔽泉壤而姓名不彰者，爲中夜悲哀，涕淚隨筆下焉。

邵晉涵字與桐，一字二雲。爲念魯從孫。先生以禹貢三江，其南江從餘姚入海，遂自號南江。世傳道學，性質貞亮。乾隆三十年舉於鄉。典試者爲錢大昕，得先生文，謂非老宿不辨。及來謁，年裁逾冠，叩其學，淵博無涯涘。三十六年，會試第一，成進士。廷試二甲，歸部銓選。三十八年，詔開四庫館，大學士劉統勳首薦之，特旨改庶吉士，充纂修官。踰年，授編修。五十六年，遷中允，擢侍講，轉侍讀，歷左庶子，侍讀學士，充日講起居注官，直文淵閣。歷充成安宮總裁，萬壽盛典，八旗通志，三史館，三通館，纂修官。又爲國史館提調，兼掌進擬文字。典試廣西者一，教習庶吉士者二。分校石經，先生職春秋三傳，亦多校正。

先生至性過人，執親喪，哀毀骨立。與人交，始終如一，未嘗以博雅自矜；惟以非義干者，不待語竟，卽拂衣起，人以是嚴憚之。少多病，左目微眚，清羸如不勝衣，而獨善讀書，數行俱下，寒暑舟車未嘗頃刻輟業。於四庫七略無不研究，而尤能推極本原，實事

求是。在館時，總裁問以某事，答曰：『在某冊第幾葉中，』不失一字，咸訝以爲神。先生與戴東原同在四庫館，士大夫言經學推戴氏，言史學推先生。

先生以浙東三先生爲宗，每上下古今，凡政治得失，人才消長，君子小人之元黃水火，皆能抉其弊之所由始，與害之所由終。尤熟於前明掌故，於朋黨奄禍及唐魯二王起兵始末，口講指畫，往往出正史之外。每語一事，輒亟稱三先生不置。蓋其學之所本，又心儀其人，而欲取以爲法者也。會稽章學誠恆與先生言：『史學不求家法，則貪奇務瑣；但知日務增華，不過千年，特恐大地不足容間架矣。』聞之撫膺歎絕，欲以斯意刊定前史，自成一家。時議前史榛蕪，莫甚於元修三史，而措功宋史尤難。遂獨慨然自任。以宋史自南渡後，益爲荒謬，原東都尙賴有王稱事略也。乃先輯南都事略，將使前後條貫粗具，然後別加裁斷，更爲趙宋一代全書。惜草創未克竟業。在四庫館時，見永樂大典戴有薛居正五代史，因薈萃編次，第其前後，再取冊府元龜，太平御覽，並通

鑑長編諸書，以補治所闕，始末飭備，部帙如舊。書成，奏上，高宗覽而稱善，令依舊唐書例，列爲二十四史，頒行天下學宮，使數百年幽淪之書隱而更揚焉。畢制府秋帆嘗以二十年之久，集賓客續宋元通鑑，大率就徐氏本稍爲損益，殊不愜心，爰屬先生訂正。先生出緒餘，間爲之覆審，卽大改觀。畢公旋薨，嗣其家所刻，仍係初稿，非君定本，致可慨也！

先生於學無所不窺，浩廣初未易裁，頗用累志。及在安徽，依朱竹君督學幕，竹君謂之曰：『經訓之義荒久矣，雅疏尤蕪陋不治，以君子與博，宜與郭景純氏先後發明，庶幾嘉惠來學。』於是殫思十年，成爾雅正義二十卷，取景純爲宗，而兼采舍人樊光李巡孫炎諸家之注；有未詳者，撫他書補之；凡三四易稿，始定。中如以九野之梁山，卽今衡山，釋草蘩菟葵，卽今款冬之類；時多服其卓識。

他所著，尙有韓詩內傳考，穀梁正義，孟子述義，輜軒日記，方輿金石編目。而傳者

獨爾雅正義，皇朝謚迹錄，南江詩文集，數種。五代史考異二卷，僅存殘本，故世但推先生精於考辨，訓詁箋疏蟲魚而已，不知實首倡西漢今文經學，且爲一代獨出之史才也。嗟夫！嘉慶元年卒，年五十四。

章學誠附方愷

章學誠字實齋，浙江會稽人。稟賦孱弱，日僅誦百餘言，猶亟亟不中程。然性耽典籍，雅好乙部之學。塾課餘暇，曾私取左國諸書，分爲紀、表、志、傳，作東周書幾百卷，轉辭助語，固尙未盡得當也。比長，從山陽劉文蔚量鉅游，習聞蕺山南雷之說，遂駸駸日進。乾隆庚辰，始應順天鄉試，不售，肄業成均，乃問學於大興朱竹君先生，卽館其邸舍，得徧覽羣書，獲交當世聞人，名漸起。尋中戊子科北榜副車。竹君督學安徽，先生暨邵晉涵，洪亮吉，黃景仁等，皆延致幕中，而與邵論史，尤訢合無間。

初，先生隨父客湖北天門，適改修縣志，爲撰修志十議。爾後，亦嘗就南北方志之聘，修和州亳州永清諸志。更創州縣立志科，方志立三書議，時雖稱善，顧未能行用。戴東原見其和州志例，謂修志當詳沿革，不當侈言文獻。先生則主方志如古國史，不得已而勢不兩全，無甯重文獻而輕沿革。往復辨難，終不相屈。觀其爲畢秋帆制府修湖北通志稿，大略分四部：以圖經合列傳爲一部，掌故文徵各爲一部，附以叢談爲一部。即可概見其義法焉。

丁酉，秋闈獲雋。逾年成進士。官國子監典籍。絕意進取，至開選垂得，仍舍去。惟苦著書貧無貲，疊主近畿及河南山東諸書院講席，藉館穀所入，以佐探討。獨恃才睥睨一切，又所持論務高遠，恆與俗迕，知之者抵箭河弇山，深相推挹。兩先生既歿，益寥落無所合。晚歲病瞽，撰述每倩寫官，迄死弗輟。卒年六十有八。

先生地產霸材，天挺史識，大抵推本官禮，而服膺向歆父子之傳，故於古今學術

淵源，輒能條別而明其宗旨。下筆沈雄醇茂，尤長攻難駁詰之文。班范以次，均遭指摘。自謂：『卑論仲任，俯視子元。』未免過詡。平心而論，清代三百年間，蓋鮮此作手。彼李慈銘輩，妄加詆謾，未免過當。所著書以史籍考爲最博，而文史通義爲最精。史籍考代謝蘇潭侍郎撰，踵竹垞成例，凡十二綱，五十七目，三百二十五卷。其言史部雖佔羣籍四之一，而實上援甲而下合丙丁，故範圍廣博，竭畢生心力然後成。惜遺稿竟不傳。至於文史通義，共數十萬言，則以六經皆史書，與春秋同原；詩教最廣，太史陳之；官禮制作，與大易之制憲明時，聖王經世之大，皆所以爲史也。每一篇就，率寫寄友人，因之傳錄多有異同。道光壬辰，次子華絨始編定爲文史通義內篇五卷，外篇三卷，校讎通義三卷，刊於大梁。全橐除史籍考外，卒前存諸蕭山王宗炎處。近烏程劉氏翰怡得之，重加校訂，凡三十卷，益以信撫乙卯丙辰劄記，閱書隨劄，永清和州兩志爲外集十八卷，并目錄附錄各一卷，共五十卷。於是章氏遺書，粲然大備。翰怡其不媿實齋之功臣矣！

(附) 方恠字子謹，一字退齋，江蘇陽湖人。祖履籛，父駿謚，世以文學著稱。幼嗜讀，長而博覽羣籍，於詩古文辭旁及書畫金石摹印之屬，無不工習。已盡棄去，日從事經術，期植根柢。乃求晚出書之真僞於潛邱松崖，求詩之聲韻於亭林東原，求六書訓詁之蘊於段茂堂王伯申。又以爲治經而不治史，是有益於己而無益於人也，復徧探馬班陳范之書與夫通鑑通攷，覈古今成敗治亂之迹，爲歷代建置表一卷，兵事表二卷。圖劉項以來武事之所經，稽其道里，釋以今名，爲歷代武功圖要若干卷。顧才高遇齎，由國子生兩應京兆試不售。祇初下第時，游保定，貴筑黃編修彭年見而器之，言於合肥李文忠公，纂通志。在局三年，盡取各省志暨郡縣志讀之，孜孜不輟，多所論著，或志例有未安者，亦輒於編修前力爭無少讓。嗣得實齋章氏書，與生平所持議每多闇合，服膺甚至，以爲推原官禮，深窺乎六藝之精微，羣言之奧旨，比之清朝之學，謂能獨見其大，遂憤發其所欲言，成方志舉例三篇，內外編各二十篇。

雜編十篇。於章氏一家之言殆可稱專精者矣。惜遭疫癘暴卒，年僅三十。他所著尙有同文考異三卷，說文字原表一卷，廣韻分母表九卷，讀通鑑雜記二卷，詩文四卷。其歷代武功圖要，漢石存佚攷二種，均屬稿未竟。方志舉例未刊。

馬驪附王爾齊

馬驪字宛斯，一字驄御，山東鄒平人。順治己亥進士，謁選在京師，用才望與順天鄉試同考官。後爲淮安府推官，甫三月，數有平反。改知靈璧縣，蠲荒災，除陋弊，刻石縣門，歲省民力無數，流民復業者數千家。卒於官，年五十四，士民皆哭，得部檄祠名宦。先生少孤，事母以孝聞。穎敏強記，於書無不精，而尤癖左氏春秋。以敘事易編年，引端竟緒，條貫如一。著左傳事緯十二卷，附錄八卷。其圖表皆考證精詳，爲專門之學。

先生又取太古以來，及亡秦之事，合經史諸子，鈎括裁纂，佐以圖考，參以外錄，謂之釋史。凡數十萬言，爲書百六十卷。分五部：一曰「太古三皇五帝」，計十篇；二曰「三代夏商周西周」，計二十篇；三曰「春秋十二公時事」，計七十篇；四曰「戰國春秋及亡秦」，計五十篇；五曰「外錄」，「紀天官地志名物制度等」，計十一篇。紀事則詳其顛末，紀人則備其始終；君臣之蹟，治亂之道，名法儒墨之殊途，縱橫分合之異勢，瞭然具備。凡文獻攸存，靡不畢取。傳疑而又極高古者，亦復弗遺。眞膺錯雜者，取其強半。附託全僞者，僅存要略。漢魏以還，稱述古事，兼爲采綴，以觀異同。若全書缺佚，其名僅見；讖緯諸號，尤爲繁多；則諸箋注之言，類萃之帙；又百家所記，或事同文異，或文同人異，互見疊出，不可偏廢。所謂「疑則傳疑，廣見聞也。」時人稱爲「馬三代」。顧炎武讀是書而嘆曰：「必傳之作也！」康熙四十四年，仁皇帝南巡至蘇州，命大學士張玉書物色釋史元版。明年，令人賚白金二百兩至鄒平，購版入內府。

(附) 後先生而起者，有掖縣王爾齊，字襄哉。治經宗漢學。謂窮經當以毛鄭何爲主，然後博考諸儒，擇其善而折衷焉。其論讀史也，以正史爲主，而旁證以外史。亦一時之學者也。

顧棟高

顧棟高字復初，一字震滄，又自號左畚，江蘇無錫人。康熙辛酉成進士，受內閣中書。性倨傲，不合時宜，坐奏對越次罷官。歸田後，惟日以窮經著書爲事。自幼至老，未嘗一日不讀書。乾隆庚午，特詔舉經明行修之士；明年，於所舉中核其名實，允孚者得四人，先生其一也。并授國子監司業。以年老不任職辭。掌教淮陰，從遊者甚衆。夏日不見客，閉重門，解衣脫屣，匿帷後，手一卷，研誦弗輟。高宗南巡，召見行在，加祭酒銜，賜御書「傳經耆碩」四字。生平於五經多有發明，尤篤好春秋左氏學，晝夜探討。每懷忿懣，

家人以左傳一冊置几上，卽怡然披覽，不復問他事矣。著尙書質疑二卷，不信梅賾古文。問有逞臆斷者，以於書本非其所長也。毛詩類釋二十一卷，采錄舊說，闡明經義，亦甚謹嚴。其畢生精力盡盡萃於春秋大事表一書，泛濫者三十年，覃思者十年，執筆屬藁者又十五年，而后寫定。凡列表四十首，時令終列女合五十卷，表皆有序，後更附以輿圖一卷；辨論百三十一篇，條理詳明，考證典核。諸序論又皆引據賅洽，持議平允，每發前人所未發。此不獨治春秋經傳者之要籍，亦讀史所宜取法者焉。少受業高紫超，講學嘗援新安以入金谿，爲調停之說，故復輯大儒粹語二十八卷，期合宋元明儒而一之。卒年八十一，其後詔修國史儒林傳，首舉其名，謂「如顧棟高輩豈可不爲表章！」館臣遂承上意，創傳推先生爲始云。

作史學家列傳第十四

(原稱浙派史學家)

敘目

史學不必分派，浙派別派，應以別派。史者為一，類如萬斯同、邵晉涵、周濟、顧炎武、黃中亦、陳列、入、攷、史、者、為、一、類、如、馬、驢、以下、是、也。

清自康熙後，文網日密，由松陵潘吳二子因莊氏史案牽連得禍，晒園雖幸在先獲免，而文人遂相率以載筆為戒。故終清之世，幾無作史可言。其有抱龍門之識，具班范之才，欲施諸著述者，亦祇取往代舊史，重為理董。至若刪繁於晉宋，補疏略於金元，甚或雜躡偏隅，并加排纂，在後者易為功，往往較勝原本焉。

潘檉章 附吳炎

〔溫睿臨〕

張符驥 附陳志襄 沈默

全祖望

作史學家列傳第十四

吳任臣

陳鱣

梁廷枏

吳江陳氏父子傳 景雲 黃中

謝啓昆

張宗泰

臧壽恭

周濟

魏源

屠寄

錢林

嘉興錢氏兄弟傳 饒吉 秦吉

龔自珍

潘樸章 附吳炎

潘樸章字聖木，一字力田，江蘇吳江人。生有異稟，穎悟絕人。九歲從父受文，裁過目，燼於火；責令覆寫，不遺一字。年十五，補桐鄉籍諸生。亂後棄去，隱居韭溪，肆力於學。綜貫百家，天文地理，皇極太乙之學，靡不通曉。已而專精史事。念明興三百年間，明君賢輔，政教禮樂制度文物大備，無有能如太史公敘述論列成一家言者。而友人吳炎所抱略同，因相約共纂明史記。先定爲目，凡得紀十八，書十二，表十，世家四十，列傳二百。力田撰本紀及諸志。炎分任世家列傳。其年表厯法則屬諸王錫闡。流寇與夫殉節諸臣則屬諸戴笠。私家最難得者實錄，力田鬻產購得之。而崑山顧炎武，江陰李遜之，長洲陳濟生，並熟於掌故，且多藏書，悉出以相佐。間偕炎出其橐以質虞山錢謙益，謙益大善之，嘆曰：『老夫耄矣，不圖今日復見二君！絳雲餘燼尙在，當舉以相付。』遂連舟載歸。謙益有實錄辨證，力田作國史攷異，頗加駁正，數貽書往復，謙益弗能奪也。撰

述數年，史行成十之六七，而南潯莊氏獄起。參閱莊書，列君及炎名，乃俱及於難。實則莊氏取朱國楨史槩爲藍本，兩君俱未寓目；徒以名重，爲所牽引，致罹慘禍，論者惜之。所著惟國史攷異六卷，刊於潘氏功順堂叢書，國權百卷，係明史記初藁，僅有傳鈔之本，已徵入明史館。餘若松陵文獻，杜詩博議，星名攷，壬林韭溪集，復若干卷，存沒均無從咨訪矣。

(附) 吳炎字赤溟，又字如晦，號媿庵，江蘇吳江人。以遭逢鼎革，不忘宗國，故更號赤民。少承家學，爲歸安諸生，有聲於時。國變後，乃遁跡湖州山中，久之始出，則偕其伯叔昆季結逃難之盟於溪上，一時吳越間高蹈能文之士，聲應氣求者得數十百人。蓋彬彬乎有月泉吟社之遺風焉。既與同邑潘檉章約撰明史記，檉章精攷覈，而赤民長於敘事，因各竭其能，昕夕載筆。又疏遺軼，暨赫赫耳目前，足感慨後人者，得百事，作今樂府。史禍作，或勸趨避，笑不應，闔戶危坐，以待捕者。既輸訊，廷辯侃侃不稍

撓；已知其無濟，益抗激罵不止。捶楚交下，意氣自若，竟與檀章同磔於市。天下咸識其慘！樂府清季有梓行者。邑人陳去病復哀其遺集。——戴笠字耘野，亦吳江人。錫闡別有傳。

溫睿臨

溫睿臨字鄰翼，一字晒園，浙江烏程人。爲故輔體仁族孫。舉康熙乙酉鄉試。詩古文雄於時。性伉直，好面折人過。與萬季野交最善。以赴禮闈游京師，當道欽其名，咸致敬禮。會開明史局，徐元文延萬主任編纂，因常相過從，多所參論。季野乃謂之曰：『鼎革之際，事變繁多，金陵粵閩，播遷支柱，歷年二十，遺事零落，及今時故老猶存，遺文尙在，可網羅也。子曷輯而志之成一書乎！』應曰：『諾。』在京無事，遂哀聚野史，綏寇紀略等四十餘種，排比纂次，三帝魯王爲紀略者四，諸臣爲列傳者二十四，總成四十卷。

題曰南疆逸史。觀其序萬氏紀元彙攷稱：「余來京師，與之遊者十餘年，見則問看何書？有何著述？勤勤以年老時邁毋荒歲月爲戒。」是逸史雖成於哂園，而實猶是季野之志也。究緣怵於利害，不能直筆，比諸陳承祚、蜀志，差可比肩。而爾後文網日密，卽此四十卷者，輾轉傳鈔，僅止二十卷；且削脫撰人名氏。然則詳於南都閩浙，略於滇粵臺嶠，尙未知原本如此，或後來之佚脫也。殆李氏瑤重編爲五十六卷，則更非「廬山之眞面目」，良足惜也！他著尙有吾徵錄，均役全書，遊西山吟，藁若干卷，均不傳。

張符驥 附陳志襄 沈默

張符驥字良御，號海房，江蘇泰州人。爲諸生時，博覽有名。聖祖南巡，召試，獻竹西曲，張文正第其詩一等。年五十，貢入太學。康熙五十三年，舉順天鄉試。六十年，成進士，授庶吉士。旋乞假歸。家居貧約，不私謁當事；然於有益鄉里之舉，則力言之。著有自長

吟日下麗澤，順時錄海房文稿，依歸草等集。遊其門者甚衆。雍正五年三月卒於家，年六十有四。今惟依歸草刊行，餘不傳。

先生生居海濱，承明季遺民之流風，頗留心前代掌故。所作多傳狀碑誌，皆以表忠義，彰節烈，述學行，存文獻爲旨。其紀呂晚村諸事狀，輒愴然有桑海之感。江都焦里堂序依歸草，稱『其文日加高，而湮塞不平之氣亦日盛』。先生殆與全樹山、杭大宗、邵二雲諸公有同志乎？書凡三刻，而傳本多殘闕，次第又各不同。蓋當時文字之獄已漸起，所遺脫之篇，多涉忌諱語，因而刪之也。民國十年，秦縣、韓止石哀其全集刊入海陵叢刻第八種，跋云：『是集世不甚傳，豈非以呂氏之禍，陳大始之序，而因有以尼之耶？』先生與徐述夔同鄉，乾隆時，徐氏逆書之獄方熾，則集中所刻吳張傳及其子沆補刻朱書序，皆在違禁之列，宜有隱晦；今幸賴韓刻得窺全豹耳！韓公又論『其文之神理，殆由震川以追步廬陵、南豐，上接龍門』。觀其遺集，如魏國公世系考，固爲史記

世家體，吳王張士誠傳，固猶項羽本紀意，莫非史筆也。又若春王正月論，七出論，斬丘木之議論，亦頗能發明春秋禮經之微言大義。故焦里堂言『爲其發凡起義』焉。

(附)

陳志襄字陶思，號南村，江蘇泰州人。天性至孝，恥近虛名。五入南闈，兩試京兆，攻苦早暮，遂得喘疾。於是徜徉泉石，構「南村小墅」，「蒔花種竹」，琴書自娛。四方聞人，多相問訊。詩歌每爲選家搆刻，雅弗屑也。生平尤究心諸史，念浩博不便後學，於是薈萃涑水考亭之精，羅列評解，州次部居，使無遺義，纂成一百一十五卷，名曰綱鑑會通。蘇撫張公伯行見而好之，爲之序以行世。韓公止石任安徽巡按使時，得之於皖，將付剞劂云。

沈默字興之，號讓齋，晚號遜叟，老人，江蘇泰州人。早入州庠，舉京兆試，而七上公車，春官不第。歸而著書清芬堂中，寒暑不輟。晚年學益勤，清廷召修國史，檄至州，州牧舉其事屬默，默臚州中諸前輩及節烈流寓隱逸等，一一爲之傳。又慮國史不能

悉載，遂家刻一書，名曰發幽錄。其人物限於秦之一邑，又斷自清初，凡分名臣、循吏、理學、文苑、忠臣、孝子、良將、隱逸、方伎、雜流、烈女、烈婦、孝女、十五類，得三十七人。韓公已刊入海陵叢刻第十八種。

全祖望

全祖望字紹衣，號榭山，浙江鄞縣人。乾隆元年成進士，選庶吉士。嘗忤首輔張廷玉，故散館以知縣用。遂反里不復出。貧且病，饗殮或不給，而好學益厲，人有所餽，皆峻辭。鄞故濱海，爲浙東遺民所萃，流風餘韻，猶有存者。族母爲張蒼水女，年八十餘，先生曾從之詢掌故。以東錢湖之童晷爲先人避兵地，益參考舊聞，成滄田錄。復撰續甬上耆舊詩，發揚幽潛，以詩存人，于桑海之變三致意焉。迨及晚年，益留心明季遺聞，以表章節義爲己任。凡明末里民之死難者，爲之博考野史，旁及家乘，作爲碑誌銘傳，纏綿

愴，有變徵之音。其紀莊氏史獄諸事，直筆無隱。浙東官吏以細事羅織之，撫軍常某不欲從，其事始釋。先生持志不稍屈，作汗漫游，往來大江南北，交其賢豪長者，嘗主蕺山端谿兩書院。講授之餘，殫心著述，嘗登范氏天一閣，搜金石舊榻，編爲碑目，且抄其秘書。經揚州，居馬氏畚經堂，成困學紀聞三箋，又修南雷宋元儒學案。七校水經注，暇則作文自娛，以徵鄉邦文獻。嘗謂『史臣不立節烈傳，所當立傳者何人？』卒于乾隆二十年，年五十一。門人董秉純哀其文爲鮎埼亭集。其所著書，尙有經史答問，漢地志稽疑，及古今通志年表。先生在翰林時，每日讀永樂大典盡二十冊。開明史館，復爲書六通論之。其第一第二專論藝文一門。又謂本代之書，必略及其大意，始有係于一代之事故典則，而不僅書目。第三第四專論表。于外蕃屬國變亂，瞭如指掌。第五第六專論隱佚忠義兩傳，足扶宇宙之元氣。

吳任臣

吳任臣字志伊，一字爾器，號託園，浙江仁和人。爲名諸生。康熙己未，召試博學鴻詞，授翰林院檢討。志行端懿，學博而思深。穿穴經史，兼擅天官奇壬之術，射事多中。時人比諸管郭。嘗以歐陽氏五代史附十國世家於末，雖敘次簡潔，然遂不免遺漏，立傳者孫晟、劉仁瞻數人而已。又於十國時事亦間有未覈，讀史者或不足焉。因取其間人物事實而章著之，網羅典籍，仿崔鴻例，勒成十國春秋。爲本紀二十四，列傳千二百八十二；人以國分，事以類屬。又爲紀元、世系、地理、藩鎮、百官、五表，總一百十四卷。所采古今書籍，無慮數百種，卽石刻亦所不遺，故絕鮮臆說杜撰。復爲攷異夾注各條之下，以示有徵。其所辨證，如田頴擒孫儒年月，則從吳錄而不從薛史；呂師周奔湖南年月，則從通鑑而不從九國志；南唐烈祖世家，則從歐史十國紀年而不從江南野史；吳越備

史之類。采擇詳博，而攷據明慎。五表義法尤精，爲文亦淵雅。得馬班遺意，誠足稱淹貫矣。他著尙有字彙補，山海經廣注，託園詩文集，共若干卷。惜周禮大義通，春秋正朔考，辨，南北史合注，并佚不傳。

陳 鱣

陳鱣字仲魚，號簡莊，浙江海甯人。嘉慶元年舉孝廉方正。營別業於硤川之果園，在紫微山麓。購置宋雕元槧槧近見罕見祕笈甚多。生平專心訓詁之學。嘗與錢竹汀翁覃溪段若膺諸先生遊，研究經義，質疑問難以爲樂。撰輯論語古訓十卷，六藝論一卷。晚客吳門，聞黃蕘圃百宋一廛九經三傳各藏異本，於是欣然定交，互攜所儲，往復易校，疏其異同，必使詳確精密。暮年歸隱紫微講舍，手自鈔撮，成經籍跋文一卷，雖止寥寥十九篇，而其功不在岳倦翁攷定經傳沿革之下。

復長於史才，以宋李昉等建議，擬黜朱梁紀年，後唐既係賜姓，收之屬藉，又有大勳勞於唐室，宜可繼承唐之墜緒。石晉叛宗邦而附異族，則削之。南唐爲憲宗五代孫建王之玄孫，祀唐配天，不失舊物，尤當大書年號，以臨萬國。用戚光祖例，取南唐接後唐而上溯天祐，至十九年中虛其統，成續唐書七十卷。凡爲本紀七，表四，志十，世家十三，后妃傳二，宗室傳二，諸臣傳二十九，外國傳一。其間十志，具存五代典章制度，足補薛歐所缺。餘尚有簡莊疏記十八卷，陳仲魚文集八卷，河莊詩鈔一卷，對策一卷。

梁廷枏

梁廷枏字章冉，廣東順德人。幼穎悟，髫齡而孤。成童，盡取父書讀之，下筆有凌雲氣。稍長，益肆力於學，尋補諸生。嘗以南漢六十年間事蹟，薛歐二史粗具厓略，九國志十國春秋雖較詳，然終未有專書如南唐吳越者；因根據正史通鑑地理諸書，旁及說

部金石，編撰南漢書十八卷。凡爲本紀六，列傳十二。其折衷異說，則別作考異十八卷，分附於紀傳之後。至於單詞片語，散見羣籍，亦並綴補靡遺，成叢錄四卷，文字二卷，足以資考證而廣異聞焉。

他著有論語古解十卷，擇古訓之異於集注者，依經纂次。碑版廣例四卷，續一卷，以廣潘王之書。博攷書餘一卷，考釋鐘鼎遺文。曲話五卷，論審音填詞以及批評優劣。總曰：藤花亭十種。復取蘇東坡事蹟，薈萃成編，分十七目，作東坡事類二十二卷，單行，不在十種之內。

吳江陳氏父子傳 景雲 黃中

陳景雲字少章，江蘇吳江人。生而穎異，初就塾時，諸兒所課皆能背誦。年十七，湯文正公撫吳，試士拔置第一。復從何義門游，益講求通儒之學。窮究經史，晝夜無間，業

遂大進。父喪服闋，補諸生。京兆不售，館藩邸者三年，辭歸。時年四十。以母老，絕意仕進。後藩邸再遣使敦促，漕帥赫公命淮安守造盧延請，悉堅謝弗赴。凡出處不苟如此。性至孝，居父母喪，每慟絕；歲時祭享，必涕泗沾衣。與人交，有始終，外和內剛。處境極貧，朝齋暮鹽，晏如也。晚年名益高，跡益晦。蓋視世固絕少可語，世亦鮮知之者。卒年七十八。弟子私謚曰「文道先生」。

其爲學，如飢渴之於飲食，常日丹鉛不去手，舉經史四部書，從源及委，條貫井然。地理制度，考據尤詳。下逮稗官小說，無不綜覽，而最深於史學。早歲，溫公通鑑略能成誦。前明三百年事，談之更僕弗倦，若身列其間，能剖決其毫芒得失者。爲文章，簡嚴有法度，著讀書紀聞十二卷，綱目訂誤四卷，兩漢舉正五卷，三國志舉正四卷，韓集點勘四卷，柳集點勘四卷，文選舉正三卷，通鑑胡注舉正二卷，紀元攷略二卷，文集四卷，總曰：文道十書。其他應聘所修通志，暨少時帖括之文，不與焉。

子黃中字和叔，號東莊。乾隆初，應博學鴻詞不遇，乃縱遊南臨洞庭，登衡嶽，東浮錢塘，入閩北，馳驅燕齊河岱間。學益精。受知於海寧陳相國，嘗上書論用人理財養兵數大事，鑿鑿切利病。會有詔求骨鯁魁壘之士，陳欲以先生應，辭焉。初客湖南巡撫幕府，土苗或小警，巡撫欲興師勦之，屬繕奏草，和叔曰：『此召亂也，撫而輯之其可。』弗聽，和叔行。已而苗叛，用兵期年乃靖。卒年五十九，貧不能庀喪。其姻黨以金贖，妻張氏固却之曰：『奈何以貧故，傷夫子義！』遂鬻居以葬。所著有宋史稿一百七十卷，新唐書刊誤三卷，國朝諡法考三卷，殿閣部院年表，督撫年表，各六卷。詩文集四卷。

謝啓昆

謝啓昆字蘊山，號蘇潭，江西南康人。乾隆庚辰進士，改庶吉士，散館授編修。既而

充國史館纂修，日講起居注官。出爲鎮江府知府，調揚州府，因事革職，發軍臺。旋開復，署安徽甯國府，擢江南河庫道，浙江按察使，山西布政使，轉浙江布政使。仁宗親政，簡任廣西巡撫，凡三載，終於位。年六十六。

公居官明決，素持正，上官或異意而不能奪。任揚州，適東臺縣民徐述夔詩禍起，遷延弗忍竟治，雖坐此獲咎，而頌聲徧江淮。及爲藩司，其時各省官帑多缺，每至公私相贖，閱歷數宦，前後援倚，所虧愈不可補復。公獨持身廉潔而智足究郡縣利病之多寡，立法以其贏絀互補。故所任不數年，無造怨於吏民，而能完久虧之額。比撫廣西，內治整飭，夷獠安堵。築湘灘之隄以爲民利，迄今人呼曰謝公隄。又嘗興學校，肅營伍，文武皆懷愛，且敬畏之。

自少博聞強識，本以文學名。迨出翁覃溪門，益專力經史金石諸學，居史局暇日以元魏之季，東西對峙，雖各爲強臣所制，無以相尙，而天平改元，孝武固在，東魏誠不

能如西魏之正。且天保受禪而後，關西猶擁虛號者七八年，國祚亦較愈於東之促。乃伯起書僅存，彥深之史失佚，讀史者不無遺憾。爰斟定義例，排次成篇，計本紀一，表三，考二，列傳十三，載記一，合爲西魏書二十四卷。其中將相大臣征伐諸表尤爲精覈。

後著小學攷五十卷，補朱氏經義考所未備。粵西金石志十五卷，與覃溪粵東金石志並行。請修廣西通志，成書若干卷，顯微闡幽，搜羅博洽，稱方志善本。爲詩宏瞻富麗，兼具唐宗名家之體；有樹經堂集十五卷，詠史詩八卷，雜古文四卷。

張宗泰

張宗泰字登封，號筠巖，江蘇甘泉人。自爲諸生，廉隅自飭，研究經史，寒暑不輟。乾隆庚戌，由拔貢朝考二等一名，用知縣，以親老呈請改教職，改選天長縣教諭。訓士以敦品績學爲先，治黷序，備樂舞，率皆實力奉行。境內遇偏災，上官檄委查驗，務使實惠

及民無苛濫，從不假手胥吏。公餘仍篤志著述，纂備修天長志，彙十卷。巡撫朱文正公知其勤恪，欲保升知縣，仍辭。嘉慶辛未，奉父諱去官。服闋後，鄉人擬舉應孝廉方正，則謂盛名難居，亦力辭弗就。道光乙酉，再選合肥縣教諭。未二年而職事修舉，一如官天長時。尋引疾歸里，暇輒以誦讀自娛。卒年八十二。所著有質疑偶存六卷，及周官爾雅注疏正誤、孟子七篇諸國年表、天長縣志表，俱錄梓行世。其餘卷軸最鉅者，爲舊唐書疏證、新舊唐書合鈔。蓋畢生精力所萃，惜未付刊。又有春秋左氏傳讀本正誤、乙部攷目長編、新唐書天文志疏正、竹書紀年校補、二十二史日食徵、唐冬夏兩至攷、宋遼金元朔閏攷，彙均藏於家。

周濟

周濟字保緒，一字介存，號未齋，晚號止庵，江蘇荆溪人。九歲能文。讀書明大義，不

屑屑章句間。好談兵，兼習擊刺騎射。嘉慶甲子舉鄉魁，明年成進士。以對策言直，抑置丙科，用知縣。父慮其性卞急，僱事爲請改教職，選淮安府學教授。郡守王穀，簞簋不飭，揭諸大府，勿聽，卽日移病去。益交當世豪傑士，得包世臣，以經濟相切劘。屏去瑣碎，提挈大綱，務爲通儒有用之學。寶山令田均欽其名，延往商海防，因客寶山數載。會田有母喪，而曹滑間爲豫匪梗道不得歸，慨然代之行。單騎走曹州，逢賊黨數百人，鎗仆其二，餘驚竄。七晝夜抵鉅野，視田太君喪無恙返報。并歷察齊魯晉楚道所出者，遇山川形勢關隘險阨，必窮究其要領，及郡縣諸利害，得間爲當事言之，由是名愈震。南旋居廣陵。兩江節相孫公慕其才略，以淮南北鹽臬充斥，屬專任緝私事，令所在營弁悉受指揮。則一用兵法部勒，擒擊防勦畢當。尋以激變尼之者，遽停罷。乃舍而治鱖，獲貨頗鉅。遂構第宅，縱情聲色，狗馬日聚，俠少年過酒樓酣飲，裙屐雜沓，忽或悲歌慷慨，見者皆莫測爲何許人。一日翻然悔曰：『吾數年一念所誤，乃至此！』盡斥其貲，謝其黨，且

更號止庵以自訟。復去揚州，僑寓白門春水園。屏爨時豪習，規理故業，取平生蘊蓄，賅括蒼萃，著爲晉略六十六篇，體例精嚴，識力超特。其諸論贊，放攻取防守地勢，尤反覆曲折，確有指歸。不獲施諸世，因以託之言。自序謂：『將以喻志適用，匪侈博聞。』什七折衷於涑水，庶幾無悖資治之意。』他所著，尙有說文字系二卷，韻原七卷，史義二卷，介存齋詩六卷，味隽齋詞一卷。晚年食貧日甚，再秉鐸淮吳，更恂恂篤儒行，興禮樂，表貞孝。漕帥周天爵雅重之。周移督兩湖，堅招同往。經夏口，嬰疾卒於行館，年五十九。

魏源

魏源字默深，湖南邵陽人。七八歲時，卽常夜手一編，呶唔達旦。十五補諸生，始究心陽明之學。好讀史，貧無書，假之族塾。乾隆癸酉，舉拔貢。翌年入都，遂留從胡墨莊問漢儒家法。侍郎周系英見其著作，力爲揄揚，數月，名滿京師。是時復問宋儒之學於姚

鏡塘，學公羊於劉申受，古文辭則與董桂敷、龔自珍諸人相切蹉。道光壬午，中順天鄉試。蘇藩司賀長齡延輯皇朝經世文編，乃更留心經濟之學。巡撫陶澍亦加禮重。凡海運水利諸大政，咸與咨訪。己丑，應禮部試不售，援例以內閣中書候補，益熟於一代掌故沿革。比陶公督兩江，用先生議，改淮北試行票鹽，引銷課裕，每年額溢數十萬。壬寅，英人犯海疆，江浙震動，佐欽差長白裕公墓，數月辭歸。裕公陣歿，撫議遂成。有感而著聖武記十四卷。甲辰，成進士。以知州用，分發江蘇，權知東臺縣事。禮耆德，懲奸猾，士民悅服。未幾，丁母艱去官。讀禮之暇，念曩歲夷禍，緣當事者爲其寯遠，不諳底蘊所致，因搜覽歷代史志及明以來島志，并近譯外洋諸紀述，輯海國圖志六十卷。繼又得布人瑪吉士等所著書，補輯四十卷，合前書共一百卷。服闋，署興化知縣。請於大府，定收穫後啓壩，且築西堤，以捍秋汛。民感其德，議集資建生祠，堅阻乃止。會淮南亦改鹺政，而鹽缺產課不足，檄權海州分司運判，相機調劑。咸豐辛亥，補高郵州牧。粵寇既陷揚州，

則首倡團練，親督巡防，人心始定。乃爲忌者以遲悞驛報劾罷。僅一佐周天爵治軍皖北。避兵僑居興化，惟手訂生平著述，不與人事。

其學最精史地，故推聖武記、海國圖志稱佳構。治經好求微言大義。於書專申史記、伏生大傳，及漢書所載歐陽夏侯、劉向遺說，以難馬鄭作書古微十七卷。於詩表章齊魯韓、墜緒，以匡傳箋作詩古微二十二卷。其餘尙有公羊古微、春秋繁露注、曾子子思子章句等十餘種，多不傳。後之論者詆其空疎少實，蓋考据非其所擅，而新理解則時出也。雜文自編爲古微堂內外集十卷。卒年六十四。

屠 寄

屠寄字敬山，一字景山，江蘇武進人。幼穎敏。比長，博通羣籍。負才使氣。工詩古文辭，尤擅長於駢偶。光緒乙酉舉於鄉，入都赴禮部試，不售，應東省當道聘，佐理政務。時

外交方棘，三省地處俄日之間，尤艱應付。君爲折衝尊俎，措施裕如。主者故滿洲世裔，茸闖庸懦；久之，議不合，輒因事欲中傷之，逃而免。短衣匹馬，越蒙古草地以歸。顧轉得徧覽山川阨塞，形勢險要。取遼金元興廢之迹，證以舊史，其學益進。壬辰，成進士，改庶吉士。仍落落無所合，遂南還。適朝廷勵行新政，改天下書院爲學校；廣陵就安定書院設儀董學堂，運使程儀洛延君任總教習。課程規則，多師法歐美。程本頑固，意不善也，乃復使教官詹某任提調，陰掣其肘。居一載，鬱鬱去。晚選浙江浮安縣知縣，之官數月，卽謝病不復出。家居銳意興學，力謀開通風氣，暇惟從事著述。入民國卒。

所著詁經之書，未聞傳稿。輯常州駢體文錄三十卷，亦止鄉里徵獻，無關宏旨。獨蒙兀兒史記五十卷，參照元祕史及西方史料，證以身所親歷調查者，對於元史大加補訂，足可遠並邵魏，近開柯氏，惜僅本紀列傳世系表暨地理志之一斑，其餘有目無書者，尙待後人補輯耳。

錢 林

錢林原名福林，字東生，一字志枚，號金粟，浙江仁和人。嘉慶戊辰成進士，入翰林，大考一等，歷官侍讀學士。既以事左遷庶子。未幾卒。

先生少時，學問淵博，於書無不窺。綜覽經籍，兼工詞翰。加以才思敏捷，每給扎廣庭，頃刻立就。居詞館日，因體弱多疾，謝絕應酬。日常過午不食，每夙興在丑寅之交，燒高燭一二支，閱書數十番，天始曙。靡間寒暑，搜討極勤，蠅頭細字，或行或楷，隨筆著錄，間有塗抹，至不可辨識。臨終，豫刻忘日經，畫含斂，以詩三百篇貽高麗申侍郎，以寫定玉山草堂集三十卷貽程春海，以所集當代名流紀事十一冊付汪孟慈。弟子通州王藻展轉得其稿於孟慈，所乞黟縣俞理初，長洲陳碩甫，重爲釐定，成十卷，題曰文獻徵存錄。雖未臻詳實，而其敘次翔實，屬辭爾雅，要亦江鄭堂漢學師承記之流也。

嘉興錢氏兄弟傳 儀吉 泰吉

錢儀吉字衍石，號心壺，又號新梧，浙江嘉興人。嘉慶十三年進士，散館授戶部主事，擢給事中。博通羣籍，早有高名。深史學，嘗撰三國會要若干卷，體裁悉仿宋徐天麟兩漢會要，而略有所變更，如改術數爲天運推步算術之類，及史文輿蹟者，通其所可知，間爲之註釋。復仿宋杜大珪碑傳集例，輯國朝碑傳集一百六十卷，起開國以迄當時，內而宰輔卿貳詞臣，外而督撫守令僚佐，及忠義孝友儒林文苑列女，薈萃私家文集著述數十百種，博采旁搜，俾有清二百年史料粲然大備。其所自撰衍石齋記事正續集二十卷，亦多具名人行誼，尤拳拳於表彰節孝，闡發幽微，足與碑傳集相輔。

兼長厯算。官京師，友程杰董祐誠，作黃初朝日辨一篇。其厯攷集乾象景初二術成書，同郡朱鴻爲注，張彥冠審定之。

道光中葉遊廣東，主學海堂。晚客汴，主大梁書院講席十餘年，諄諄以通經爲多士勗，嚴立課程，負笈就學者甚衆。嘗謂：士欲通經，尤宜博古。自書遭秦火，六藝闕佚有間，歷唐宋諸儒纂述注疏，發揮古義，昭如日月，使遺經晦而復明，有功聖教，洵非淺鮮。惟舊籍流傳汴中，多未概見。乃商諸當道，出所藏書，集資補刊，通志堂經解之失收者，得四十一種，名曰經苑。內二十五種甫竣工，而呂氏讀詩記付梓在後，且不及校定，遽卒。遺集尙有刻楮集四卷，旅逸小稿二卷。

錢泰吉字輔宜，號警石。弱冠卽與從兄儀吉齊名，事之在師友之間。遠近盛稱「嘉興錢氏二石」云。衍石久宦京師，君則以廩貢生爲海寧州訓導者垂三十年。不能以時聚晤，乃書問叢沓，咨詢學術，動逾數千言。自周秦諸子，馬班羣史，許鄭詰訓，杜馬典章，洛閩之淵源，唐宋名賢之詩古文辭，及目錄校讎金石書典方志雜說，一孔半枝，

無所不究，蓋亦無所不辨。或獻一疑，而詰難十返。或尙論前哲，評隲時流，亦皆窮極理趣。於是二石家書又蔚然爲藝林所推焉。

自中年卽好校古書，每假人善本，及先輩評點之冊，寫而注之眉端。如史記、前後漢書、晉書、集韻、元文類、禮記集說等編，率校勘數周，一字之外，旁求衆證。嘗著曝書雜記三卷，以發其凡。雖尙考據，復不薄義理。以爲字體故訓者，漢儒之小學也；曲禮、少儀者，宋儒之小學也；二者皆扶植根本。而宋儒重明倫，於道爲尊。故兄弟、咸修飭人紀，誦述先德、衍石、旣輯廬江錢氏藝文略，君則纂清芬世守錄若干卷，上著祖宗文獻之盛，下以勛後人孝友於弗替。貽謀典則，聿播芳馨，蓋并有足稱者矣。

咸豐庚辛之際，浙中遭寇亂，屢轉兵間。最後由江西而達安慶，遭疾卒於旅舍。所著尙有學職、禾人考、海昌備志，各若干卷，亂後版燬，僅存甘泉鄉人稿。

龔自珍

龔自珍字璣人，原名鞏祚，浙江仁和人。蘇松太道麗正子。幼聰明，能讀等身書。又獲聞其外祖段茂堂六書音韻之學，自視甚高。故事，凡翰詹科道子弟，別爲官卷，較民卷易入彀。君顧不屑藉門蔭，以縣學生就民卷中式。嘉慶戊寅恩科本省經魁。屢上春官不第，狂名滿天下。既購洞庭別業，又買崑山徐侍郎秉義故宅居之。道光己丑成進士，以不工書，不得入翰林。用知縣，改內閣中書，擢禮部儀制司主事。丁父憂歸，掌教雲陽書院，膺暴疾卒。

其爲學，務博覽，喜與人辯駁，雖小屈，必旁徵廣引，已說得申乃已。治經始由訓詁，繼及劉申受宋于庭游，聞常州莊氏說，則轉好今文之學。然所造顧不深，亦疎家法。惟所作古史鈞沈論謂：『五經者，周史之大宗也。』與章實齋「六經皆史」之主張相

近。又熟習掌故，通蒙古文，長於西北輿地，旁逮諸子道釋金石術數，莫不貫串。爲文瑰麗恢詭，詩亦奇境獨闢。著述極富，惜多佚弗傳。後人哀其遺集，僅存十有八卷。外太誓答問一卷，春秋決事比一卷，收續經解中。餘皆無從踪跡矣。

攷史學家列傳第十五

(原稱別派史學家)

敘目

作史既懸爲厲禁，儒者就治經之餘，每亦用漢儒家法以治史。大別爲兩途：一曰考證——有舉全史而考證之者，有單舉一史而考證之者，有僅取一篇一事而考證之者，則仿漢之徐廣應劭，宋之劉敞吳縝也。二曰補輯——或補注，或補表，或補志，或本無而補其闕佚，或本有而補所未備，則遠仿晉裴駙，近仿宋熊方錢文子也。然以深明小學，且治學方法完密，糾違拾遺，功頗不尠。視宋明專事批評，好爲空論，疲精神於無用之地，蓋有「上下床」之別矣。

〔秦蕙田〕

杭世駿附厲鶚

秦蕙田五
禮通攷卽
杜氏通典
之流應補
入(太炎)

沈炳震 附族弟炳巽

劉鳳誥

錢大昕

附弟大昭 從子侗
(見吳派經學大師列傳)

王鳴盛 洪亮吉 (并見吳派經學家列傳)

趙翼

洪頤煊 (見皖派經學家列傳)

錢塘梁氏兄弟傳 玉繩 履繩

陽湖洪氏兄弟傳 齋孫 飴孫

沈欽韓

梁章鉅

(王先謙)

有自得之
義應刪
(太炎)

周壽昌

番禺侯氏兄弟傳康 度

章宗源

周嘉猷

顧懷三

汪遠孫

程恩澤

徐文靖附陳逢衡

雷學淇

林春溥

施國祁

(李文田)

李文田之
學斷不能
比張穆張
祇在地理
李亦不必
列此
(太炎)

秦蕙田

秦蕙田字樹峯，號味經，江蘇金匱人。乾隆元年，進士第三人及第，授翰林院編修，入直南書房。累遷侍講，右春坊右庶子，改通政使司右通政，擢內閣學士，遷禮部右侍郎，丁父憂，服闋，補禮部左侍郎，調刑部右侍郎，轉左侍郎，兼理國子監算學，充經筵講官，擢工部尚書，兼理樂部，調刑部尚書，加太子太保。二十九年，給假南旋就醫，卒於途。賜祭葬如例。予諡文恭。時年六十有三。

公少承家學，以經術篤行爲江陰楊名時所知。父道然以藩邸事久繫縣獄，公旣通籍，伏闕陳情，乞以身贖父罪。道然竟得釋官。翰林時，月進劄子，原本經術。迨官侍郎，嘗舉仁和孫灝自代，世服其知人。領西曹最久，遇事沈毅果斷，退則閉戶著書。

公夙精三禮之學，按周官吉、凶、軍、賓、嘉之目，撰爲五禮通考二百六十二卷，因徐

乾學讀禮通考體例，網羅衆說，以成一書。凡爲類七十有五。以樂律附於吉禮宗廟制度之後；以天文推步句股割圓，立觀象授時一題統之；以古今州國都邑山川地名，立體國經野一題統之；並載入嘉禮。先儒所聚訟者，一一疏其脈絡，破其癥結，上探古人制作之原，下不違當代之法。殫思二十餘年，彙易三四，而後定。公少喜談易，謂易者象也，先儒詳於言理，略於言象。故撰周易象義日箋若干卷。又謂詩三百篇，古人皆被之管絃，漢魏以降，始失其傳。然天籟之發，今猶古也。因與同志講求，欲以今曲歌古詩，庶幾協詩樂合一之旨。又以近代聲韻之書，未有善本，奏請刊正。上命公與武進劉公任其事。公建議言古韻二百六部，今併爲一百七韻，如元與魂痕當析爲二，殷韻宜併入眞部，不當入文韻；上聲拯韻，去聲證韻，宜分出，各自爲韻。又考定四聲表，兼采顧亭林江慎修之說，欲通古音於等韻。公之著述大者如此。若夫律呂算數以及醫方堪輿星命家言，皆能泝流窮源，得其要領。

杭世駿 附厲鶚

杭世駿字大宗，別字董甫，浙江仁和人。少負異才，於學無所不貫。所藏書，擁榻積几，不下數萬卷，沈潛其中，目睇手纂，幾忘晨夕。舉雍正甲辰鄉試，受聘爲福建同考官。乾隆元年，召試鴻詞，授編修。校勘武英殿十三經二十四史，纂修三禮義疏。先生博聞強記，口如懸河。時方苞負重名，先生獨侃侃與辨，方遜避之。有先達以經學相質，一覽曰：『某說見某書某集，拾唾何爲？』學子有請益者，問其所業，以一經對，則以經詰之；復以一史對，則以史詰之，皆窮。乃曰：『某於西晉末十六國事，差能詳耳。』先生曰：『汝知是時有慕容垂乎？垂長若干尺，得年幾何？』其人慙沮去。以此頗叢忌嫉。改御史，條上四事，下吏議，尋放還。然高宗仍納其言，罷歸，杜門奉母，自號秦亭老民。偕里中耆舊及方外友結南屏詩社。後迎駕湖上，賜復原官。卒年八十餘。

先生性簡傲通脫，不事修飾；雖同輩時或遭其睥睨。然自謂：『吾經學不如吳東璧，史學不如全樹山，詩學不如厲樊榭。』則又謙退如此。然先生之學，實於史爲精。既爲諸史然疑，史記攷異，兩漢書疏證，三國志補注，晉書補傳贊，北史稊諸書；晚年更思補纂金史。至特構「補史亭」，成書幾百餘卷。

先生兼通禮學，有請復漢儒盧植從祀議。又議當制服，可以立師道，厲澆季。朋友不制服，防不肖者貢媚權勢，賢者結怨流俗。時論皆以爲洽。在館閣嘗自永樂大典鈔輯宋元來諸儒禮記說數百卷以續宋衛正叔書。惟所著除道古堂文集四十八卷，詩集二十六卷外，僅石經攷異二卷，諸史然疑一卷，兩漢蒙拾二卷，晉書補傳贊一卷，文選課虛四卷，續方言二卷，榕城詩話三卷，三國志補注六卷，質疑二卷，詞科掌錄若干卷，均刊行。續禮記集說若干卷，近始付梓於浙局。金史補殘存五卷，藏江南圖書館。餘若史漢北齊疏證暨歷代藝文志，兩浙經籍志，續經籍攷等遺稿均不可得矣。

(附) 厲鶚字太鴻，號樊榭，浙江錢塘人。幼孤貧，至寄居沙門。性穎悟，初學爲詩，便驚長老。稍長，於書無所不窺。康熙庚子舉於鄉，需次縣令將入都，道天津，留滯查氏水西莊數月，竟不謁選而歸。乾隆初舉博學鴻詞報罷，聞揚州馬氏藏書最富，因客之，盡探其祕牒，往來大江南北，主盟壇坫者凡數十年。嘗病遼史太簡，閱四百餘年無有爲之增益者，乃仿裴世期注三國志例，而不就書作注，但摘史文爲綱，歷引羣書於下，間作案語以斷之，成遼史拾遺十卷。於遼一代二百年事，凡有可攷見者，粲然具備。蓋亦正史外所不可少之書。又仿計敏夫唐詩紀事例，成宋詩紀事一百卷。並號賅博。詩才清逸，有樊榭山房集二十卷。餘有秋林琴雅六卷，南宋院思錄八卷，東城雜記二卷，增修雲林寺志八卷，湖船錄一卷，均梓行。

沈炳震 附叔弟炳巽

沈炳震字寅馭，自號東甫，浙江歸安人。少卽淬厲於學。補諸生後，日有名。省試八不遇，遂謝舉子業，專肆志於攷古。好涉覽紀傳年月世系。他人所不經意者，必默識之。及長，才益閎雅。卽新舊唐書同異加以詳審，成合鈔二百六十卷。其書分爲綱目。如本紀列傳以舊書爲綱，分注新書爲目；諸志舊書多闕略舛錯，則以新書爲綱，仍分注舊書爲目。而莫善於訂正宰相世系表之譌謬。補列拜罷承襲諸條；積數十寒暑始竣。蔚爲鉅觀。錢侍郎陳羣見而驚歎，因語詹事王奕清，舉應博學宏詞科，復不遇。歸二歲卒，年五十九。後陳羣終錄其書進御，高宗覽之嘉賞，付詞館采取。館員適校唐書，卽引據議論之精粹者入考證中，旨以爲允，刊刻內府，頒布天下。鬱於生前，而褒於身後，士論榮之。

此外九經辨字讀蒙十二卷，——一校正九經文字，二經典重文，三經無重文，四經典傳譌，五經典傳異，六經典通借，七先儒異讀，八通音異義，九異音異義，十注解傳

述人。——則小學之膏粱也。廿一史四譜五十四卷，其體蓋出於表曆之流，而變其旁行斜上者爲標目，舉帝紀之凡，撮世家列傳載紀之要，類聚區分，合乎書志薈萃羣言之法，亦三通之羽翼也。其餘尙有歷代帝系紀元歌一卷，沈氏族譜三十二卷，井魚聽編十六卷，唐詩金粉十卷，增默齋詩八卷，雜著十卷。

(附) 叔弟炳巽字繹旃，著水經注集釋訂譌一書，凡從前篇簡脫漏，文字躑躅，首尾顛躓，句讀轉易者，一一正之，復還道元之舊觀。時大典本未出，雖不能如趙戴二家之精，全榭山氏則亦嘗取資於是。且其發端，本出東甫，繹旃實竟其緒。篤學嗜古之勤，終不可沒焉。

劉鳳誥

劉鳳誥字金門，江西萍鄉人。乾隆己酉，一甲三名進士。授編修，擢侍讀學士。累遷

至吏部右侍郎。疊充嘉慶庚申、辛酉、丁卯、湖北、山東、江南、鄉試正考官。兩放廣西、山東學政。少有才譽，爲文章，富詞藻。既久在翰林，一切應奉經進文字，多出其手。自高宗實錄館纂修官，升總纂，至副總裁。雖擢侍郎，仍命兼辦館事。俟畫一事竣，再理部務。中間并偕恩普等修輯官史。蓋知其熟於掌故，秉筆之任，深倚畀焉。實錄告成，敍勞加太子少保銜。尋簡浙江學政。以縱酒放誕，爲御史所糾，得旨查勘並未受賄，究不應聽囑徇情，著遣戍黑龍江。十八年賜環，旋賞復編修。道光元年，請病假歸。庚寅卒於家。

公爲彭文勤入室弟子。初，文勤創五代史記補注，得徐章仲本，僅帝紀十二卷。乃採薛史原文，補歐書之不足；其餘羣籍，取材一以宋人爲斷。久之，亦止成諸帝家人傳至六臣傳十六卷，而尙有五十八卷，草稿雖集，未遑釐定。特出所詮釋，傾篋相付，令排比而次第之。迨公按魏博，又獲朱竹垞注本，凡千七百餘條，亟馳報文勤，已薨於位，不及見矣。嗣使浙，徧搜文瀾閣書，一一詳校，排次粗竟，緣被譴中輟。比返京師，重加訂補，

前後凡三易稿，始付寫官。大抵自薛史外，王傳會要，冊府元龜，幾於備錄；而更參諸公私傳記，旁及金石文章，稗官小說，以訂正訛異，辨別是非，傳所有之事之人，俾詳委曲，而核生平；傳所無之事之人，庶補缺遺，而徵同類。擬諸裴松之之注三國，蓋鮮媿色。或謂本出文勤，且俞理初實董其役。然則宋元通鑒因於憺園，成於二雲，終不得不歸美秋帆，何獨致疑於公乎？

趙翼

趙翼字耘松，號甄北，江蘇陽湖人。十二歲爲制舉文，一日能成七藝，人皆奇之。十九補博士弟子。游學都門，才名動輦下。劉文正公延至家，纂修官史。復以直隸商籍入學，中乾隆庚午科北榜舉人。已而選用內閣中書，入直軍機。尹文端公傳文忠公咸倚重之。其扈從行在，或伏地草奏，下筆千言，文不加點，一切應奉文字，幾非君不辦。

辛巳成進士。殿試擬第一，高宗以清代陝西未有元，因取第三，卷互易，卽王文端也。授翰林院編修。丙戌，出任廣西鎮安知府。地固邊徼，雖民淳訟簡，而倉穀出入，吏緣爲姦；爲痛革其弊，民大悅服。尋奉特旨，令赴滇參軍事。說經略大兵欲渡戛鳩河，則偏師宜由蠻暮老官屯進。庶兩軍可互爲聲援。功卒以濟。越歲，調守廣州。獲海盜一百八人，按律皆當死，乃條別其輕重，戮其魁，餘多遣戍。未幾，擢貴西兵備道。坐廣州他讞事，部議降級，當路將奏留，以母老力辭。歸里侍養者五年，暨終制，遂不復出。

丁未，閩督李侍堯征臺灣，道常州，邀往贊畫。李素精嚴，君則濟以寬大。時兵將雲集，羣謂不日蕩平，君獨難之，亟請密調粵兵爲備。及兵敗，李乃服其先見。事平，欲奏起，仍堅辭。

既歸，復以著述自娛。主講安定書院。往來常蘇間，所至名流傾倒，傳寫詩篇，江左紙貴。與錢塘袁枚鉛山蔣士銓齊名，如唐之「元白」。而君高才博物，既歷清要，通達

朝章國典，尤邃於史學，非袁蔣所及也。

家居數十年，手不釋卷。所撰廿二史劄記三十六卷，鈎稽同異，屬辭比事；其於前代弊政，一篇之中三致意焉。又撰陔餘叢考四十三卷，簷曝雜記六卷，雖未逮日知養心，并足爲多聞之助。其餘皇朝武功紀盛四卷，亦徵史才。所爲詩，無不如人意所欲出，不拘唐宋格律，自成一家。有集五十三卷。又唐宋十家詩話十二卷。嘉慶庚午，重赴鹿鳴宴，賜三品冠服。卒年八十八。

錢塘梁氏兄弟傳 玉繩 履繩

梁玉繩字暉北，號諫庵。浙江錢塘人。家世顯貴，祖父皆名宦。叔山舟侍講尤知名。雖僅諸生，以出自名門，濡染家學，更能下帷鍵戶，默而澁思。於史漢兩書，尤所專精。致力。謂龍門史記百卅篇，自少孫補綴，正文漸淆；其後元后之詔，揚雄班固之語，代有竄

入；又易「今上」爲孝武，彌失本真。今所傳裴張司馬三家解，文字不無互異，傳寫鏤刻，譌躋滋多，校讎既艱，治鮮善本。乃采舊說，博搜名儒所論，兼下己意，從事幾二十年，作史記志疑三十六卷，俱摘取正文，分條詳攷，據經傳以駁乖違，參班荀以究同異；凡文有差譌，注近附會，一一析而辨之；甄綜探討，實事求是。確能於三氏外自成一家之言。惟尙書說未克以古義證明，小疵固不足掩大醇也。

又以孟堅古今人名表創例也，徒因劉子元鄭漁仲等競相彈射，故欽玩者鮮；實則褒貶進退，史官之職，廣徵典籍，蒐列近二千人，大都彰善戒惡，準古鑒今，非苟作者；獨至定以三科，區分尙易，別爲九品，確當良難，毫釐之差，誠所不免。况屢經傳寫，紊脫尤繁。如原序有「崇侯」，張晏注有「嫪毐」，宋重修廣韻有「公幹士恩癸」，通志氏族略有「司褐物」之類，均此疏漏。史通引陽處父在四等，士會高漸離五等，鄧三甥荆軻六等，鄧祁侯秦舞陽七等，亦與今書異次。乃作古今人表攷九卷，讎勘各本，摭

撫羣編，缺不敢強補，誤不敢孤證。其審慎若此。

尚有警記七卷，呂子校補二卷，元號略四卷，誌銘廣例二卷，蛻稿四卷。子學昌并
入表攷彙刊爲清白士集。史記志疑則先刊單行。

弟履繩字處素。善讀書，既擷其英，並正其誤，與兄曜北互相礪錯。一時有「元方
季方」之目。當家門鼎盛，設以常人處之，不爲裙屐風流，則甚至日徵逐於飲食遊戲，
不知文字之樂者比比然矣；君獨樸嗇類寒士，衣不求新，出或徒步，不以所能病人，不
以所不知愧人，博學而能孱守之，以故不涉於愛憎之口。乾隆戊申舉本省鄉試，再上
春官，不遇，歸途風日燥烈，塵埃漲天，熱氣中人毒甚；歸後，因葬父在山閱月，秋寒所襲，
受病遂深，疾遽作，未幾卒。年甫四十有六。溯其先世，早用學問文章照耀海內，乃益克
自奮厲，繼承祖武。於衆經中尤精左氏傳。蓋其舅氏元和陳樹華著有春秋內外傳攷

證，君更彙輯諸家之說而折其中，疏爲三編。曜北整理遺稿，定名左通補釋，凡三十二卷。詩清新越俗，兄弟暨所親倡和，刻有梅竹聯吟集。書法雖不名家，亦端謹弗苟，如其爲人。

陽湖洪氏兄弟傳 飴孫 麟孫

洪飴孫字孟慈，又字祐甫，稚存先生長子。幼承家學，沈敏嗜讀。每旬月不出，朋友過其齋，搜索案頭，積稿已盈寸矣。中嘉慶戊午鄉試。四上春官，報罷。用薦卷挑取國史館謄錄，非其志也。期滿，選授湖北東湖知縣，在任有惠政，甫八閱月遽卒，年四十四。

體氣素壯盛，耐勞苦。值其發憤，窮日夜無倦容。徒步日可百里。擇交至嚴，不能爲唯阿。志合者，傾倒如弗及。短命而歿，聞者哀之。李兆洛求其遺書，得所撰世本輯補十卷，三國職官表三卷，史目表三卷，毘陵藝文志四卷，青埭山人詩十卷。尙有漢書藝文

志考，隋書經籍志考，諸史考略，世本識餘，等各數十卷。均未成。世本輯補，以近世治世本學者雖頗衆，然率採摭殘碎，約略編次，雜而不貫，爲鈎稽義類，釐譌補闕，期得復還舊觀。故用力甚勤，至有裨於承學之士。初以付江都秦氏嘉謨刊之，秦遂分爲三大卷。又於序中竄入數語，而冒用己名。李兆洛既爲刻職官史目兩表，復作是書，跋以辨之。毘陵藝文志則前無所因，而上采諸史，下考郡邑志傳，旁徵諸家書目及所收藏，彙成一編，應廬抱經主修郡志所纂稿也。亦未刊行。

麟孫後改名惠方，字子齡，爲稚存幼子。沈敏嗜學，能繼父業。中式道光己寅科舉人，官廣東鎮平縣知縣。以稚存曾有疆域志之作，乃仿其例，撰補梁疆域志四卷，其間虛名實土，與夫一名二地，或二地一名，亦既如前書，莫不明是非，別同異，而復州詳置治之所，縣列因革之文，名山大川，舊關重鎮，館殿臺閣，宮闕園陵，咸爲搜輯，俾擴後人

之聞見，則前書所無也。

又撰漢魏六朝隋唐地理書目攷證，分十六門：——一，星野；二，詁經；三，述古；四，一統；五，都邑；六，州郡；七，山川；八，城郭；九，宮殿；十，廟冢；十一，道里；十二，故事；十三，風土；十四，物產；十五，外域；十六，總集。——詳述源流，輔以援引，較章氏之攷隋書，殆有過之。惜遺書藏於家，未克整理付梓。詩文守其家法，尤工儷偶，有淳則齋駢文若干卷。

沈欽韓

沈欽韓字文起，號小宛，江蘇吳縣人。資秉極敏，而勤學甚至。家綦貧，書值千錢，卽無力購致，假之藏書家，計日以還，輒寫其要，遂淹通羣經。尤長禮與春秋，熟於諸史志，旁及百家，故記官書，野乘，古今專集，彙纂，類鈔，劄記，究其條緒，悉歸於統。故所爲制舉文，沈博怪瑋，常人不能解。年逾三十，始爲諸生。嘉慶丁卯舉於鄉。屢躋會試。道光壬午，

選授安徽寧國縣訓導。卒年五十七。

先生少時，念漢書深博，顏注淺陋；章懷後漢書注，雜出衆手，純駁互見；劉氏注司馬八志，雖宏富而少統貫，尤疎於地理；乃遠搜故籍，覃思幾二十年，爲兩漢書疏證七十四卷，共二百餘萬言。不但正譌補闕，尤能詳陳得失，考論制度。又爲左氏傳補注十二卷，考異十卷，正杜氏之大失，闢衆家之淆亂。又以裴氏三國志注專在補其事蹟，典章名物轉略焉，爲補訓故八卷，釋地理八卷。又以地理之學，古書唯存酈注水經，而戴東原短在憑臆，趙誠夫苟於輕信，至如舊籍之有足互證與近今志乘之目驗可據者，反皆蒐討未逮，爲水經注疏證四十卷。又以一代鉅公詩文，非曉然於其朝章事實，則不能得作者用心之所在。韓王諸集，宋人作注，空疏漏闕者尙多；爲韓昌黎集補注四十卷。王荆公詩集補注，文集注，范石湖詩集注，共若干卷。凡所注，率先寫於書，上下左右，幾無間隙，乃錄爲初稿；久之增刪復錄爲再稿。每一書成，稿輒三四易。他若陳祥道

禮書，王施查三家蘇詩注，王昶金石萃編，隨手糾繆，積成卷帙。又節錄太平御覽，雲笈七籤，法苑珠林，較原書十存二三，而菁英悉萃焉。自著幼學堂詩集十七卷，文集八卷。總其撰述，蓋五百萬言。遺稿歸泰峯郁氏。惟兩漢書疏證僅獲梓行。

梁章鉅

梁章鉅號荳林，福建長樂人。乾隆甲寅，舉本省鄉試。嘉慶壬戌成進士。由庶吉士改禮部主事，充軍機章京，轉員外郎，簡湖北荊州知府，升江南淮海道，兩署按察使，補山東按察使，兼署布政使。先是制河，二大府銳意興作，議挑關孟兩灘，開王營減壩，又議改上游海口；公深悉情弊，上書力陳其不可，以去就爭，事遂寢，全活甚衆。尋遷江蘇布政使。爲政務持大體，不以科條擾民。擢廣西巡撫。道光辛丑，再調江蘇。值英人犯江浙，蒞任數日，卽赴上海防堵，練兵簡械，力持鎮靜，敵訶知避去，後遂逞志於浙省，督臣

裕謙死難，命署兩江總督。公以身膺重任，無敢暇逸，晝治官書，夜輒出巡河干，閱視諸軍，因勞疾作，請開缺，卒於家。

公敷歷中外，垂四十年。居官之餘，不廢著述。於經有論語旁證二十卷，孟子旁證十四卷，夏小正通釋四卷。於小學有倉頡篇校證三卷。於史有三國志旁證二十四卷。於掌故有國朝臣工言行記十二卷，樞垣紀略十六卷，春曹題名錄六卷，南省公餘錄八卷。於攷據有稱謂拾遺十卷。於文章有文選旁證四十六卷。其餘詩文雜著纂輯者不下數十種。而裴注三國，李注文選，已極賅洽，尙能詳徵博引，兼訂正其闕失，尤心力所萃云。

周壽昌

周壽昌字應甫，一字苻農，晚號自菴，湖南長沙人。生有異稟，在襁褓聞書聲輒歡。

躍稍長，舉止若成人。經史過目成誦。年十八，補縣學生。父卒於官，鬻產携一老僕匍匐千餘里奉喪歸。服闋，益肆力於詩古文詞。時湘中大吏，如中丞吳榮光，方伯王藻，率以宏獎風流爲己任，咸偉視之。咸豐壬子，中順天鄉試，聯捷成進士，入翰林，授職編修。累官至侍讀學士，兩署戶部侍郎。以足疾予告。日用著述自娛。卒年七十一。

先生充講官時，嘗疏劾督師賽尙阿逗留不戰，并條陳討賊八事，一時欽其敢言。厥後數上封事，雖召對稱旨，然終以論列切直，遭世所忌。丁母憂在籍，曾文正治師湖北，擬奏請襄贛軍事，有毀之者，輒寢。故中興湘人多以功名顯，先生獨迴翔詞苑，幾數十年，未始非婞直所致。顧才名徹中外，高麗相國李裕元乞爲作嘉梧室記，侍讀閔翰山亦丐其訂正詩集。

平生無書不讀，尤癖嗜班史，手自丹黃，書眉行間，塗識殆徧。校補顏注稿凡十七易，成書五十六卷。復撰後漢書注補正八卷，三國志注證遺四卷，五代史證纂誤補續

一卷，皆有裨於史學。思益堂日札六十卷，考訂羣籍，纂述舊聞，在夢溪容齋之間。其他所著，有思益堂文集十卷，詩集二十卷，詩餘四卷，輯歷代宮闈文選十卷，并行於世。

番禺侯氏兄弟傳 康 度

侯康字君模，原名廷楷。廣東番禺人。祖籍江蘇無錫。幼孤好學，喜讀史。家貧無書，母張爲稱貸得錢買十七史，讀之久，卷帙皆敝。愛南北朝諸史，所載文章，爲文輒效其體。阮文達督粵，開學海堂課士，賞其文，由是知名。

後益研精注疏，盡通諸經。好左氏傳，欲著書以申杜解，未成。治穀梁傳，考其涉於禮者，爲穀梁禮證。又考漢魏六朝禮儀，貫串三禮，著書數十篇。其餘羣經小學，皆有論說，多前儒所未及。

尤深史學，正史之外，旁搜羣籍，仿裴松之注三國志例，注隋以前諸史。自負勝於

李氏南北史合鈔，堪與梅氏算書，顧氏讀史方輿紀要稱鼎足。嘗曰：『注史與修史異，注古史與注近史又異。史例貴嚴，史注宜博。注近史者，羣書大備；注古史者，遺籍罕存。當日爲唾棄之餘，今日皆見聞之助，宜過而存之。』爲後漢書補注續一卷，以惠定宇曾補之，故稱「續」。又三國志補注一卷，則以杭大宗雖補而不完善，故不稱「續」。又以隋以前古書多亡，著書者多湮沒不彰，補撰後漢、三國、晉、宋、齊、梁、陳、北齊、周、魏十書藝文志而自注之。後漢三國成經史子三部，餘未成。

爲人孝友惇篤，性兼狂狷，質直疏易。喜飲酒，招呼朋好，諧謔間作，不治家人生產，惟以授徒自給。以優貢生中道光乙未科舉人。會試歸，發病，逾年卒。年四十。

* * * * *

弟度字子琴，原名廷椿。少貧困，傭書於外，夜歸，燈下讀書，兒女雞犬環繞之，不顧。年三十七，始爲縣學生員，與兄康同年舉鄉試。道光二十四年，大挑一等，試用知縣，分

發廣西，署河池州牧。例有饋禮於上官，獨不饋，知府銜之。廣西賊起，河池州居萬山中，無城郭，先生伐木爲柵，因山勢聯絡，堅固可守。又使民十家爲牌，民有從賊者，仿趙廣漢鋤筭法，使良民告姦民，十得六七。南丹土知州差役莫應和以事被拘，上官命先生鞠之，得實，將治其罪。時巡撫鄒鳴鶴命民團練，應和訴於府，謂出家財團練，而知州索賄。知府稟巡撫，巡撫奏之；既審其誣，猶回護前奏，罰先生俸。賊攻桂林，巡撫命先生守城，宿堞旁數月。賊退，又命至梧州辦鹽事。遂告病歸。甫至家，病卒。時咸豐五年五月，年五十七。

爲人靜樸和厚，經傳貫洽，尤長於禮。自大挑後，志在吏治，常讀諸史循吏傳及兵書。又以世風衰壞，采古書名言爲一編，曰述古軒家訓，在梧州爲賊所焚；其副本在番禺志書局，爲夷寇所焚，遂無傳焉。所著說經文，刻於學海堂集。又通算學，所著書亦散失。

章宗源

章宗源字逢之，浙江山陰人。少聰穎，不喜爲時文，以兄宗瀛編修官京師，遂入大

興籍。用對策詳贍，中乾隆丙午科舉人。適都門廣慧寺有妖僧明心者，逞符蠱誑人，京朝官多深信之，益豪橫擅威福，事敗，罪遣歸南中。宗源等以佞佛與牽連，罷斥不聽會試。既坐誑誤，猶長齋蔬食終其身。嘗寓書孫星衍，屬去所爲三教論，孫非笑之，不爲怪。

初，博覽羣書，積十餘年，采獲經史傳注，輯錄唐宋已來亡佚古書，盈數篋。自言：『欲撰隋書經籍志攷證，書成後，此皆糟粕，可鬻之。』然編次成帙，悉枕中秘本也。又言：

『輯書雖不由性靈，而學問日以進，吾爲此事久之，亦能爲古文爲駢體文矣。』又以今世所存古書版本多經宋明人刪改，每恨曩時輯錄已佚之書不錄，見存諸書訂正異同文字，當補成之。其已輯各書，編就者皆爲之序，通知作者體例曲折，詞旨明暢。蓋

古書多亡於北宋，故輯佚始於王應麟，清代惠棟踵爲之。嗣纂四庫全書，卽用其法，多從永樂大典寫錄編次，流布甚夥，究未若宗源之無書不具焉。

隋志考證刊於湖北書局者，僅存史部十三卷。其餘及雜文若干卷并不傳。或謂歷城馬氏所輯玉函山房叢書悉出章宗源輯稿，然少確證，亦學術界之一疑案云。

周嘉猷

周嘉猷號兩陞，浙江錢塘人。乾隆中成進士。選授知縣，分發山東，歷官青城益都等縣。在任十餘年，仕優而不廢學，時與名士李文藻楊峒輩爲文酒之會。嘗覽史至南北分統之際，覺不列年爲表，則無以知其時世之所值，以致其朝聘征伐之由。爰自魏登國元年丙戌，至隋皇泰二年己卯，凡二百三十四年，撰成南北史表五卷。首爲年表一卷，以紀八代崖略；次帝王世系表一卷，又次爲世系表一卷，以紀臣工世系。旁行斜

上，朗若列眉。復仿世說例，排纂南北史事，成南北史摭華八卷，足繼臨川之書，與何元朗所補殊有「上下床」之別。曰「摭華」者，李延壽上書表云：『兼采八代，除其冗長，摭其精華。』故取以名之也。又著齊乘攷徵若干卷，并有關於掌故云。積勞卒於官。

顧懷三

顧懷三字秋碧，江蘇江寧人。少孤貧，母以十指課之讀，弗給，或丐食於鄰焉。用是讀益苦。稍長，以敏捷稱，才名滿江南北。嘗一日中爲長幅駢儷文三四首，洋洋數千言，華贍工整。至制舉文，一日更毋慮八九首。補歲貢生。治經通訓詁，尤擅長於史學。以司馬氏范氏書恆不志藝文，說者每引爲憾。乃竭十數年之力，旁搜博采，成補後漢書藝文志三十一卷，分二十九類，既逐條疏其出處，而如詩小序、書古文、鄭賈服諸儒所撰著之犖犖大者，辨證加詳；凡羣書佚文有可考見，亦復輯載無遺。末附經學師承及明

習識緯兩門，較儒林傳所載尤多倍蓰，迥非錢侯姚等補志所能望其項背。清河王氏獲手稿，亟排印於小方壺齋叢書。別有補五代史藝文志，僅一卷，且考釋無多，或非其定本也。其他著述甚衆。子聯鑣避亂走淮上，依丁柘塘，全稿爲所剽竊，取出者止十一二。王氏復刊其輯通俗文佚文一卷，風俗通義佚文一卷，而然松閣賦鈔詩鈔若干卷，則收入金陵叢書。懷聲鬱旨，恆冠絕一時儕輩云。

汪遠孫

汪遠孫字久也，號小米，浙江錢塘人。十歲侍祖父受經通大義。嘉慶丙子舉於鄉，兩赴計偕，循例爲內閣中書。戊寅在京待銓，丁外艱，聞訃疾歸里。既摻大故，遂絕意進取，一惟肆力於著書。先世藏書之所曰「振綺堂」，插架夙多善本，遂寢饋其中，務爲根柢之學。排日讀十三經注疏，以心得者輒錄諸劄記。又嫌抱經賞釋文多譌缺，欲爲

補正，功雖未竟，其宗尙已可概見。春秋外傳國語自韋氏而外，古注多佚，因輯賈逵等三家佚注三卷，復作發正二十一卷，攷異四卷，以羽翼之。著述之暇，與同里耆彥結一東軒吟社，「優游暢吟，時更登山臨水，寄其曠逸之懷，乃自號曰「借閒漫士。」浙中志乘，推咸淳臨安志最古，爲重雕以廣其傳。他若厲樊榭遼史拾遺，東城雜記，梁處素左通補釋等，俱次第梓行。至其亡友詩文，代爲校刊者，尤難悉數。生平重然諾，見事明決，貧者感其施，饒裕者亦倚以定是非可否。卒年四十有三耳。所著尙有詩攷補遺，漢書地里志校勘記若干卷，借閒生詩詞四卷。——妻梁端，湯漱玉，并通詩禮。端字無非，著列女傳校注八卷。激玉著玉臺畫史五卷。

程恩澤

程恩澤字雲芬，號春海，安徽歙縣人。幼穎異，毀齒，經傳皆成誦。鄉先達曹文敏公，

金輔之殿撰，咸目爲偉器。少長從凌仲子先生遊，盡造其闡奧。嘉慶甲子，中鄉榜。居京師，勤於學，天算地志六書訓詁金石靡不精究。辛未，成進士，改庶吉士，散館，授編修。累遷至侍講學士，補國子監祭酒。以母憂歸。服闋，仍值南書房。游歷內閣學士，授工部右侍郎，轉戶部，充經筵講官。疊任四川廣東主攷，簡貴州湖南學政。一知貢舉。卒於位。

公學識超於時俗，官貴州時，重刊岳珂五經以訓士。奉詔刻春秋左氏傳，與祁文恭公共議，推本賈服，不專守杜氏一家之學。平日好士，說士技若已有。典試廣東，聞曾釗名，必欲得之；釗久丁憂，不知也。榜發，大失望。於阮文達爲再傳弟子，文達復入閣，猶以暇時相講習。

公嘗念近人治算由九章以通四元，可謂發明絕學，而儀器則罕有傳者；乃與里人鄭復先有修復古儀器之約。又頗深究開元占經，謂道光十五年木火同度，當有火災，人驗其言而躓之。

公著述多未成書，傳者惟國策地名考二十卷。如謂：「盟津在河北，非今孟津縣，亦非古河陽縣。」蒲反非舜都，乃衛蒲邑，以嘗入秦仍歸，故謂之蒲反。」諸條皆確不可易。阮文達序其書稱：「胡朏明禹貢錐指，全樹山地理志稽疑後，此其盛業矣！」蓋非虛言云。遺集六卷，刊粵雅堂叢書中。

徐文靖附陳逢衡

徐文靖字容尊，號位山，安徽當塗人。雍正癸卯，與任啓運、陳祖范同舉江南鄉試。主攷黃叔琳詫曰：「吾得三經師矣！」乾隆丙辰，舉博學宏詞，又舉經學，授翰林院檢討。

平居好尋究輿圖方志，以胡渭禹貢錐指雖著聞於一時，容有疎略之處，爲作會箋十四卷，期補正其闕失，頗多可取。又爲山河兩戒攷十四卷，使與會箋相輔，且旁探

山海經竹書紀年以考見古史地之源流沿革於竹書別成統箋十二卷，援引繁富，盧文弨序而行之。

治經初取漢魏諸家易說證朱子本義，作周易拾遺。嗣復推諸羣經，成經言拾遺十四卷。其鈔詩禮經論及攷辨子史說部，成管城碩記三十卷。全樹山先生稱其精博。嘗與語邵子三十宮說，引據殊賅博，質之曰：「君不讀擊壤集乎？」物外洞天三十六，都疑布在洛陽中，小車春暖秋涼日，一日祇能移一宮。」是非三十六宮之明文乎？天根月窟，老氏之微言也。三十六宮，圖經之洞天福地也；其必以復姤之說文之者，其猶參同必以乾坤坎離分氣值日而究之。參同契之用易，非聖人作易之旨也。」樹山大嘆服。因撰皇極經世考若干卷。併工詩，亦皆典雅可誦。

(附) 陳逢衡字履長，號穆堂，江蘇江都人。諸生。學長於考據，尤精古史。嘗著逸周書補注二十二卷，以盧抱經校本爲主，間與他本參訂；凡孔解所無，盧校之闕，全得其

通。首列敘略集說補遺，諸書誤引，則附錄卷末。又著竹書統箋五十卷，所引諸書，除經史外，及近儒著述，皆標明姓氏書目；若出自己見者，加「衡案」二字以別之；其有他書援引，而今本所無，共得一百二十條，則彙爲補遺二卷，更附輯瑣語數十則，師春一則，繳書一則。蓋初以孫徐兩家紀年箋注尙未精當，乃復重爲詮釋也。搜討雖繁，而不執一見；始因羣書訂紀年之訛，繼且因紀年證羣書之誤焉。此外尙有穆天子傳補正六卷，亦稱賅洽，與所爲讀騷樓詩初二集四卷合刊。

雷學淇

雷學淇字瞻叔，順天通州人。舉人。鐔子。嘉慶十九年進士，任山西和順縣知縣，貴州永從縣知縣，歷充丙子乙未同考官。鐔著有古經服緯，學淇承家教，好爲討論之學。每得一解，必求其會通，務於諸經之文無所抵忤；傳箋注疏，取舍多殊，但期於事理之

合雖前賢不讓也。嘗謂孟子先至梁，後至齊，以本書觀之甚明，而史記誤謂惠王立三十六年即卒，遂云三十五年孟子至梁，而以惠王改元後十六年爲襄王之世。若據竹書紀年，梁惠成王後元十五年，齊威王薨，十七年惠成王卒，是惠王後元十六年齊宣王始即位，則較然與孟子書適符。且竹書又稱梁惠會諸侯於徐州，改元稱王，故孟子呼之曰王。史記謂孟子至梁之二年，惠王卒，襄王立，雖質諸經文，宜若可信，但卒於改元後之十七年，非三十六年也。襄王既立，孟子見其不似人君，乃東至齊，據竹書又齊宣即位之二年也。梁至齊千數百里，故曰千里。若孟子先見宣王，由鄒之齊僅六百餘里，不得云千里矣。齊人取燕，孟子明言宣王時事。史記於齊失載悼子、侯剡二代，將威王之立皆移前二十二年，於齊人伐燕事不知折衷孟子，而年表謂在湣王十年，司馬溫公終求其說而不得，復將宣之即位移下十年以遷就孟子。自後說者迄無定論，亦據紀年，則伐燕在宣王七年，實周赧王之元年。凡孟子書所記古人年歲，以史記、漢書

之說推之皆不合者，以紀年推之無不合。更以竹書長麻推驗列宿之歲差，歷代之日蝕，自唐虞以來亦無有差忒焉。惟惜紀年一書，由五代以來，頗多殘闕，爰博攷隋唐以前諸書所徵引者，搜輯參證，經時九年，稍復舊觀，成書十四卷。又撰古經天象攷十二卷，圖說二卷，夏小正經傳攷二卷，本義四卷，亦蠶齋經義攷若干卷。

林春溥

林春溥字立源，號鑑堂，福建閩縣人，弱齡卽淹貫羣經。嘉慶戊午舉於鄉，壬戌成進士，改庶吉士，散館授編修。旋丁內艱歸，主講玉屏書院。丁丑還朝，派修國史。道光元年，充文淵閣校理。聞父疾，乞假終養，遂不復出。始受聘任南浦及鵝湖講席。後移鰲峯，十九年，以老辭。咸豐辛酉，大府奏請來歲重預瓊林宴，得旨賞加四品卿銜，而先已捐館。卒年八十七。

先生治學，以守約爲宗，以實事求是爲務。教人在敦本立品，衡文具藻鑑。凡四校京闈，所得多佳士。主鰲峯最久，匠成者不下數百輩。著述貫串百家，浩乎莫測其涯涘，而於古史尤精。所刻有竹柏山房十五種，爲開闢傳疑一卷，古史紀年十四卷，古史考年異同表二卷，武王克殷日記一卷，滅國五十考一卷，春秋經傳比事二十二卷，戰國紀年六卷，竹書紀年補證四卷，孔孟年表二卷，孔子世家補訂一卷，孟子列傳纂一卷，孟子外書補證一卷，四書拾遺五卷，古書拾遺四卷，開卷偶得十卷。其餘未刊者尙衆。

施國祁

施國祁字非熊，號北研，浙江烏程人。諸生。嗜學工詩古文，善填詞，尤孰於完顏國故。以金史號稱繁簡得中，究其實，蕪漏亦復不少，因擬補正之。徧覽羣書，有獲輒加紀錄，積二十餘年書成，名曰金史詳校。惟以卷帙繁重，乃列舉條目，凡關於辨體裁，攷事

實，訂字句，得其譌謬，衍脫顛倒諸處，共二百餘事，別鈔爲金源劄記二卷，又札一卷。復就全樹山與杭堇甫論金史之帖，各爲之答，以附於末。又出其緒餘，爲元遺山詩文集箋注若干卷，金源雜興詩一卷。

先生家極貧，少嘗授經於外。中年忽學市隱，寓北潯，爲人經理商業，設吉貝肆，中有小樓一，卽顏曰「吉貝居」。所著書多屬稿，於是間會不戒於火，著述悉付一炬。今所存者，大半出自記憶補綴，故現刊詳校止十卷，蓋非其初稿矣。卒年七十餘，無子。

地理學大師列傳第十六

敘目

研究經史，必明古今輿地。清初顧炎武、閻若璩、劉獻廷，尙矣。至胡渭著禹貢錐指、戴震著水地記、校水經注，而禹貢及水經二書更引起研究，遂多有專從事者焉。顧祖禹著讀史方輿紀要，言形勢阨塞略盡，尤爲極精博之地理書。故斯學大師，當推此六先生爲先導。

顧炎武 閻若璩 劉獻廷（并見先導大師列傳）

胡渭

顧祖禹附（黃儀）

戴震（見皖派經學大師列傳）

黃子鴻應
附于顧祖禹下
（太炎）

胡渭

胡渭初名渭生，字朏明，一字東樵，浙江德清人。先生年十二而孤，母沈攜之避寇山谷間，雖遭顛沛，猶手一編不輟。十五爲縣學生，試高等，充增生。屢赴行省試不售，乃入太學。嘗館益都馮相國邸，會開博學鴻詞科，相國欲以先生應，堅辭不肯就。羣公避嫌，以相國子師莫敢先發，及見薦牘無先生名，則又大驚。先生自是謝科舉，專窮經義。

徐學乾奉詔修一統志，開館洞庭山，延先生與閻若璩、黃儀、顧祖禹分郡纂輯，因得博觀天下郡國書。先生素習禹貢，謂漢唐二孔氏、宋蔡氏於地理多疏舛，如三江當主鄭康成說，庾仲初之言不可以釋禹貢，「浮於淮泗，達於河」，河當從說文作「荷」。「滎波既豬」，波當從鄭康成本作「播」。梁州之黑水與導川之黑水不可溷而爲一。乃博稽載籍及古今經解，考其同異而折衷之，依經爲訓，章別句從，名曰禹貢錐

指凡二十卷爲圖四十七篇。於九州山川形勢，及古今郡國分合同異，道里遠近夷險，犁然若聚米而畫沙也。漢唐以來，河道遷徙，雖非禹貢之舊，要爲民生國計所繫，故於導河一章，備考歷史決溢改流之跡，且爲圖以表之。

先生嘗謂詩、書、禮、春秋，皆不可無圖，惟易無所用圖，六十四卦，二體六爻之畫，卽其圖也。八卦之次序方位，則乾坤三索出震齊巽二章盡之矣，安得有先後天之別哉？河圖之象，自古無傳，何從擬議？洛書之文，見於洪範五行九宮，初不爲易而設。作易圖明辨十卷，又言洪範古聖所傳，漢儒專主災異，以瞽史矯誣之說，亂彝倫攸敘之經，害一。洛書本文具在洪範，宋儒剏爲黑白之點，方圓之體，九十之位，書也而變爲圖矣；且謂洪範之理通於易，劉牧以九爲河圖十爲洛書，蔡元定兩易其名，害二。洪範原無錯簡，後儒任意改竄，移「庶徵王省惟歲」以下爲五紀之傳，移「皇極斂時五福」至「作汝用咎」及「三德惟辟作福」以下爲五服六極之傳，害三。作洪範正論五卷。

又作大學翼真七卷。言經文「此謂知本」二句當在「止於信」之下。「知本」蓋「知止」之訛。「格物致知」與「至善」釋在邦畿章內，本無闕文，無待於補。

康熙四十三年，聖祖南巡，先生撰平成頌并禹貢錐指獻諸行在，有詔嘉獎，召至南書房值廬賜饌，賜御書詩扇，並御書「耆年篤學」四大字。五十三年正月卒，年八十有二。孫彥穎，官編修。彥昇，進士，由刑部主事改定陶知縣，著春秋說，四書近是，叢書要錄。於樂律尤有心得，著樂律表微八卷。

顧祖禹 附黃儀

顧祖禹字景范，無錫人。父柔謙，字剛中，精於史學，著山居贅論一書。先生少承家學，不專帖括，經史皆能背誦如流。爲人沈敏有大略，廉介樸厚，不求名於時。好遠遊，足跡遍天下，無所遇，歸而閉戶著讀史方輿紀要。首輿圖，次歷代州域形勢，次直隸十三

省封域山川險要，次川瀆異同，以天文分野終焉。全書共一百三十卷。凡職方廣輿諸書，承譌襲謬，皆一一駁正，悉據正史考訂折衷之。於山川形勢險要，古今用兵戰守攻取成敗得失之跡，皆有論證。雖荒僻幽仄之地，皆如目見而身履之。其論之最精者，謂：『天下之形勢，視乎建都；故邊與腹無定所，有在此爲要害，而彼爲散地；在彼爲散地，而此爲要害者。』又謂：『有根本之地，有起事之地。立本者必審天下之勢，而起事常不擇地。』先生爲此書，年二十九始屬稿，五十乃成，無一日中輟。自言：『舟車所經，必覽城郭，按山川，稽里道，問關津，以及商旅之子，征戍之夫，或與從容談論，考覈異同。』用力可謂勤矣！故讀其書，可以不出戶牖而周知天下之形勝。爲地理之學者，莫之或先焉。魏叔子稱其『深思遠識，在語言文字之外』，推爲數千年絕無僅有之書。非虛譽也。咸豐時，粵寇入吳，先生書已先言之，可不謂卓識哉！

(附)

黃儀字子鴻，江蘇常熟人。徐乾學開書局於洞庭東山，延君及顧景范闡百詩

胡朏明諸人佐編校。君博通羣籍，尤長輿地之學。嘗謂：班固地志所載諸川，第言其所出入，而中間經歷之地不可得而聞，惟水經注備具之。乃卽經所著之水，每水各爲一圖，如某水出某縣，向某方流，經某縣某方，至某縣，合某水，某縣入某水，無一不具。百詩見而歎曰：『酈道元千古以下第一知己也！』朏明撰禹貢錐指略例，頗以蔡氏書傳爲劣，君亦不信蔡傳。蔡傳『華容縣有夏水，首出於江，尾入於沔，亦謂之沱。』君言：『夏水從無沱稱，此沈之臆說耳。』朏明則曰：『此本鄭康成注，蓋此所謂沱也，見孔疏者，未爲臆說。今酈注夏水云：『江津豫章口東有中夏口，是夏水之首，江之汜也。』』計當南末蔡氏所見本，汜定作沱。何則？水自江出爲沱，此正夏水初分出江處也，於沱爲合。不然，水決復入爲汜，此非夏水至雲杜入沔處也，於汜爲不合。及檢朱謀煒箋，『江水至枝江縣曰江汜，汜當作沱。』何其實獲我心也！』君笑曰：『子於蔡氏可謂憎而知其善矣。』迨君卒後，所著書歸新城王氏書庫，趙東

潛猶及見之云。

地理學家列傳第十七

敘目

綜清一代地理學家：或詳沿革，或攷形勢，或志郡國，或疏水道，或列表，或繪圖，要不越乎域內。道咸而後，下逮同光，邊隅多事，海禁復開，學者漸留心於西北徼外輿地，及異國風土民情。徐星伯、張石洲、魏默深、輩實推傑出。而宜都楊守敬遠紹二顧全載之緒，其精審浩博，尤突過前人云。

陳芳績附徐文范

楊丕復

〔鄭元慶〕附董士錫

全祖望（見作史學家列傳）

趙一清

齊召南

鄭元慶行
水金鑑不
滅齊召南
之水道提
綱應捕人
（太炎）

洪亮吉（見吳派經學家列傳）

李兆洛

董祐誠（另詳厓算學家列傳）

師範

張澍

徐松

張穆

李文田

何秋濤

沈垚

魏源（見史學家列傳）

陳澧（見浙學派漢宋兼采經學家列傳）

汪士鐸

楊守敬

陳芳績 附徐文范

陳芳績字亮工，江蘇常熟人。生當明季，甲申國變後，卽棄舉業，隱居教徒，日以著述爲事，究心天文地理之學。既著天下郡縣輿圖復博觀二十一史，廣搜天下志乘，按其山川城郭形勢位置，究其歷代淵源，慨焉有志創輿地沿革表。以有虞之十二州，秦之四十郡，漢之千四百五十縣爲綱，而取漢以下諸史地志爲目，旁參唐宋以來輿地書及各省郡縣志經緯之，成書四十七卷。表分三等：曰部表，曰郡表，曰縣表。自古迄今，凡一郡一邑之置廢分併遷徙升降，雖在六朝之分裂，十國之割據，莫不博考詳稽，條分縷析，千枝萬葉，而使統歸一本，俾閱者開卷瞭然，搜古則知今，尋今則見古。凡說有不同者，皆明辨而備注之，庶後人不執兩端之惑；其未能確然者，兩存之，以俟將來。誠絕業也！初，其大父名梅，爲顧亭林所傾服，故少與亭林游，從有素，學具根柢，蓋基於此。

稿舊藏邑中屈氏，道光中，邑人黃廷鑑精加讎校，張大鏞爲刊之，始傳於世云。

(附)

徐文范字仲圃，江蘇嘉定人。與錢大昕友善。好學深思，專精地理，雖足跡不出里閭，而三條四列十道九域一一囊括於心胸。以兩唐兩宋之世，區宇混一，經緯秩如；卽三國之承漢，五代十國之承唐，封畛雖分，名實未改，稽古之彥，搜索匪難；獨與午渡江以後，開皇平陳以前，瓜剖豆分，蓋三十國南北僑置，千回百易，史之存者十家，而有志者才五；晉則但述太康，而不詳江左偏安之局；魏則祇舉武定，而反遺洛陽全盛之規；休文或失諸繁，輔機或嫌其略，子顯諛聞更無論矣；甚至杜佑李吉甫樂史輩於方輿之學最稱賅洽，而南北僑立之迹亦復十缺其九；乃上溯太安，下訖大業，以年爲經，以國爲緯，旁行書之；又以晉初所分之甘州爲其緯中之緯，下至煬帝罷州郡而止；先辨實土，附綴僑置，其間分列并合，參互錯綜，志有滲漏，則采紀傳以證之；作東晉南北朝輿地表二十四卷。書成，鈎稽毫髮，窮極幼眇，可稱傑構。

楊丕復

楊丕復字愚齋，湖南武陵人。嘉慶丁卯舉人，借補石門縣學訓導。生平著作甚富，要推歷代輿地沿革表一書稱最。嘗謂：『郡志沿革，名儒每不惜搜討以究今昔之異同，而其考據必以正史爲斷。顧讀史亦不易也。禹貢山川，左傳郡邑，注家已極聚訟紛紜。司馬八書，不載地理。獨班志可稱簡而詳。范書亦尙明確。陳壽三國志則徒爲紀傳而已。迨至南北朝，制作無章，十羊九牧，徒誇疆理之廣，不憚劃別之繁，以僞置而別實土，騁虛名而薄吏治。惟隋志能匯其總，兩漢後比較差善。二唐書雖翔核，其時更變頻仍，述之棼如亂絲。五代史太略。遼史尤舛。宋金尙無大謬。元史亦然。明史官修，於近代郡縣實爲完備。而明一統志草率成書，譌誤百出。顧氏方輿紀要，夙號精博，且尙多沿其失焉。以此讀史之餘，每卽諸地尋其因革，見後儒不無襲謬承訛之病，遂竭四載力，

製成斯表。又以山脉水道附於後。旁搜博采，不爲無稽之言。『凡曰總綱者四，分紀者三十六，共四十卷。他著有春秋經傳合編三十卷，辨疑二卷，朱子四書纂要四十卷，序說一卷。其春秋經傳合編，亦用綱目例，取經文爲綱，左傳爲目；先儒解說，則別爲書法翼之。更可徵君之於史學也深矣！』

鄭元慶 附董士錫

鄭元慶字子餘，一字芷畦，浙江歸安人。父駿聲，素治樸學，尤邃於易禮。元慶自幼卽傳其業，并通史傳，旁逮金石文字，覃思著述，期有用於世。當時如西河竹垞、東樵諸先生並折行輩與之交。康熙庚午秋試報罷，以貧故出遊四方，混迹幕府間，非其志也。丁丑食餼，尋以次貢入國子學，復病風而歸，遂不復出，竟齋志以終。儀封張清恪公欲薦未果。雍正乙卯，詔舉鴻博，乾隆中開三禮館，臨川李侍郎穆堂嘆曰：『如鄭芷畦之

博物通經，庶幾可應茲選，惜不幸死矣！

其著述甚富，曰廿一史約編者，乃最少之作，嗣深悔之。曰禮記集說參同八十卷，曰湖錄百二卷，曰石柱記箋釋五卷。曰行水金鑑百七十五卷，曰海運議一卷。卷帙未詳者：曰周禮集說，詩序傳同異，家禮經典參同，官禮經典參同，喪服古今異同攷，春王正月攷，湖州重賦攷。又有小谷口薈，今水學，兩河薛鏡，七省漕程，附見行水金鑑中。其禮記集說參同，續衛正叔之作，家禮經典參同，纂楊信齋之緒，亟爲全榭山所稱許。惜與周禮集說等遺編俱佚。石柱記箋釋，竹垞作序，亦欽其翔洽。湖錄卽湖州府志藁，訂補舊志缺失，參之廿一史，又採取徐獻忠以下諸家之書，更挾筆硯，徧遊七屬，訪問故家譜系，老成之士駁難辨正，雖膏火舟楫之費至耗其產弗顧也。歷八年，凡六易稿，始就。

行水金鑑代副使傅澤洪作，集古今之大成，自禹貢及諸經之注傳，列史之河渠

溝洫，山經地志，稗官小說，莫不撫採而條貫之。四瀆大川之外，若金沙瀾滄之荒遠，展卷按之，皆同指掌。而歷代疏濬之方，名臣儒者之奏議論說，悉囊括賅備。凡宣力河隍者，莫不奉爲圭臬云。

(附) 董士錫字晉卿，一字損甫，江蘇武進人。副榜貢生，候選直隸州州判。幼從大母

受孝經章句，及就外傳讀諸經史。悉能通解。年十六，從兩舅氏張皋文宛鄰遊，承其指授，古文賦詩詞皆精妙，而所受虞仲翔易義尤精。顧家貧，非客遊無以爲養。館於張古餘阮芸台方茶山洪石農諸處，率名公卿也。又歷主通州紫琅書院，揚州廣陵泰州兩書院講席，所至士皆慕而化之。李申者應聘修懷遠志，因事去，必待君藏其事，其傾服如此。道光辛巳，佐房師淮揚道蘇公墓。鄉試期迫，值蘇染時疫，或勸舍之而行，作色峻拒，卒留侍疾數閱月。南河總督黎襄勤公知君才，及是賢君之爲，延纂續行水金鑑。金鑑作於雍正間，歲久未輯。則以爲前作詳於考古，略於徵今，今續之

者宜詳於徵今，而略於考古。如永定河之工程，今增於古幾十倍矣，而前書未詳，尤宜備載。因草創數十條以上。公大嘆服。三載書未就，襄勤遽逝。繼任張公仍敦請纂修，而卒成之。自中歲左肘生瘤，治不獲效，其後竟以瘤敗致死。所著齊物論齋集二十三卷，內古賦二卷，包世臣至推爲獨絕往代。并殫心陰陽五行家言，溯原於易，成遁甲因是錄二卷。尙有遁甲通變錄，形氣正宗等稿藏于家。

趙一清

趙一清字誠夫，號東潛，詩人谷林之子。少學於全祖望。初祖望嘗以酈道元水經注傳寫譌謬，絕少善本，雅有志審正之，校七遍矣，未有卒業，及得先世舊聞，始知道元注中有注本雙行夾寫，今混作大字，幾不可辨。東潛因本其師說，辨驗文義，離析其注中之注，以大字細字分別書之，使語不相雜，而文仍相屬，如范成大作吳郡志，姚宏注

戰國策例，條理分明，朗若眉列。又據唐六典注稱桑欽所引「天下之水百十七，江河在焉」，今本僅存一百十六水，考崇文總自載「水經注三十五卷」，是宋代已佚其五，今本實後世割裂篇帙以合舊數，此二十一水蓋卽在所佚之中，爰取本注爲證，雜摭他籍，得滄洛、溥沱、派滋伊、灑澗、洛豐、涇汭、渠獲、洙滌、日南、羽黑、十八水於灑水下，分灑餘水，復鈎稽本經，知清濁漳水大小遼水皆原分爲二，共得二十一水，與六典原數相符，成水經注釋四十卷。考據訂補，頗極精核。更附刊誤十二卷，蓋據以校正者凡四十家。其中如二顧、二黃、閻諸本均未寫定，當祇就原稿彙錄，用力之勤如此。故博引旁徵，旣極淹貫，訂疑辨譌，是正良多，全後戴前，誠無媿獨樹一幟者。惟與戴氏注本頗有類似之處，致啓後人疑竇，聚訟紛紜，迄鮮定論。案東潛隱居草野，雖未得窺大典於中秘，而閉門造車，容竟合轍；東原入四庫館，見趙書每同大典，則但引大典作據，以並世之人，遂不別著趙名；正不足爲兩賢病也。

齊召南

齊召南字次風，號瓊臺，晚號息園，浙江天台人。幼有神童之目。十六補諸生。二十二，選拔貢成均。雍正七年，己酉科鄉試中副車。十一年，詔復詞科之制，總督學使以博學鴻詞薦。乾隆元年，召試於保和殿，欽定二等第八名，改翰林院庶吉士，充大清一統志纂修官，授檢討。四年，充武英殿校勘經史官，又充明鑑綱目館纂修官。累遷右春坊右中允，日講起居注官，侍讀學士，充大清會典續文獻通考纂修官，主順天鄉試，充會試同考官，擢內閣學士，禮部侍郎。旋充續文獻通考館副總裁，特旨勘定通禮。十四年四月，充冊封婉嬪副使。二十九日，自圓明園直上書房，歸澄懷園，甫及門，馬驚墮，觸大石，負重傷幾殆，上爲動容，賜藥，遣中官就寓探問，傳蒙古醫療治。既乞歸，高宗南巡，數召對，賞賚頻多。主敷文書院，上幸書院，制詩索和。三十二年，因族子周華黨呂留良遣

戍歸，刻其書呈於巡撫熊學鵬，並列召南十罪，學鵬上其書於朝，讞定，磔周華，其近族弟姪子孫論大辟者凡十人，召南逮至京，法司當召南徇隱之罪，而盡籍其產，後予革職，還其產之十三，旋卒。年六十六。

先生所著述：其在史局，則一統志中河南山東江蘇安徽福建雲南其所編輯。其外藩屬國向無底本，召南剏橐新撰也。明史綱目前紀二卷，神光熹三朝，召南所輯也。其分撰經史考證，經則尚書禮記春秋三傳，史則史記功臣侯表五卷，漢書百卷，後漢書郡國志五卷。隋書律厯天文五卷，舊唐書律厯天文二卷。嘗言：『酈氏之注水經，明於西北，而闇於東南，且域外之水道未詳。』因撰水道提綱三十卷，大而河海，小而溪澗，溯源窮委，一覽可悉。又有史漢功臣侯第考一卷，歷代常王表十三卷，後漢公卿表一卷，宋史目錄等，皆藏於家。

李兆洛

李兆洛字申耆，晚號養一老人，江蘇陽湖人。本姓王，明中世育於李，遂冒姓李氏。幼聰慧，好讀書，日能熟百餘行。廣頸深目，望之峻聳，若不可近，而就之和易。終日手口無停輟，而未嘗有疾言遽色。自乾隆中葉後，海內士大夫爭治訓詁音聲，先生獨治通鑑通考之學。疏通知遠，不囿小近，不趨聲氣。年甫三十，而學大成。

嘉慶甲子，以第一人舉於鄉。明年，成進士。授庶吉士，散館，選知縣，分四川告近，得安徽鳳臺縣。縣治與壽州同城，爲古南北用兵地，風氣犷悍，素號難理。蒞任，知故漢芍陂卽邑之焦岡湖，濱淮而環山，易爲旱潦，爲增隄防，設溝閘，督耕耘，民以有歲。邑多豪猾，爲逋盜藪者相望。常騎引健勇巡閭里，每出不意得其魁，率擇而撫用之，盜以斂戢。兵民爭樵牧地於城西湖下窪，爲白大府平亭其事。數載縣大治。暇日，詳利弊，稽古蹟，

考金石，手纂縣志十卷。先後在縣七年，以父憂去官。起服當赴選，乃恬退無宦情。惟一佐孫讓修懷遠志，未竟，巡撫康紹鏞固聘始往。適康調廣東，偕之行。嗣復隨康處揚州。作四方遊者數歲，節修脯所入，刻鄉先哲遺書十餘種。并纂駢體文鈔三十一卷，皇朝文典七十四卷。所至按其山川道理，士俗利病，文章典實，當道鉅公爭延致之，以爲重。既倦遊，主江陰暨陽書院講席。自是遂不復出。

所藏書，逾五萬卷。弟子日衆，分治天文輿地二業。康熙乾隆皇輿一統圖藏內府，民間不易得，晚始得董方立撫本，顧分四十一圖，大小爪離，不便披覽，且無歷代沿革，乃改爲總圖，每方百里，而以虛線存天度之經緯，先以朱印數十部，墨注古地名其上，起三代兩漢魏晉南北朝唐宋元明，檢各史地志，以沿革表及一統志覈其沿革，並得其實地而著之，爲歷代輿地沿革圖若干幅。別鈔各史地志，編以歸韻，既得實地，乃會前代郡縣注之韻下，爲歷代地理韻編二十卷。弟子徐思錯、宋景昌實襄其成。後又撰

皇朝輿地韻編二卷，歷代紀元編一卷。同治中，合肥李氏與一統圖刻於江寧，總顏曰：李氏五種者是也。

李銳有三統四分乾象三術注，欲推廣之，取歷代史中律厯志盡通其法，因事體重大，未能究業。乃先成地球及天文圖。地球以銅與木爲之，各一。懼學者不能明，乃爲文以釋之。星圖則依會典天文圖以視法變赤道爲直線，分十二宮爲十二圖，而別繪近南北極星爲圓圖列於前後，較之赤道南北分圖尤便覽，且較原圖補入增星推準度分，以便占天者之考察焉。平居不預官事，惟興水利，表忠節，則陳諸當事。凡主暨陽者二十年，年七十三卒。

所自撰書頗多未就，而勇於刊布前人遺著。首選弟子蔣彤爲年譜一卷，復述平日所聞，仿宋語錄，爲暨陽答問二卷。其養一齋文集二十六卷，則弟子高承鈺所輯。散軼者尙衆。

師 範

師範字端人，號荔扉，又號金華山樵。少卽博學，下筆千言立就。年二十一，以中本省鄉試第二名入都，諸先達鉅公雖咸嘆爲國士，卒不獲遇。僅挑補劍川學博。後以軍功保授望江縣知縣。時值西南用兵，軍事繁劇，州郡承應，恆懼不給，而先生以閒曹受當時知，委理州事，措施裕如，且出奇策濟餉，一時賴之。及蒞任，察奸靖慝，務除民害；復志在整飭風俗，敦禮節，興學校，士有長者，譽之如恐不及，歲損數百金資書院諸生，而時考其學之進退，親爲講論辨析，勤勤不倦。并搜刻望江先輩遺文，籍風後進。城內三十年末有通籍者，至是且相繼登選。惜以疾去官，未盡展其才，士民哀之。

先生生平慷慨有大節，重然諾。自幼儻多能，凡有關民生國計者，莫不考求實用。尤熟於水利邊防事宜，指陳古今，悉中利害。晚成演繫百卷，固爲研究西南輿地所

必不可少之書，更矐矐於表章遺逸，多足訂補史乘，蓋合亭林梨洲兩先生之才識爲一，非徒推方志善本已也。餘詩文集尙若干卷。

張澍

張澍字伯澗，自號介侯，甘肅武威人。九齡失母。讀書過目輒記，文章鉅麗，傾一時。乾隆甲寅中鄉榜，典試者得君驚嘆，目爲異人。年猶未弱冠也。性亢直，疾惡如仇。會試留京，因貧假館穀自給，主人有召優娛客或夜樗蒲者，輒譙讓怒去之。嘉慶己未成進士，入翰林，充實錄館纂修。比散館，改外，選黔之玉屏。未幾，引疾歸。數歲，起任四川屏山等縣。丁父憂，再起爲江西永新，署臨江通判，以緩漕免職。開復，補瀘溪，又丁繼母艱，不復出。凡作宰三十年，治事簡易而聰察，持法嚴，且剛介特立，論事屹然，不唯不阿。道光中，卒於家。

先生所學，長於考證輿地，以及姓氏譜牒。在黔，著續黔書八卷，文筆或少遜，精核蓋有過山蘊原書。在蜀，著蜀典十二卷，亦稱翔實。其五涼舊聞若干卷，則專紀鄉邦徵獻者也。復補輯漢皇德傳、魏周生烈子以下關隴著述十餘種，裒次諸葛忠武全集，暨選西人詩爲秦音若干卷。至撰姓氏五書，輯世本風俗通姓氏篇，用力尤深。自定詩集二十六卷，文集三十五卷。別有詩小序翼、三古人苑，與五涼舊聞、秦音俱未刊。

徐松

徐松字生伯，順天大興人。原籍上虞。幼隨宦京師，遂家焉。九歲入邑庠。嘉慶乙丑，以二甲第一人成進士，授編修。旋入值南書房。大學士董誥心重其淵雅，有儒才，一切應奉文字，率委之。會詔與纂輯唐文，因徧視四庫，讀未見書，并採輯永樂大典之能成卷帙者。己巳，典試湖南，坐事謫伊犁。將軍松筠素相知，以敕修新疆志，屬其親歷各城，

周咨彼中情事。於是足跡盡南北路。每攜開方小冊，置指南針，具記山川道里，下馬錄之。至郵舍，則進僕夫驛卒臺弁通事，一一與之質證。經年，風土備悉。乃援古證今，成書十二卷，有圖有敘，論山河之襟帶，城郭之控制，兵食財賦之儲積，田野畜牧之繁博，條分件系，詳核該洽。庚辰，賜還。道光改元，全書繕呈御覽。宣宗召見，奏對西陲情形甚悉。授官中書，并以其書付武英殿賜序刊行，名曰新疆識略。又撮其要領，作新疆南北路賦二章。自爲注記，詞旨華瞻。十六年，選禮部主事。尋擢御史，外放陝西榆林府知府。有政聲，轉延榆兵備道，量移潼商。未幾，致仕歸。年六十八卒。

先生生平研究經術，尤精史事。嗜讀新舊唐書。纂唐文時，於永樂大典中得河南志圖，亟爲摹鈔，采集金石傳記，合以程大昌李好文之長安圖，成唐兩京城坊考五卷。性復好鐘鼎碑碣文字，謂足資考證。於燉煌搜得唐索勳及李氏修功德兩碑，皆向來著錄家所無者。自塞外歸，名益噪，所交并當時賢豪之士。別撰有唐登科記考三十卷，

宋三司條例考若干卷，後漢書西域傳補注二卷，西域水道記五卷，長春真人西遊記考二卷。

張穆

張穆字誦風，初名瀛暹，一字石洲，山西平定州人。道光辛卯優貢，充白旗漢教習。生具異稟，於書無所不讀，才名藉甚。應京兆試，誤犯傷規被斥。自此遂絕意舉業，專志著述。祁文端典試江蘇，延入幕。阮元家居見其書歎曰：『二百年無此作也！』推爲碩儒。

其爲學，尤長地理。所著蒙古遊牧記十六卷，考據精確，以殫洽稱最。而延昌地形志，因魏收書乃東魏之志，與北魏無涉，讀水經注者，偶一援及，輒成歧誤。自來志家無此荒謬，爲博采旁稽，俾稍還元魏舊觀，僅于司州恆朔十二鎮三事，幾費三載之力，然

後得其梗概。其不斷自太和乃斷自延昌者，以魏孝文都洛陽，開拓土宇，至明帝熙平元年，凡州四十六，鎮十二，郡國二百八十九；元魏之盛，迨此而極。熙平乃宣武延昌四年後之一，故以延昌爲允綜全盛也。體例用酈注爲經，各地家言爲緯，考其興廢，訂其譌脫。他若古書金石遺文有涉及魏事者，亦詳采之。復有總圖，有各州郡圖，載于每卷之首；不但爲元魏一代地理專書，實足釋千古之疑，供讀水經者之門徑焉。惜止成十三卷，未卒業。

又撰顧亭林閩潛邱兩家年譜八卷。靈石楊氏刻連筠篴叢書，禮庀其事，爲校正元朝秘史，長春真人西遊記，等七種。又有烏齋詩文集若干卷。年四十五，卒于京師。

李文田

李文田字芍農，廣東順德人。咸豐己未進士，授職編修。放江蘇浙江四川主考，提

督江西順天學政。歷典文衡，尋命南書房行走，官至禮部右侍郎。操履端潔，學問淵博，治經由通變假借以考見名物度數，宗法鄭賈。與潘文勤過從雖密，而論學則異趣。蓋潘固張今文之職者也。時大興徐松，光澤何秋濤，平定張穆輩，盛爲西北地理之學。獨君以元秘史晚出，於蒙古立國疆域世系頗具梗概，乃廣搜紀載，兼采秦西譯籍，辨析訂證，作注十六卷。又以元史地理志成於倉卒，挂漏固自不免，經世大典所存之圖，亦多訛繆，更參稽舊牘，驗以今名，作元史地名攷十卷，西游錄注二卷。其間如辨天興爲合不罕紀年，阿勒台山卽杭愛山，兀察都故宮乃興和舊境之類，精確殊不在朔方備乘下。復採自唐以來和林一地殘碑斷碣，錄其原文，加以考釋，成和林金石錄一卷，附金石詩一卷，亦前人所未及焉。旁通堪輿，有疑龍擬龍經注各一卷。工書，摹北魏諸體，得其神似。

何秋濤

何秋濤字願船，福建光澤人。兒時能舉天下府廳州縣名，數其四境所至。道光癸卯舉於鄉，逾年成進士，授刑部主事。益廣交遊，博覽傳記，學乃大進。著律心一書，上自呂刑，下至當代律文，貫串一編。壽陽祁相國見而奇之。惜稟本爲人所竊，竟不獲傳。

時京師言宋學者：倭文端公、曾文正公、何文貞公、吳侍郎廷棟、邵員外懿辰、丁正中彥儔；言漢學者：何編修紹基、張州判穆、苗貢生夔，及鄉人陳御史慶鏞；言古文者：梅郎中曾亮、朱御史琦、王都御拯、馮按察志圻。君專漢學，而日處諸公間，未嘗以門戶標異。其於經史百家之詞，事物之理，攷證鈎析，務窮其原委，而要歸於實用。刑部奉勅撰律例根源，亦多君所手定。陳御史壇嘗得匿名書，法當燬，疑以質君，謂『軍國重計宜上聞』，援引故事，陳據之入告。凡通識類如此。

尤精輿地之學。以俄羅斯地居北徼，與我邊卡相近，著錄家雖事纂輯，未有專書；乃始爲彙編六卷，繼復增加詳攷，本欽定諸書及正史爲據，旁采圖理琛而下，以逮西洋艾儒略南懷仁輩各家論述，正其舛譌，去其荒謬，首列聖訓御書十二卷，次聖武述略六卷，次考二十四卷，傳六卷，紀事四卷，次攷辨合二十卷，次表七卷，末爲圖說一卷，總八十卷。尙書陳孚恩代爲進呈，文宗覽之，許爲學有根柢，賜名朔方備乘。命懋勤展行走。未幾以憂去。咸豐庚申，外寇入京師，書旋散亡。君亦窮困不自聊，客死於保定蓮池書院，年三十九。子芳稜賚殘稿謁李文忠公，文忠屬畿輔志局爲之理董校刊。

其餘著蒙古遊牧記補注四卷，周書王會篇箋釋三卷，一鐙精舍甲部彙八卷，校正元太祖親征錄一卷，均先後刊行。尙有篆隸源流，詩文集若干卷。

沈垚字效三，號子效，浙江烏程人。道光甲午優貢生。英姿卓犖，言論出人意料。工駢體文，經史子集罔不溯流探源。於三禮最深。尤精輿地之學。水經注、元和郡縣志，皆成誦，而融會貫通。大興徐松見其所著新疆私議，歎曰：『吾謫戍新疆，諸水道咸所目擊，猶歷數十年之久，始知曲折。』沈君閉戶家居，獨從故紙中搜得之，非具絕大識力，曷克臻此！乃爲之延譽公卿間。比貢入成均，侍郎姚元之延佐修國史地理志，復爲編修徐寶善補輯一統志新疆數冊，并撰道光九域志，大體粗具，書迄未成。松嘗攷元史西北地理，又欲注魏書地形志，并引垚爲助。

先生生平篤於友誼，輩朋有過，必正言規勸；有善，則稱道不置，相與敬而憚之。故人盛朝勳紀慶曾卒，縱窮困，歲恆寄錢卹兩家之孤。風義殊令人所罕見。在都六年，鬱悒遘瘵疾歿。年僅四十三。

遺文僅楊氏連筠篴叢書刻其四卷，蓋非全豹。邑人劉翰怡獲觀全稿，裒爲二十

四卷：一至三爲前集，首列六鎮釋，新疆私議；卷三爲漳北滷南諸水攷；四至六爲後集，凡論序、書啓、事略；二卷，西遊紀金山以東釋一卷；七至廿三爲外集，內地道記十卷，一卽九域志初稿——餘爲詩音攷、梁書釋官、後漢書注地名錄、水經注地名釋、校河南志、注西域小記等殘篇；二十四爲別集，後附補遺一卷。其少作臺灣鄭氏始末注四卷，則收入凌氏傳經堂叢書。

汪士鐸

汪士鐸字振庵，別字梅村，江蘇江甯人。道光庚子舉人。治學根柢經訓，以爲聖賢大道，有體有用。體原一貫，用則萬變。雖窮居於人鮮尺寸裨益，然不可不讀經世書，儲待他日用。從績溪胡培翬、荊谿任泰游。與楊大培同精三禮，時號「汪楊」。嘗據注疏、通典、及宋楊氏、元敖氏、清程瑤田、張惠言諸家說，作禮服記三篇。又取後漢諸書，成儀

禮鄭注今制疏證，培壘亟稱許之。并謂學者必先有得力之一書，而後能推類以概其餘。

先生覃精輿地，於水經注致力尤勤。自戴趙二家外，搜補疏櫛，釋以今地，而山川阨塞，陔地水利，特加詳盡。水經舊多佚文，趙補潔滄等十三水，以足一百三十七之數。先生謂：『潔水原附見，河水豐水見渭水注中，禹貢雍州兩見渭汭，猶言洛汭，水經敍於渭水末，則汭亦不當補。滄乃小水，不宜爲篇。止洛涇潯沱滄洛弱黑派滋各宜爲篇，合趙氏潔水，惟十九耳，是水經終不能全也。』因仿戴氏渭水南海陳氏溫水之例，訂正穀水江水若水沫水延江水存水溫水葉榆水夷水沅水資水湘水十二篇，期補所未備。水經注圖，蓋爲班志而作，爲讀唐以前古書所不可少者。

咸豐三年，粵寇陷金陵，僅以身免。南度嶺之績溪，居山間五年，空谷弦歌，講誦不絕。座主胡文忠公迎入鄂，時屬有裁兵議，上書推得失，文忠深納之。金陵既下，歸葺金

沙井老屋以居。杜門却掃，頤情典籍。曾文正以謂：『芳絜欲師陶靖節，湛冥略近蜀君平。』其推重其此。光緒中，學政黃體芳薦於朝，授國子監助教銜。卒年八十六。

著述有：水經注圖二卷，附漢志釋地略，漢志志疑各一卷，南北史補志十四卷，梅村文十三卷，詩十五卷，詞五卷，筆記六卷。別修江寧府志十五卷，上江兩縣志二十九卷，均刊行。

楊守敬

楊守敬字惺吾，晚號鄰蘇老人，湖北宜都人。家世業賈，自少時雖日在肆持籌握算，而夜間則誦讀弗輟。粵匪亂後，始應童子試。十九補諸生。同治壬戌舉鄉榜。兩赴禮闈報罷，攷取景山官學教習。暇日輒走海甸搜求古書以及碑版文字。期滿用教職。嗣是又數上春官，不售。武昌張裕釗薦任駐日欽使黎庶昌隨員。至東京，值日本維新伊

始，其國人唾棄舊學書，因以賤值得之。并爲黎校刻古逸叢書若干種，均宋元舊刻，或數百年之古鈔，爲此土所罕見者，擇名手影雕，士林咸珍異之。尋回國，選黃岡縣教諭，調黃州府教授，繼保知縣，加五品銜。張文襄督鄂，延爲兩湖書院暨勤成存古二學堂教習。光緒癸卯，開經濟特科，文襄奏舉先生名列第一。丙辰，選授安徽霍山縣知縣，未赴，仍請以內閣中書用。武漢起義，避兵之滬上。民國癸丑，袁世凱徵爲參政院參政。卒年七十六。

先生博聞強記，嗜古成癖。儲藏之富，當代罕儔。善攷證，精鑒別。於地理目錄金石之學特擅絕長，書法直逼漢魏。著述甚富。關於地理者：禹貢本義一卷，漢書地理志補校二卷，三國郡縣表補正八卷，隋書地理志考證八卷，古地理志輯本三十二卷，歷代輿地沿革險要圖若干卷，水經注疏八十卷，又要刪十二卷，補遺并續補六卷，水經注圖八卷。關於目錄者：日本訪書志十六卷，留眞譜初編十二卷，續編十二卷，叢書

舉要二十卷，隋書經籍志補證四卷，唐宋類書引用書目八卷。關於金石者：有三續寰宇訪碑錄十六卷，望堂金石初二集若干卷，寰宇貞石圖若干卷，楷法溯源十八卷，續十八卷，集帖目錄四十卷，評碑記二卷，評帖記二卷，鄰蘇老人手書題跋四卷，手書墓誌銘四卷。其他關於經史詩文書法者：有重訂說文古本考四卷，漢書二十四家古注輯存十二卷，補古今人表四卷，古詩輯存目錄十二卷，補嚴氏古文存二十卷，書學邇言一卷。尚有自撰雜文，曰明晦軒稿二卷，續稿十卷。惟水經注疏尤竭畢生之力。羅振玉推其糾正全戴趙三家之失，創獲真諦，可與王段之小學，李壬叔之算學，同爲千古絕業云。

金石學家列傳第十八

敘目

賞鑑家之於鼎彝碑版，僅視爲一種美術品而已；而在學者觀之，則舉足供經史證佐。自宋劉原父，歐陽修，呂大臨，趙明誠，洪景伯輩，倡之於前；至有清嘉道間，厥風益盛。沿及晚近，以石刻考辨今古文經字異同，用金文發明六書指要，甚且據古籀而難鄭鄘，遂卓然成爲專門之學矣。李陸兩氏所薈萃，太繁而不敘，乃擇其犖犖大者著於編：

顧炎武（見先導大師列傳）

葉奕苞

張 詔

吳玉搢

嚴長明 附子觀

錢大昕

附從子塘 坵
(見吳派經學大師列傳)

孫星衍

(見吳派經學家列傳)

邢澍

王昶 附陸耀遙 朱文藻

翁方綱

畢沅 阮元 (均另詳提倡樸學諸顯達列傳)

朱爲弼

吳榮光

嚴可均 桂馥 (并見小學家列傳)

馮登府（見皖派經學家列傳）

武億

趙紹祖

趙坦（見地理學家列傳）

張廷濟附張燕昌

瞿中溶

徐同柏附吳東發

劉喜海附金錫鬯

吳式芬

陳介祺

〔李佐賢〕附鮑康

李佐賢應
補入
（太炎）

金石學家列傳第十八

夏 荃

潘祖蔭（另詳提倡樸學諸顯達列傳）

吳大澂

吳 雲

王懿榮

楊守敬（見地理學家列傳）

繆荃孫（另詳校勘目錄學家列傳）

葉奕苞

葉奕苞字九來，江蘇崑山人。少師事葛芝、葉宏儒，務根柢之學。工詩，善書法。康熙戊午，舉博學鴻詞，罷歸。葺牛鹵園，與海內名流姜宸英、施閏章、陳維崧及同里歸莊輩流連觴詠於其間，文采輝映一時。嘗作太甲改元、周公居東周詩，用周正辨諸篇，皆穿穴經義，有裨學者。又偕盛符升等預修縣志，未竣而邑令董正位罷官，平居悉心採訪，別撰志稿二十二卷，隸事必求其實，家世必詳其源，爲他志所不及。尤酷嗜金石，始得墨榻數十通，卽思專爲一書以紹述宋趙明誠氏之金石錄，於是徧訪攷古家，徵集日富，久之，成金石錄補二十七卷，續跋七卷，所論多具獨見。時錢竹汀翁覃溪諸書未出，而搜羅廣博，上起峒嶼禹碑，訖宋周處臺記，辨證精核，殊不在兩家下。錢遵王讀書敏求記謂：『迥勝趙氏原本』，非過言也。末數卷復列攷異碑題立碑處存疑雜記五門。

足爲後來取法。

張 昭

張昭字力臣，江蘇山陽人。明崇禎中諸生。父致中，精小學，辨體審音，正訛釐謬，爲士林所宗仰。且收藏鼎彝碑版文甚富。力臣傳其家教，通經博古，專心六書，尤嗜金石文字，嘗躬歷焦山水澁，仰臥沙石，手拓瘞鶴銘，增多前人十餘字。又謁唐昭陵，遍拓從葬諸王公墓碑及六馬圖贊。過濟甯州，拓孔子廟五漢碑，皆加辨論，根據詳洽。雖以蠶廢，而攷證殊勤。後人哀其所著爲張亟齋遺集，以爲董覺遠黃伯思不是過也。與崑山顧亭林善，取鬻產之值爲刊廣韻及音學五書，手加校讎。亭林自敘五書後云：『余纂輯此書三十餘年，刊削數四，又得力臣爲攷說文，采玉篇，仿字樣，酌時宜，而手書之，鳩工淮上，不遠數千里，累書往復，必歸於是。』又與潘耒書云：『著述家最不利以未定

之書傳之於人。近日力臣來札五書，改正一二百處。』且居恆嘆曰：『篤信好古，吾不如張力臣！』其推服如此。晚歲徧游五嶽，悉爲之圖。書畫皆名家。

吳玉搢

吳玉搢字籍五，號山夫，江蘇山陽人。貢生。自幼卽好辨識古字。稍長，究心六書，博通羣籍，學有本源，旁及金石彝器，合同異之迹，析流傳之變，形聲旣明，訓詁斯定，因以攷證經傳，指摘謬訛，勒而成書，著說文引經攷二卷。雖不逮後來完備，實大輅之椎輪也。別雅五卷，取字體之假借通用者，依韻編之，各注所出，而爲之辨證，於攷古深爲有功。金石存十五卷，前爲篆書五十二種，後爲隸書六十八種，皆列其文於前，而解題於後，詳其出處，繫以時代。李氏函海刻此書，題仁和趙搢撰，誤矣。性喜游，嘗南浮大江，訪求疇人逸士，與涉歷山谷，探採古蹟，以證其所學。窮冬匹馬走塞上，登居庸關，所至就

成卒野人叩以山川阨塞，時徘徊叢莽落照中，竟日不食，人多怪之。復游京師，時翁覃溪朱竹君方以考據金石稱專家，聞山夫至，爭出所著以相質。秦蕙田纂五禮通攷，亦多出其手訂。晚得鳳陽訓導，久之告歸卒於家。

嚴長明 附子觀

嚴長明字冬友，號道甫，江蘇江甯人。幼穎敏，十行竝讀。既補諸生，學使夢侍郎以國士目之，知其貧，問所需，對曰：『貧乃士之常，聞廣陵馬氏多藏書，願得一席爲讀書計耳。』因薦諸運使廬雅雨，立延致之。是時，東南名士多假館馬氏齋，冬友虛心質難，相與上下其議論，遂博極羣書。乾隆壬午南巡，以獻賦召試，特賜舉人，授內閣中書。通古今，多智計，又工於奏牘。諸大臣劉文正公最奇其才。戶部奏天下雜項錢糧名目繁多，請併入地丁項下。乃言於文正曰：『今之雜項，古之正供也。今法折徵銀，若去其名，』

異日更有需用，必復加征，是使民重困也。』公曰：『不圖後生有此讜論！』卽令駁止之。旋薦入軍機辦事，前後凡七年。內值日久，諳悉典故，尤務持平允。一日，雲南糧道羅源浩坐分賠屬員虧銀迫限期將論死，時文正任會試考官，君搥鼓入闈，具牘請文正奏寬之，獲免。其年遂擢侍讀。其治事，衆中獨勤辨類如此。然用是頗見疾。後既連遭父母喪，服闋卽引疾不出。築室數楹，顏曰「歸求草堂」。藏書三萬卷，金石文字三千卷。或舉問，無不能對。爲詩文，用思周密，和易而當於情。畢中丞秋帆招遊秦中，得盡覽終南太華之勝，詩文並奇縱，所收金石刻益富。撰次西安府志八十卷，漢中府志四十卷，皆詳贍有法。嘗充平定準噶爾方略，通鑑輯覽，一統志，熱河志，四纂條官。兼通蒙古托忒唐古忒文，直經咒館，更正繙譯名義，蒙古源流諸書。晚爲廬江書院院長，卒年五十七。自著有毛詩地理疏證，三經答問，三史答問，西清備對，石經攷異，智白齋金石類籤，金石文字跋尾，漢金石例，五嶽貞珉攷，五陵金石志，石蹟表，吳興石蹟表，尊聞錄，獻徵

餘錄，五經算術補正，淮南天文太陽解，素靈發伏，養生家言，墨緣小錄，八表停雲錄，吳諧志，奇觚類聚，文選課讀，文選聲類，南宋文鑑，懷袖集，歸求草堂詩文集，凡二十餘種。

(附) 長子觀，字子進。太學生。能紹其家學，深造自得；於金石刻，殆廢寢忘食以求之。尤以金陵桑梓地，舊刻之湮沒者既不可考，乃訪其見在者拓而藏之。始漢迄元，依時代爲次，錄其全文，附以考證，合一府七縣，凡若干種。甚至窮鄉僻巷，古廟荒墳，莫不策蹇裹糧，手自椎搗。撰成江甯金石記八卷。復取求而未得者，爲江甯金石待訪目二卷，梓行於世。

邢澍

邢澍字雨民，號佺山，甘肅階州人。乾隆庚戌進士。歷充壬子、戊午、庚申、辛酉、鄉試同考官。任浙江永康、長興等縣知縣。精於決獄，發覆摘奸，莫不神效；而行政利人，所至

有青年之稱；故循聲卓著，爲上游所推重。尋署江西饒州府知府，遷南安府。精天文輿地之學，兼嗜金石。東南素號繁劇，蒞事數年，刑清政簡。乃以其暇，哀宋會要及金石劄記等書。又念關中自唐宋以來，疊經兵燹，昔賢述作，淪佚者衆；爰竭二年之力，精心搜采，爲全秦藝文志八十卷，始三代，迄明，分門別類，條舉遺逸，大致仿史志，而參經義考例。於金石，則劄記之外，既借孫星衍纂寶字訪碑錄，復據所見唐宋以前金石刻并宋元刊本隸釋隸續等編字體不同者，撰金石文字辨異十二卷。歸里後，沉靜寡營，但以著書自娛。詩文有守雅堂文集，南旋詩草。

王昶 附陸燿遒 朱文藻

王昶字德甫，號述庵，一字蘭泉，又字琴德，江蘇青浦人。少穎異，博學，善屬文。體貌修偉。年十八，應學使試，以第一入學。二十二，侍父疾，居喪盡禮服除，家益貧，作固窮賦。

以見志。遊吳下，蔣恭裴、楊繩武見先生詩文，謂：「宋文憲以後一人也！」肄業紫陽書院，時從惠定宇游，於是潛心經術，講求聲音訓詁之學。是時沈尙書歸愚爲院長，選蘭泉及王鳳喈、吳企晉、錢曉徵、趙升之、曹來殷、黃芳亭七人詩，稱爲「吳中七子」。流傳日本大學頭默真迦見而心折，附番舶上書於沈尙書，又每人各寄相憶詩一首，一時傳爲藝林盛事。

公以乾隆癸酉舉於鄉。甲戌成進士。歸選班。二十二年，南巡，召試一等第一，賜內閣中書，協辦侍讀，直軍機房，洊升刑部主事，員外郎，郎中。三十三年，以言兩淮鹽運提引事不密，罷職。時緬甸未靖，雲貴總督阿文成公請公佐軍事，遂至騰越，出銅壁關，擊賊江中，勝之，緬酋乞降。阿公屬公草檄允其降，班師旋永昌。緬甸久未至，復從阿公如騰越。三十六年，溫公福代阿公，移師四川，辦金川事，奉旨授吏部主事。從溫公西路軍進討，溫公屬公作檄斥僧克桑罪，三路進攻，克小金川。阿公奏公無兄弟，母年七十餘，

明大義，助以殫心軍事。今從軍五年矣。得旨升員外郎。三十八年，至當噶山，官軍且潰，警報絡繹，詔旨疊至，公力疾叱馬懸崖，日行數百里，夜治章奏文書，於礮火矢石之中，無誤無畏。小金川平，補員外郎，擢郎中。復從討大金川。四十一年，三路兵合攻益急，索諾木等率衆投罪，公草露布告捷。公在軍中，前後九年，每有所克，輒議敘，凡加軍功十三級，紀錄八次。凱旋之日，以戎服行禮，賜宴紫光閣，賞賚優渥。奉旨升鴻臚寺卿，賞戴花翎，在軍機處行走。秋，擢通政司副使。四十二年，擢大理寺卿。四十四年，乞歸，改葬父及嫡母。冬，授都察院左副都御史。四十五年，授江西按察使，六十餘日，決獄百餘案。秋，丁生母憂。服除，補直隸按察使，調陝西按察使。嚴緝盜犯。回逆田五倡亂，奉命備兵長武，公嚴守備，民以無恐。大兵過境，供應速而無誤。五十一年，授雲南布政使。雲南銅政繁，公盡發古籍，著銅政全書，示補救調劑之術。五十三年，調江西布政使。五十四年，擢刑部右侍郎。五十八年，乞歸修墓。冬，還京，以病乞休，上鑒其老，允之。諭以歲暮寒，俟春

融歸。明年歸，名其堂曰「春融堂」。嘉慶元年，以授受大典至京與千叟宴。四年，純皇帝升遐，復至京謁梓宮，蒙召見，勅建言，公密封以進，不留草。夏，歸青浦。分賻滇銅，鬻田宅以入官，居於廟廡，朋舊贈遺，盡以刻書。五年，年七十有七，重游泮宮。十一年，年八十有三，病甚，口授謝恩表，自定喪禮，囑阮元爲神道碑文。六月初七日，雞初鳴，公曰：『時至矣！』遂卒。

公之扈駕巡山東江浙也，古帝王聖賢名臣陵墓祠廟嘗分遣致祭。己卯、庚辰、壬午、順天鄉試，辛巳、癸未，會試，五爲同考官。壬子，主順天鄉試。皆以經術取士。士之出門下爲小門生及從游受業者二千餘人。又嘗主婁東敷文兩書院。欽定通鑑輯覽，同文志，大清一統志，續三通等書，奉敕與纂修事。又奉敕刪定三藏聖教經呪，編譯佛典，深於禪理者不及也。前後奉使鞫奏高郵州假印重徵，江陵縣偷減隄工等七案，公正研求，分別虛實。——高郵州案，巡撫府州並擬罪。隄工案，以知府草率捏飾，劾落其職。

公自弱冠時，卽嗜金石之學。及宦游所至，無不訪求。自三代至遼金，積千五百通，而甄錄之。著金石萃編一百六十卷。凡其文漫漶見於他書者，則爲旁注以記其全。篆隸及見古文別體者，摹其點畫，加以訓詁。卽題額陰兩側，亦必詳載碑製之長短寬博，取建初慮僂尺度其分寸，并志其行字之數。諸家題跋見於金石諸書文集者，悉著於編。金石之書，至此可謂集大成矣！其中以門人錢侗等所攷證者爲多。

公在京師時，與朱笥河互主騷壇，有「南王北朱」之稱。所至朋舊文讌，提倡風雅；後進才學之士，執業請益，舟車錯互，屢滿戶外。士藉品藻以成名，致通顯者甚衆。歸田後，往來吳門，賓從益盛，與王西泚、錢竹汀、臧舟白、公堤下，朋簪雜選，詩酒飛騰，望之者若神仙。

公天資過人，於學無所不窺，尤邃於易。詩宗杜少陵、玉谿生，而參以韓柳。古文則以韓柳之筆，發服鄭之蘊。著述甚富，除金石萃編外，有春融堂詩文集六十八卷，明詞

綜十二卷，國朝詞綜四十八卷，湖海詩傳四十六卷，續修西湖志，青浦志，太倉志，陝西舊案成編，雲南銅政全書皆刊行於世。其未刊行者，則滇行日錄三卷，征緬紀聞三卷，蜀徼紀聞四卷，屬車雜誌二卷，豫章行程記一卷，商維行程記一卷，重游滇詔紀程一卷，雪鴻再錄二卷，使楚叢談一卷，臺懷隨筆一卷，青浦詩傳三十六卷，天下書院志十卷。其未成書者，則羣經揭櫫，五代史注——揭櫫取周禮職金注——今時之書有所表識，謂之揭櫫——之意。蓋以漢學爲表識，而專攻毀漢學者——皆藏於家。

(附) 陸耀遹字劭文，江蘇陽湖人。少補諸生，工詩，有文名。壯歲出遊，阮文達方任浙

江學使，頗見器重。尋之陝西，客朱中丞幕。會教匪反滑縣，上調陝督那公鎮中州，過長安，求士於朱，朱言君知兵事闢狹，卽請見，爲陳機宜緩急數十事，因屬具草以上，采以入奏，多見施行。朱罷，遂南歸。有旨徵孝廉方正，邑人舉君應，試二等，用校官，得淮安府學教諭。而時客廣東，當事者強留之，凡歷十餘載，叔繼輅招之使還。比抵家，

繼輅遽卒。爲經紀其喪，刊其遺書，適改選阜甯訓導，之官未幾亦卒。詩宗錢劉，能自成家。酷嗜金石文字，隨所至搜輯摹拓，小暇輒矻矻伏案攷證，取王氏金石萃編所未備者千餘通，仿其例，成金石續編若干卷。簡潔覈實，較原書成於衆門生之手，冗雜炫博者，蓋尤勝之。惟遺稿經太倉陸增祥釐訂，多所竄改，非復廬山真面目矣。

朱文藻字映濬，號朗齋，浙江仁和人。諸生。嘗館汪氏振綺堂，任校讎之役者三年。汪氏富藏書，自是所學日益，文名日盛。漁獵百家，取材宏富。精六書，自說文繫傳、佩觿、漢簡以及鐘鼎款識、博古圖等，無不貫穿源流，會其指要，且能手摹，非徒以形聲點畫自名小學者可比。韓城王相國督浙學時，訪而延之，至京師，佐校四庫全書。尋奉勅在南齋考校事宜，亦俱諳習。又通史學，凡合紀傳編年紀事通典諸書，輒復考其缺略，審其是非。久之，錢塘黃小松司馬招游山左，時督學爲阮文達，兵備爲孫淵如，同任一方，篤嗜金石，與之商訂，揚本甚富，成山左金石志。嗣阮公編兩浙輜軒錄，

修嘉興府志，并分任其役。王侍郎蘭泉更招君於三泖漁莊，纂輯金石萃編，大藏聖教解題各若干卷。會侍郎下世，未及竟業。師沈耕寸先生，衰疾困頓，躬視湯藥者十餘年，比卒，營喪葬備至，行誼類漢人風。所著說文繫傳攷異四卷，已收入四庫。餘有續禮記集說，東城小志，東臯小志，朗齋碑錄，碧谿叢鈔，東軒隨錄，金箔考，苔譜，萍譜，青鳥攷原，碧谿草堂詩文集，碧谿詩話，稿藏於家。

翁方綱

翁方綱字覃溪，直隸大興人。乾隆甲子，年十二，補順天府學生。丁卯，年十五，鄉試中式。壬申，年二十，會試中式，殿試，改庶吉士。卽於是年自編復初齋詩集。甲戌，年二十二，散館，授編修。己卯，年二十七，奉命典試江西。壬午，年三十，奉命典試湖北。甲申，年三十二，奉命視學粵東。壬辰，還都。次年得宋槧蘇詩施願注本，因以「寶蘇」名室。丙申，

奉命充文淵閣校理官。己亥，奉命典試江南。辛丑，擢國子監司業，旋擢司經局洗馬。癸卯，充順天鄉試副考官。甲辰，遷少詹事。丙午，再視學江西。辛亥，奉命視學山東。嘉慶元年，丙辰，年六十四，賜千叟宴，賞賚珍物。己未，授鴻臚寺卿。甲子，年七十二，重赴泮林。丁卯，年七十五，賜三品銜，重與鹿鳴宴。甲戌，年八十二，賜加二品銜，重與恩榮筵宴。戊寅，年八十六，卒。

先生精心汲古，宏覽多聞，於金石譜錄書畫碑版之學，尤能剖析毫芒，如肉貫鼎。著兩漢金石記二十二卷。前列年月表，十八卷附魏吳石刻八種，十九卷隸續補急救章注，二十卷隸八分攷，二十一卷補遺，末附班馬字類記。議論堅卓，斷制詳明。既刻後，隨有剗改。晚定本，尤見精核。惟間以詩歌附入，與歐趙之體又異。視學廣東時，著粵東金石略若干卷。

先生詩宗西江派，多至六千餘篇。自諸經注疏以及史傳之攷訂，金石文字之爬

梳，皆貫徹洋溢於其中。雖瓣香在少陵東坡，初不以一家執也。書法初學顏平原，繼學歐陽率更；隸法史晨韓敕諸碑。生平雙鉤摹勒舊帖數十本，北方求書碑版者畢歸之。

(著)

子樹培字宜泉。乾隆丁未進士。著石峯岩鐘鼎攷，古錢彙攷。

朱爲弼

朱爲弼字右甫，號某堂，浙江平湖人。通經學兼長詞翰。其祖含叔以兄弟牽累羈成都獄，待質二十餘年始歸，旋卒。事祖母以孝聞。撫諸弟讀書，皆成立。方蘭士薰爲寫慈竹居圖。嘉慶十年成進士，授主事，轉員外郎，擢御史。奏劾倉場侍郎和桂、張映漢、覆奏海運倉立石處變情形不實，按治如其言，和張并革職。累遷至兵部左侍郎，尋署倉場侍郎，調漕運總督。在任條疏剔弊速漕章程九條，均下所司議行。未幾，因病請致仕，卒年七十四。

先生少耽六書，尤嗜吉金文字。官京師時，與漢陽葉志詵交甚歡。遇古器未嘗不手搨，遇搨本未嘗不手摹。其用心之專，鑒古之當，殆天性使然。既出阮元門，阮萃并世同好十二家搨本，益所自藏，成積古齋鐘鼎彝器款識二十卷，以續宋薛尚功書，而考義釋文遠秩薛作；編定蓋全出右甫。原稿藏於家，題吉金古文釋者是也。并爲撰序文三千言，博綜彙雅，冠絕等倫。一時士林傳誦。好爲詩，興會高遠，不專工字句之末，有某聲館詩集十六卷。

吳榮光

吳榮光字伯榮，號荷屋，廣東南海人。嘉慶戊午舉人，己未進士。散館，特授編修。京察一等，補御史。充浙江鄉試副考官。未幾，以巡漕失察落職。指復員外郎，選刑部。隨成格往山西讞獄，覆命升郎中，補軍機章京，授陝西西安道。道光元年辛巳，擢福建按察

使遷貴州布政使。尋丁外艱。期滿入都召見，補授湖南巡撫。值江華逆獠趙金隴倡亂，偕總督盧坤，提督羅思舉討平之。署湖廣總督。除辦理善後外，在任五年。凡裁冗員，懲蠹役，緝奸民，政事莫不具舉。丙申，坐湖南學政龔維琳被劾，未先據實陳奏，降四品卿。未成行，適武崗匪警，得旨留湘會剿。事畢赴京，逾歲授福建布政使。嗣以衰老乞假歸。卒年七十一。

公恢廓大度，喜延納，遇士抱才藝者咸羅而致之幕下，或爲游揚聲譽，有畢秋帆阮芸臺之風。尤酷嗜金石，精鑒賞。所藏如辛舉鹵祖乙鼎、姬彝、蚌笠尊、太史盧父已彝、兵史鼎等，皆海內絕品。其餘碑版，又幾二千通。著筠清館金石記，先刊其金文五卷。說者謂公經學雖不逮文達，此書實足與積古齋鐘鼎款識相頡頏。復撰帖鏡六卷，攷證亦頗雅贍云。

武億

武億字虛谷，號授堂，河南偃師人。年十二，偏覽九經諸子，爲文下筆千言。早失怙恃，衰毀骨立。會伊洛溢，居圯，架木爲小屋，讀書其中。嚴冬，斫木燒以禦寒，斧傷足，血殷不顧。倜儻負奇氣，乾隆庚寅，舉鄉試，乃由興漢走四川，沿夔巫以歸，攬其形勝，作六國論。旋居京師，從朱筠遊，益爲博通之學。庚子成進士，選授山東博山知縣。蒞任，勤政愛民，革諸供饋，決辭無留獄，禱雨立沛，嚴止賄賂，輿情大洽。剏范泉書院，進其秀者，親講授以敦實學。當和珅秉國，遣番役捕反賊，橫行民間，州縣莫敢誰何。先生率人收之，杖而解去。大府慮獲咎權要，因顛預以濫刑劾奏。罷官日，博山民千餘人遮道乞留，不得，相與館其全家於縣中，朝夕饋問。先生不忍用家口累民，悉遣歸。乃間遊東昌臨清間，修魯山邾縣寶丰三志，藉以自給。繼主講清源書院，凡五載，始返里。安陽令趙希潢與

同受業朱筠，延至署，訂金石文字，旋抱病辭。嘉慶四年，和珅既伏誅，詔舉枉曲，於是先生去官事聞，敕吏部起復，而先一月竟卒，年五十有五。

先生生平博洽於學。諸經注疏，三史通鑑，皆能闡誦。好收藏碑版，遊歷所至，如嵩山泰岱，遇有石刻，捫苔剔蘚，盡心摹拓。或不能施氈椎者，必手錄一本。偃師杏園莊民家掘得宋劉韜墓志，重幾百斤，急往購之，負之行數十里，困憊無恤。其嗜古有如此。所著三禮義證十二卷，羣經義證八卷，經讀考異八卷，補一卷，四書攷異一卷，句讀敘述二卷，金石三跋十卷，續跋十四卷，偃師堂石遺文錄，并校定五經異義，駁異義補遺，箴膏肓，起廢疾，發墨守，鄭志等，各若干卷。授堂文鈔十卷，詩鈔八卷，讀史金石集目，年譜，授堂劄記，又若干卷。

趙紹祖

趙紹祖字繩伯，號琴士，安徽涇縣人。九歲卽以能文稱。二十應童子試，以經解冠八邑。受知於朱筠，拔入縣學，旋食餼。朱公奇其材，手授許氏說文，令肄習，且言「讀注疏日毋過十葉，讀說文日毋過十字，必精造乃已。」於是學大進。既屢薦棘闈不售，乃益專力於經史百家及碑版文獻之屬，鈎鉅抽繹，務求要歸。平生澹嗜欲，惟日夕手一編不輟，矻矻終其身。所著有名者：通鑑注商十八卷——胡氏之書，本極賅洽，爲參研抉發至六百餘條，視日知錄及陳景雲所列不啻倍蓰，一一有成處可覈。——新舊唐書互證二十卷——於劉胸並歐宋書無所偏徇，惟以舊書尙存班范之法，新書專修文詞，考證或舛，故摘之者十八九，率平心以救其失，不挾門戶之見也。顧尤篤好碑版，偶遇諸市肆，不惜重價購歸，悉心檢閱，謂可補史傳之遺。仿金薤琳瑯例，成金石文鈔八卷，續鈔二卷。并蒐羅斷缺之本，作金石跋六卷，中如漢太室石闕銘已漶漫，而顧亭林銘其殘字，「崇高」作「嵩高」，不知說文有崇無嵩，崇卽今之嵩字也。他所舉咸

類是。又在家既有涇川金石記一卷，修志之暇，別撰安徽金石略八卷，人物志八卷，稱合璧焉。其他撰述關經義者：校補王氏詩考二卷。關史學者：校補竹書紀年二卷。建元考二卷。關掌故者：涇事二卷。關考訂者：讀書偶記八卷。消暑錄一卷。古墨齋筆記六卷。觀書記八卷。書畫記一卷。讀書偶記中論喪服論古今韻諸條，最推翔實平允。自作詩文，有琴士詩鈔十卷，文鈔六卷。復輯其師友所作詩，爲蘭言集十二卷，又爲同心言一卷。輯族人詩，爲趙氏淵源集十卷。彙集鄉先輩遺著數十種，爲涇川叢書百餘卷。鄉邦文獻大備。○桑署滕州廣德州訓導，雖皆不數月去，而士林慕之。主講池州秀山，太平翠螺兩書院，殷勤教誘，迄無倦容。道光辛亥，安徽布政使陶澍采輿論，檄舉孝廉方正，敦迫始就道，奏名第一，以衰老未赴公車，留省。會修通志，五年志成，羣歎爲詳整有體。卒年八十有二。

張廷濟 附張燕昌

張廷濟字叔未，浙江嘉興人。少親炙海鹽吳懋政，學有根柢。領嘉慶戊午省解。屢躋禮闈，不售。遂結廬高隱，以圖書金石自娛。建清儀閣，古香溢翰墨間。鑒賞精審，每一器一碑入手，卽能知其真僞，別其源流。所拓商周秦漢古彝鼎銘文千種，有現今及藏家所未著錄者。翁方綱與之往復考論，多所辨析。所儲石刻，自石鼓文以下，至宋金元亦千種。并多數十百年舊搨，而其名今已全佚者。藏器中鐘鼎尊彝六十餘事，絕無僞造。其周女方爵，秦始皇時度，則寔字中稱僅見焉。藏石有唐天寶七載修子產廟碑，顏魯公立靜先生殘石，蘇文忠馬券碑，賈刻宣示表，宋覆刻淳化殘帖，金元刻蘭亭諸石，率精出近刻倍倍。餘如漢晉古甌，秦漢古瓦，漢魏至宋元古官私印，周秦以來錢幣，亦均不讓古收藏家。里居近竹林，於耆舊書畫網羅尤備。書法米南宮，草隸獨出冠時。詩

樸勁典核。著有叔未金石文字、清儀閣題跋、金石奇緣、墨林清話、桂馨堂集，各若干卷。晚年眉長徑寸，與阮文達合摹眉壽圖、泐石藝林傳爲盛事云。

(附) 張燕昌字苞堂，號文魚，又號金粟山人，浙江海鹽人。乾隆丁酉，以優行貢入成均。不屑仕進，屏居邨落間，孤介爲懷。性嗜金石，尤愛小品。搜奇采癖，凡齷缺零星，都爲一集，名金石契，共五卷。攷證之外，復附以各家詩歌題跋。常往寧波，於范氏天一閣藏書中獲觀北宋石鼓文揚本，手自摹勒，撰石鼓文釋一卷，驗以篆籀，定其偏旁點畫。又哀古來飛白書之源流派別，作飛白鈔二卷。辨經箋紙，作金粟箋說一卷。嘉慶丙辰，舉孝廉方正。年七十七卒。

瞿中溶

瞿中溶字蓑生，號木友，江蘇嘉定人。爲錢竹汀門壻。閱通雅，金石之學尤深。自

其十歲時，見古錢年號，卽知愛翫。嘗除夕乞母出制錢數十千，俾逐一檢取，其天性篤好如此。初從費士璣遊，嗜小學經學書，誦習至夜分不寐。稍長，購得漢碑數種，遂始治金石文字。三十一歲補諸生。援例捐布政司理問，分發湖南。會翁元圻、吳榮光、左輔先後爲湘大吏，均致敬禮。任修通志，金石一門最賅備，所擅長也。游元次山祠，浯溪，落亭，二銘皆親爲椎拓，不假手於碑工。五十後，棄官歸田。晚境頗艱窘。設骨董肆於虎邱，曰「長物齋」，藉謀餽粥。年七十四卒。

生平著述極多，有魏石經遺字舉正一卷，唐石經攷異補正二十卷，校勘釋隸續，大義拾補十二卷，吳郡金石志存目一卷，古泉山館金石文編一百二十卷，存殘稿四卷，泉志補攷十五卷，泉志續編二十卷，古玉圖錄六卷，文集一卷，詩集六卷。又春秋三傳經異文備攷，三禮石經辨正，古文孝經辨誤，孝經釋文辨證，漢石經攷異補正，蜀石經攷異補正，諧聲表，宋本漢書附錄札記，列代避諱札記，古泉山館彝器圖釋，漢武梁

祠畫像攷，集古官印攷證，古鏡圖錄，洗冤錄詳辨，見聞隨筆，各若干卷。

徐同柏 附吳東發

徐同柏字壽藏，號籀莊，自號少孺，初名大椿，字春甫，浙江海鹽人。幼依外家張氏，就其家塾受經，聞塾師與諸生講子史故實，悉能竊聽聞記。繼從舅氏叔未先生問學。叔未固嗜金石，又請益於畢明經星海。——畢爲處士宏述孫，工篆隸，精研六書，著有六書通撫遺。——得其指授，小學之功，蓋基於此。年十九，補博士弟子員。初治鐘鼎款識之學，嘗謝生徒讀書，叔未清儀閑，憤發刻厲，金壇段若膺見其文，以磊砢英多目之。復丐錢竹汀書「諷籀書窠」匾，用示己志。佐縣志金石采訪，因輯履仁鄉金石文字記八卷。全稿未梓，僅存其目。旋食廩餼，既屢試不入，穀愈專力吉金文字。叔未每得款識之難辨者，屬其細意融會，卽豁然通解。海內如平湖錢夢廬，仁和趙次閑，長白斌笠

耕諸城劉燕庭，錢塘瞿穎山，灘縣陳壽卿，諸家藏器，多拓請攷釋，久之成從古堂款識學十六卷。更爲瞿氏著清吟閣古器款識釋文數冊。其間釋虢叔大林鐘，定旅爲虢公長父名，定周封敦爲康叔封器，定齊侯鉞爲陳桓子鉞之類，均極詳審。儀徵阮元題記，稱許甚至。他著尚有焦山周鼎斛，新莽泉刀二品攷，珣谿古玉式，暨竹里詩存若干卷。卒年八十。

(附) 吳東發字侃叔，號芸父，浙江海鹽人。屢薦於鄉不售，以歲貢入成均。性孝友，工詩文，通六書，工篆隸，善畫山水。致力金石之學，凡商周秦漢之文及見者，莫不研究。嘗從錢竹汀游，多所商榷，錢引爲畏友焉。著有羣經字考，讀經筆記，經韻六書述，石鼓讀，商周文拾遺，鐘鼎款識釋文，金石文跋尾續，澈浦詩話，遵道堂文稿詩稿等。尤邃於尙書，著書序鏡，尙書後案質疑二種。卒年五十七。

劉喜海 附金錫鬯

劉喜海字燕庭，山東諸城人。文正文清公孫，文恭公之長子也。雖韋平世閱，而室無長物，蕭然若寒素。獨酷嗜金石碑刻款識，縱橫滿几。道光戊戌，外簡福建興泉永道。游長汀，輯蒼玉洞題名一卷。會丁艱歸。起復後，改任陝西延榆道。擢按察使。當是時，秦中出土古器綦多，爰以大力搜索，先後所得秦詔版凡四，以及唐善業泥造像等，均自來收藏家未經著錄者。新莽十布，亦至是始獲其全。與鮑康質證考訂，成長安獲古編三卷。丁未，陞浙江布政使。以好古爲言官彈劾，罷吏議。未幾遂卒。實則服官中外，二十餘載，所至不名一錢。惟篋中泉幣尊彝，載之兼兩，致來明珠薏苡之謗，論者惜之！

公手裏金石文字，五千餘通，撰金石苑數百卷。胸羅卷軸，家承賜書，固已詳博過於蘭泉。又得舅氏金蒨穀佐其校理，益臻精善。復撰古泉苑一百一卷，共得泉四千六

百有奇；附泉範數十，取現代錢法冠首，次分正用品，僞用品，異品，外國品，厭勝品，雜品六類。惜兩書并緣卷帙繁重，兵火後散失無傳。今世所傳金石苑六卷，僅全書之一部，本名三巴子，晉古志，起漢王稚子闕，總四百餘石，亦可見其大略矣。而搜錄海外金石，成爲專書，尤前此所未聞。則取朝鮮碑版，纂輯考釋，撰海東金石苑八卷。近烏程劉氏始得原稿，加補遺六卷，授諸梓。

(附) 金錫鬯字蓓穀，浙江桐鄉人。少時，父坐官累，家中落，乃奔走南北，藉館穀供色養。嘉慶戊辰，中式順天鄉試。校錄會典，叙選知縣。歷宰廣東恩平、香山、高要三邑。署澳門同知，知嘉應州。初見賞於外舅錢大昭，故遂於金石之學。劉喜海出其門。作金石苑百卷，資君助力爲多。任恩平時，嘗置吏議奪職。開復後，會擒盜有功，總督始奏擢一階。而晚治嘉應最久，且著循聲簿書之暇，勤於撰述。成古泉述記十二卷，南北史摘證六卷，晴韻館詩文集四卷，自省錄二卷。淹雅宏通，識者每與吏治並稱。卒年

七十二。

吳式芬

吳式芬字子苾，號誦孫，山東海豐人。道光甲午進士。官至內閣學士。酷嗜金石，嘗就寰宇訪碑錄，補其未備，刪其訛複，增入三代秦漢以來吉金，各注姓氏家藏，如孫錄收甄瓦之例，惟不載璽印泉幣鏡銘，只載有年月者；孫錄未詳碑額，亦並補之；書約十六卷，名曰攬古錄。又復蒼萃金石目錄，分州縣編之；其存者，則列爲已見；未見者，則注明見某書，列爲待訪；凡古今金石諸書，無不備採；更取歷代史籍及諸家文集說部以益之；墓誌以曾出土，著錄者爲斷，而不采文集；鐘鼎甄瓦，流傳本無定所，亦不收載；地里未詳者，別附於後，以俟參考；名金石彙目分編，約四十卷。於款識古文，研究六書，多所考釋；於穹碑巨著，缺文誤字，博訪舊本，多所補正；皆散見所蓄金文冊子，及手校金

石各書。近代關中漢泥封出土甚多，謂足明兩京制度，訂史冊沿譌，集榻本據漢志編次，加以考證，成書一卷，與攜古錄并梓行。惟彙目稿藏於家。

陳介祺

陳介祺字壽卿，號篋齋，山東濰縣人。由進士授翰林院編修。家故饒於資，通籍後卽絕意仕進。素嗜金石之學，收藏甲海內，築篋齋以珍棄之，凡彝器至數百件。尤著者爲「毛公鼎」，文幾七百餘字，推天下金器之冠。三代陶器亦數百件，周印百數十事，漢魏印萬餘，秦詔版十餘，魏造像數百區。從來賞鑒家所未有也！同時若潘文勤公，王文敏公，吳子苾閣學，清卿中丞，劉燕庭方伯，鮑子年舍人，李竹明太守，并皆不足方駕。而復於三代文字確有心得。其釋「聃敦」，決爲毛叔聃所作器，謂「文少於書武成者，二百六十二字，于伐商事爲略，而于受天改大命爲詳。至大之事，括以二十二言，七

十六字；非師文王周公之文，焉能至此。」又釋「陳侯因資敦」銘中有「考孝武桓公龔載大謨，克成其謚」，謂卽桓侯兼齊之記。又釋「今田盤」，「齊太公和陳猶」兩區，諸篇考語，見古史古制，如數家珍。自昔談金石者，僅見之作也！又大集李斯書，推爲碑祖；蓋亦有鑒於古籀之亡，今文之失，而概乎言之。觀其與友人書有曰：「有李斯而古篆亡，有中郎而古隸亡，有右軍而書法亡。」可以知其意矣。惜著述罕覯，近始陸續景印簠齋吉金錄八卷，吉金文釋一卷，藏古冊目并題記一卷，十鐘山房印舉若干卷，尺牘若干卷，固十不逮一云。

李佐賢 附鮑康

李佐賢字竹朋，山東利津人。舉進士，官至汀州知府。自其弱冠時卽嗜收藏金石書畫。金石中尤以古泉爲專好。初居里門，尙苦聞見未廣。既往來齊魯鄒滕間，隨地訪

求，漸有增益。通籍後，供職都門，與戴醇士、呂堯仙、劉燕庭暨同年吳式芬、陳介祺諸人訂交。互相投贈，而各家異泉俱經借拓，久遂裒然成帙。迨出守臨汀，僻處偏隅，未遑整理。比去官返京師，故人率多星散。後遇內閣中書鮑康，亦深同嗜，間出所藏質證，既多曩所未見，且恆助其搜羅，因勸取歷年拓本，彙爲一編。於是參攷諸譜，逐加詮釋，以謂刀布之古文奇字，多六書說文所未備；漢唐後之泉，篆隸直行，一代之書法具在；是文字變化之無窮，更勝於碑版也。范金合土，歷朝之制度見焉；利用厚生，歷朝之利弊見焉。况標新領異之泉，尤多舊史食貨志未載。論古者按圖攷稽，亦可補志乘之缺，而正其譌。是制作沿革之所關，尤重於鼎彝也。乃撰成古泉匯六十四卷，分元亨、利貞、四集、元集、古布、亨集、古刀、利集、圓錢、正品、貞集、異泉、雜品。蓋自來譜泉家，精嚴者失之簡略，賅博者之失繁蕪，而竹朋書出，實能集其大成矣。

(附) 鮑康字子年，安徽歙縣人。以內閣中書官，至四川夔州知府。生平癖嗜泉幣。在

京師，與呂佺孫、堯仙、李佐賢、竹朋、劉師陸、青園諸人有同好，弃藏甚富，多前人所未見。流寓秦中時，與劉燕庭晨夕過從，互出所藏相質證。著泉說、續泉說各一卷，并衷其金石題跋、成觀古閣叢稿初二三集若干卷。刊燕庭遺稿，爲海東金石苑一卷，論泉絕句一卷。又爲青園刊其虞夏贖金釋文一卷。竹朋撰古泉匯，亦恆倚之襄助云。

夏 荃

夏荃字退庵，江蘇泰州人。編輯海陵文徵詩徵凡數十卷，又撰退庵筆記十六卷，梓里舊聞八卷。凡桑梓舊聞，衣冠盛事，故書雜記，軼行遺文，下及技藝寸長，鄉閭瑣語，莫不辨非求是，援古證今，蒐羅甚富。寶應劉寶楠稱其『在小說雜家間，固夢溪香祖之流亞也。』又集其所獲古錢千餘品而錄之爲譜，譜凡八卷。前有歷代年號重襲攷，歷代錢譜攷，爲之辨真贋，別良楛，考其年世，核其異同，旁徵百家，折衷至是。雖未能悉

存模拓，而專重攷證。後此李竹朋之纂古泉匯，實用其例。海陵韓國鈞跋以爲「審是非，辨得失，能訂董廣川洪景伯諸家之誤；其攷年號重襲，亦與趙甌北李申耆相伯仲。洵乎爲史學之津梁，圖府之龜鑑也！」以明經終。生平勤於著述，而付印者僅海陵文徵二十卷，自餘俱未梓行。甚至遺稿散失，十不存一。韓公編海陵叢刻，始取其退庵筆記，梓里舊聞，退庵錢譜，表而章之，而先生遺著賴垂不朽云。

吳大澂

吳大澂字清卿，江蘇吳縣人，起家翰林，博通訓詁辭章，尤嗜金石，有所見，輒手摹之，或圖其形，存篋笥，積久得百數十器，編恆軒吉金錄若干卷。及視學西陲，鋒車所蒞，地不愛寶，鼎卣尊簋之屬，廉石歸裝，往往載之兼兩，以此文采風流，照耀京國。且數上封章論時事，潘祖蔭翁同龢交稱其賢，屢遷至副都御史。光緒庚辰，以伊犁議約出治

軍吉林。甲申，法越構釁，會辦北洋軍務，駐天津。已而簡任湖南巡撫。所收蓄益富。甲午，日寇朝鮮，自請督師赴前敵。德宗壯之，授幫辦前部，甫交綏，卽奔潰，尋自劾，部議革職，得旨改爲留任，令還湘。言官交章糾彈，始開缺。未幾，慈禧后惡其黨同龢，將追論失律罪，賴袁世凱營救，僅予罷斥，永不敘用。卒於家。

公擅長文學，負才氣，好爲大言，而軍旅實非所習。所著恆軒吉金錄外，又盡取潘氏暨濰縣陳氏，福山王氏諸家合己所舊藏拓本，攷而釋之，都十四卷。仿宋歐陽公例，名曰憲齋集古錄。其言曰：『說文之字，皆周末相沿，非孔子六經舊簡，故求之說文而不可通者，往往於經典釋文得之，如「徐」之古文「𠂔」，周禮雍氏注「征徐戎」，釋文劉本作「𠂔」，舉沈兒鐘魯公伐郟鼎爲證。又如「來」作「迷」，「𦏧」通「鬯」。釋文所存異字多與古器銘密合，人初不信，後見燉煌唐寫本，釋文虞書雖止十葉，以校通志，抱經兩刻，增字不啻倍蓰，說文所無，迨難枚舉，而今則古字亡矣。』然

後知初唐舊本陸氏所存古字實有溢出許書之外，而公之言信而有徵也。復裒鐘鼎異文，撰說文古籀補十四卷，附錄一卷，就古金文以探製字之源，撰字說一卷，縱不若後來孫仲容氏之精，要多創獲。書法亦適麗，有篆文論語并說文部首見重於藝林云。

吳雲

吳雲字少甫，號平齋，晚自號曰退樓，浙江歸安人。少雖孤露，而能自奮於學。屢躋場屋，六試始補博士弟子，秋闈復不售。轉益講求經世之學，旁及金石書畫，咸究壺奧。道光甲辰，援例以通判分發江蘇，兩權寶山，一權金匱，所至有政聲。長於折獄辦賑，富經驗，實事求是。尋攝泰壩監掣同知。值粵寇沿江東下，侍郎雷以誠治軍揚州，檄總理營務。敘功升知府，并加道銜。咸豐戊午，權知鎮江府。時郡城殘破之餘，撫綏安輯，流亡漸歸。明年，調蘇州，奉上官命赴上海與西國領事會議假洋兵助戰，議未定，而省垣陷。

巡撫薛煥使率礮艇會洋兵收復松江府城，遂兼攝松守，而部議以失地將奪職，薛公力爭得白。因固請交代，并辭兼篆。然尙佐薛公墓，雖不居職，而有大議必預焉。終爲忌者譖去，遂不復出。諸大吏屢欲強起，皆以疾謝。僑居吳下，有泉石之勝。客有見之者，則幅巾杖履，蕭然如神仙中人，幾忘前此之爲風塵吏也。生平篤嗜金石，幼讀漢書至梁孝王尊壘事，曰：『此必三代上法物，惜史氏言之不詳耳！』塾師大異之。所著有二百蘭亭齋金石記，燬於兵火。亂後得齊侯壘二，更名所居曰「兩壘軒」。著兩壘軒彝器圖釋十二卷，凡一器一銘，莫不鈎摹精刻；意有所疑，則博稽經史，以相證明。此外有古官私印考，都二十七卷；統季子白盤考，漢建安弩機考，溫虞恭公碑考，華山碑考，各一卷；焦山志，十六卷；詩文尺牘題跋，又若干卷。同治十年，以捐賑直隸水災復原官。卒年七十三。

王懿榮

王懿榮字正孺，一字廉生，山東福山人。自幼性情篤摯，讀書過目不忘。年未冠，隨父官京師，觀政戶部，聲譽大起。顧屢躓場屋。同治癸酉，始中順天鄉試副榜第一。座主吳縣潘文勤公，深重惜之。光緒己卯，中式順天舉人。明年成進士，入翰林，散館授編修。癸巳，典試河南。甲午，朝考一等，命值南書房，署國子監祭酒。中東事亟，上疏請回籍辦團練，以爲聲援。會議和乃罷。回京覆命，并繳還餉項五千金。是歲卽補授祭酒。丁母憂。服闋，還原任。前後三拜司成，諸生得其指授者，皆相勉爲實學。以會典館編校敍勞加二品銜。庚子，剛毅與端王朋比引義和團入京，仇殺外人，偕侍郎李端遇同授團練大臣。於召見時，面奏拳匪無法紀狀，朝廷始知爲亂民，而國事已不可爲矣。都城破，兩宮西狩，遂投井殉節。事聞，贈侍郎銜，予諡文敏。

公爲學不分漢宋門戶，殊篤好金石文字。得諸城劉氏舊藏，故收蓄頗富。與濰縣陳編修介祺商訂古文書疏，往還不絕。潘文勤暨常熟翁尙書咸推之爲博學多識。於書無所不窺，而於篆籀奇字尤善悟，視當時通儒所獲獨多，蓋天性也。爲人坦白，不屑問家人生產。至購買書畫古器，卽典衣質物不惜，故官日崇而貧日甚。所著率未就，僅天壤閣雜記一卷載江氏靈鷲閣叢書中。奏稿若干卷，別刊。

校勘目錄學家列傳第十九

敘目

清修四庫
亦因之刪
改明代諸
書此則功
罪相參故
私家校讎
與四庫校
論應分別

校讎之學，造端於劉向父子。魏晉以來寢衰。列史藝文，直等於甲乙之簿。雖歐公之崇文目，及晁陳兩氏私家著錄，類多語焉失詳，且不悉家法。明人憲刊書，尤訛謬莫可究詰。自清乾隆中修四庫全書，提要半出東原二雲諸君，精者足以繼軌七略。清世目錄學家，夙出前代。有由然矣。清儒率治小學訓勘，每校一書，雖主名無徵，必辨其義例，審其通假；故前此古書不可卒讀者，一旦文從字順，厥功又豈淺鮮哉！

朱彝尊

章學誠（見史學大師列傳）

何焯

紀昀祇須
入此不必
歸入提倡
樸學諸顯
達列傳中
(炎太)

盧文韶

丁杰 (見皖派經學家列傳)

鮑廷博 附秦恩復

黃丕烈 附吳騫

〔紀之〕

周中孚

顧廣圻

陳鱣 錢泰吉 (并見作史學家列傳)

錢熙祚

張文虎

莫友芝

譚瑩

葉昌熾

楊守敬 (見地理學家列傳)

繆荃孫

朱彝尊

朱彝尊字錫鬯，號竹垞，浙江秀水人。少聰慧絕人，書過眼卽能覆誦。十七，棄舉子業，肆力於古學，久之，博通羣籍。顧寧人閻百詩皆亟稱之。康熙己未，開詞科，年逾五十，與富平李因篤等四人以布衣入選，並授翰林院檢討，纂修明史。

既入詞館，日偕諸名宿掉鞅文壇。時王漁洋工詩而疏於文，汪茗文工文而疏於詩，閻百詩、毛西河工攷記而詩文復次乘，獨先生兼擅其長。

任修史，有上總裁七書，大意謂：宜定體例，寬期限，革除事多難信；道學傳不當以門戶分邪正，不必別立；崇禎朝雖無實錄，亦未可專據邸報。世服其有識。後史成，多從之。

尋充講官。辛酉，典試江南，稱得人。爲言者所中，鑄級，旋復原官。因無意進取，假歸，

遂不復出。乙酉，聖祖南巡，召見於行宮，進所著經義攷，溫諭褒獎，賜御書「研經博物」四字。經義攷於十四經外，附以逸經、毖緯、擬經、家學、承師、宣講、立學、刊石、書壁、鏤版、著錄、通說、諸門，共三百卷。每一書前列撰人姓氏、書名、卷數，次列存佚，闕未見字，次列序跋暨諸儒論說，有所攷正。更自爲案語附末。上下二千年間，元元本本，使傳經原委，一一可稽，稱賅博詳贍焉。

又嘗慨明詩自萬歷後，作者散而無統，輯明詩綜百卷。搜集北都地理、山川古蹟，與夫掌故文獻，加以辨證，成日下舊聞四十二卷。工倚聲，甄錄宋元人詞，爲詞綜二十四卷。自著詩文詞總目曝書亭集，八十卷。子昆田，亦善詩。

何焯

何焯字岷瞻，號茶仙，江蘇長洲人。先世曾以「義門」旌，學者稱義門先生。孤介

好學，初忤錢謙益，方苞再忤徐乾學。主翁叔元家，翁受人嗾，湯斌先生與絕交，即日移裝去。康熙二十四年，充拔貢生。四十一年，聖祖南巡，李光地薦其博雅，遂召試，命直南書房。明年，賜舉人。試禮部，下第。復賜進士，選庶吉士，仍直南書房。尋命侍讀，皇子允禩貝勒府，兼武英殿纂修。然忌者滋多，散館置下等，當黜，特詔留館肄業。越十年，乃授編修。五十四年，駕在熱河，有構蜚語以聞者，詔下獄，盡收其書，聖祖覽之無怨望語，又得其辭，吳縣令饒金札，卽赦之，留校書。六十一年病，詔賜醫藥，六月卒，年六十二。

先生精于校書，所蓄數萬卷，又多見宋元舊本，點勘譌脫，分別丹黃，藏書得何氏校本，以爲至寶。所校定兩漢書、三國志，考證尤精核。世宗在潛邸，亦以困學紀聞屬先生箋疏。乾隆五十方苞奏取其書付國子監，爲新刊本所取正。先生凡有評識，必洞徹其表裏，通核其時勢，無一語無根據。每讀書論世，輒思爲用天下之具，故精審絕倫。若此書得晉唐人法，聖祖嘗命書四書章句集註作鈔板。所著道古齋識小錄，多刪取題

識，爲之最詳慎。繫獄時，門人某妄意中有忌諱語，投諸火。或謂爲所乾沒云。邑子蔣維鈞刻其讀書記五十八卷，行於世。先生事親孝謹，推財產於兄弟。門人有才而貧者，恆飲食於其家而教之，著錄四百餘人，多知名。

盧文弨

盧文弨字召弓，號磯漁，又號檠齋，晚更號弓父，抱經其堂顏也。人稱曰抱經先生。其先自餘姚遷杭州。父存心，恩貢生，召試博學鴻詞，不第，有白雲詩文集。母馮景女。先生生而穎異，濡染庭訓，又漸涵於外王父之緒論，長則爲桑調元壻，師事之。故其學具有本源。乾隆戊午，舉順天鄉試。壬午，考內閣中書。壬申，以一甲第三名，成進士，授編修。丁丑，入直南書房，由中允薦升侍讀學士。乙酉，典廣東鄉試，旋提督湖南學政。戊子，以學政言州縣吏不應杖辱生員，左遷。明年，以繼母年高，乞養歸。乾隆乙卯卒於常州龍

城書院，年七十有九。

先生好校書，終身未嘗廢。在館閣十餘年，歸田後主講書院凡二十餘年，雖毫，孳無怠。味爽起，繙閱點勘，朱墨並作，几間闕無置茗盃處；日且暝，始出戶，散步庭中；俄而篝燈如故，至夜半而後即安。宦俸脯修所入，悉以購書。聞有舊本，必借鈔之；有善說，必謹錄之。一策之間，分別迳寫，諸本之乖異，字細而必工。今抱經堂藏書數萬卷，皆是也。所定經典釋文，孟子音義，逸周書，賈誼新書，春秋繁露，方言，白虎通，荀子，呂氏春秋，韓詩外傳，獨斷諸善本，鏤版行世。又苦鏤版難多，則合經史子集三十八種，如經典釋文例，摘字而注之，名曰羣書拾補以行世。所自爲書，有文集三十四卷，儀禮注疏詳校十六卷，鍾山札記四卷，龍城札記三卷，廣雅注二卷，皆能使學者誥正積非，蓄疑渙釋。

鮑廷博 附秦恩復

鮑廷博字以文，號涿飲，安徽歙縣人。家於浙江。事祖若父以孝聞。以父性嗜讀書，乃歷購前人書以養志。歷久所得益多且精，遂裒然爲大藏書家。尋補縣學生。

乾隆三十八年，詔開四庫館，采訪天下遺書，乃集其家所藏書六百餘種，命子監生士恭由浙進呈。既著錄，復詔還其原書，賚以古今圖書集成，伊犂得勝圖，金川圖；其中唐闕史及武經總要，并御製詩題之。嗣刊知不足齋叢書，卽以唐闕史冠首，志一時之榮遇焉。「知不足」者，故廷博藏書齋額。嘉慶十八年，方受疇撫浙，以續刊之第廿六集進，奉旨賞給舉人。時年逾八十矣。

居恆好學，耽吟咏，不求仕宦，天趣清遠。每遇人訪問古籍，凡某書美惡所在，意愜所在，見于某代某家目錄，經幾家收藏，幾次鈔槧，眞僞若何，校誤若何，莫不矢口而出。

問難無竭。既因進書受知兩朝，名聞當世，謂「諸生無可報稱，惟有多刊善本，公諸海內，使承學之士，得所觀摩。」年八十六，叢書至二十七集，未竣，遽卒。尙遺命子士恭繼志續刊，今存者共凡三十二集。秘冊孤編，率賴以傳云。

(附) 秦恩復字近光，號敦夫，江蘇江都人。乾隆癸卯舉人，丁未進士，改庶吉士，授編修。丁內艱，將起復，疽發於背，家居幾十載，構屋三楹，顏曰「五笥仙館」，藏書極富。嘉慶丙寅，入都供職。逾歲回里。阮元撫浙，延主詁經講席。壬寅，兩淮鹽政，又聘主樂儀書院。尋復任校刊欽定全唐文。既乞假歸，自號猾翁。所蓄書畫法帖，洎磁銅玉石之類，鑒別精確。嘗刊行唐虞重元注列子、梁陶弘景注鬼谷子、齊李軌注揚子法言、唐趙元一奉天錄、宋劉球隸韻、均海內孤本；駱賓王、李元賓、呂衡州、三唐人集，亦根據宋刻，加以攷證。號石研齋八種。喜填詞，著有享帚詞三卷。復刊詞學叢書。卒年八十四。

黃丕烈 附吳騫

黃丕烈字紹武，號蕘夫，又號復翁，江蘇長洲人。少讀書，務求精純，發爲文章，必以六經爲根柢。嘗仿宋人春秋類對之法，摘經語集爲駢四儷六之文，以類相從，裒然成編。年十九，受知學使彭侍郎芸楣，補諸生。乾隆戊申，舉本省鄉試。禮闈數上不售。大挑一等，以知縣用，發直隸。無意仕宦，乃援例得主事分部，復卽告歸。旋丁外艱。性至孝友，父柩在室，會不戒於火，將及寢，則撫棺大慟，誓以身殉，火竟滅。

平生鮮聲色之好，惟喜聚書。聞有宋元精槧，或舊鈔善本，不惜多方購置。久之，得宋刻幾百餘種，顏其藏書之所曰「百宋一廛」。元和顧廣圻爲作百宋一廛賦，而自爲之注。

又築蕘圃，招致四方名宿相與談讌其間。友錢竹汀段懋堂程易疇諸先生，與匪

非石王惕夫交尤善。每獲一書，日夜讎校，研索訂正，有校至三四次若五六次者。故所刻士禮居叢書雖寥寥十餘種，率附札記，而得之者幾與「天水」同珍。自著汪本隸釋刊誤一卷，辨證頗詳。又著廣韻姓氏攷未成。卒年六十有三。

(附) 吳騫字槎客，浙江海甯人。諸生友同郡陳鱣，講求訓詁之學，互相質證。著子夏易傳疏二卷，詩譜補亡後訂一卷，篤嗜典籍，遇善本書，輒傾囊購之。先後所得不下數萬卷。顏所居樓曰「拜經」，取東莞臧氏例也。校勘精審，其題跋成藏書記五卷，多資考訂，在錢遵王吳尺牘上。嘗獲宋槧本咸淳臨安志，刻一印文，爲「臨安志百卷人家」，蓋風致如此。先世故有別業在荆谿，每間歲來往。因採訪舊聞，撰桃谿客語五卷。又成國山碑考一卷，陽羨名陶錄二卷，并極詳賅。年八十卒。刊拜經樓叢書若干種，如陶靖節謝元暉羅昭諫諸集，率宋元舊刻，而以己著賢詩文集附焉。藝林重之，與「士禮居」相頡頏云。

紀 昀

紀昀字曉嵐，一字春帆，晚年自號石雲，直隸獻縣人。少而奇穎，讀書過目不忘。夜坐暗室內，二目爍爍如電光，不燭而能見物。比知識漸開，光即斂矣。年二十四，乾隆丁卯科解元。甲戌成進士。散館授編修。己卯，充山西鄉試正考官。庚辰，充會試同考官。辛巳，京察以道府計名。壬午，充順天鄉試同考官。命提督福建學政。癸未，授侍讀。明年，丁父憂。服闋，充日講起居注官，擢左庶子。戊子，授貴州都勻知府，以四品留任，晉侍讀學士。前兩淮鹽運使盧見曾獲罪，有旨籍其家，昀與盧爲姻，漏言於見曾孫蔭恩，革職逮問。戊烏魯木齊。辛卯，召還，授編修。三十八年，擢侍讀，命爲四庫全書館總纂官。丙申，擢侍讀學士，充文淵閣直閣事，日講起居注官。丁酉，京察一等。己亥，擢詹事，旋晉內閣學士，總理中書科。壬寅，授兵部右侍郎，仍兼直閣事。改任不開缺，異數也。癸卯，轉左侍郎。

甲辰，充會試副考官。知武會設貢舉。乙巳，晉左都御史。丙午，轉禮部尙書。充經筵講官。戊申，賜紫禁城騎馬。充武會試正考官。壬子，畿輔水災，奏請截留南漕萬石，設十廠賑饑，全活無算。後爲總憲者五，大宗伯者三。嘉慶元年丙辰，充會試正考官，轉兵部尙書。己未，充武會試正考官。癸亥，六月，以八旬開秩，齎錫珍玩。乙丑，調禮部尙書，協辦大學士，加太子太保，管國子監事。卒年八十二。予諡文達。

公於書無所不通，尤深漢易，力闢圖書之謬。四庫全書提要簡明目錄，皆出公手。大而經史子集，以及醫卜詞曲之類，其評論抉奧闡幽，詞明理正，識力在王仲寶阮孝緒之上，可謂通儒矣！胸懷坦率，性好滑稽，有陳亞之稱。然驟聞其語，近於詼諧，過而思之，乃名言也。公一生精力萃於提要一書。又好爲稗官小說，而嬾於著書。少年間有撰述，今藏於家，是以世無傳者。他所纂輯，如熱河志、歷代職官表、河源紀略、八旗通志、方略會典、三通諸館，咸總其事。

周中孚

周中孚字信之，別字鄭堂，浙江烏程人。幼有孝行，善力學。嘉慶元年，舉拔萃科。阮元撫浙，築詒經精舍於西湖，以處浙中文學士，使修經籍纂詁，先生與焉。游京師，交宋翔鳳，爲刊正所著書十餘事，宋大嘆服。先生屢應鄉舉，不中式。道光初，猶與試。會錢大昕族子爲同考官，得其卷，絕嘆賞，力薦於主者，將列名，以策中數用錢集語，主者疑有私，抑置副車，自是遂無意仕進。旋以薦，客上海李氏。李名筠嘉，嗜搜舊籍，所儲計四千七百餘種，爲其定藏書志。復游嶺南，三載歸，卒於家。年六十四。

先生初讀四庫書提要，謂爲學之途徑在此。乃依其例，取現存目覩諸書，條最篇目，甄敍卷部，更旁臚其鈔槧得失，最數十萬言，著鄭堂讀書記若干卷。別撰孝經集解，逸周書注補正，顧職方年譜，子書考，金石識小錄，詞苑叢話，文錄，詩錄。歿後，其次子不

肖，悉以手稿鬻他姓，無可究問。止讀書記藏，獨山莫氏已逸十之二三。嗣歸其外孫戴望，頗私其說。近烏程劉氏始刻入吳興叢書存七十二卷。

顧廣圻

顧廣圻字千里，號澗齋，江蘇元和人。少孤，多病，枕上未嘗廢書。弱冠，從張白萃遊，館於程氏。程富藏書，因得徧覽，學者稱萬卷書生焉。不事科舉業，年三十始補博士弟子。繼師事江良庭，受惠氏遺學，遂盡通經學小學之義。嘗論經學云：『漢人治經，最重師法。古文今文，其說各異。混而一之，則轆轤不勝矣。』論小學云：『說文一書，不過爲六書發凡，原非字義盡於此。』欲取漢人經注作假借長編而未屬稿。從兄之遠字抱冲，亦邃於學，多藏宋元本書。爲一一訂正之。刻列女傳以傳。

當是時，孫星衍，胡克家，秦恩復，黃丕烈，吳鼐，張敦仁等，并深于校讎之學，莫不推

重，延之刻書。爲孫刻宋本說文，古文苑，廣律義疏。爲胡刻文選，元本通鑑。爲秦刻揚子法言，駱賓王呂衡州兩集。爲黃刻國語，國策。爲吳刻晏子，韓非子。爲張刻撫州本禮記，嚴州單疏本儀禮。每一書竟，綜其所正定者作考異，或作校勘記於後。

又頗服膺宋儒語錄，摘其切近者，成遜翁苦口一卷。平居博覽，咸能識之無遺。每論議滔滔不竭，而是非所在，持之甚力，靡所瞻徇。家故貧，賴爲人校刻博糴以食。雖往來多公卿，卒未嘗有以自潤。晚得痺疾，臥床五年，年七十卒。

自撰思適齋集十八卷，自作記曰：『顧子貧，齋非所能有也；卽身之所寓而思寓焉，而「思適」之名亦寓焉。當其坐齋中，陳書積几，居停氏之所藏，同志之所借，以及敝篋之所有，參互鈎稽以致其思，思其孰爲不校之誤，孰爲誤於校也。思而不得，困於心，衡於慮，皇皇然如索其所失而杳乎無覩。人恆笑其不自適，而非不適也，乃所以求其適也。思而得之，豁然如啓幽室而日月之；舉世之適，誠莫有適於此也。』可徵其用

力勤至云。

錢熙祚

錢熙祚字錫之，一字雪枝，江蘇金山人。先世夙好施與，多隱德。至君坐席豐裕，益務舉慈善事。道光二十三年，南鄉大旱，塘河幾涸，則力籌耕剔深儲，民賴不饑。縣故地瘠民貧，生不能育，死無以殮者多，則又獨力爲公所，二曰與善，曰接嬰，置田若干，以賑生送死無憾。他若杠梁塗路溪堰亭堠，凡可利濟羣衆者，罔不率先倡導，規畫周詳。而淫祀土木之神，則又峻拒焉。

生而敏慧耐深思，長益厲學，探古籍，艱辭奧旨，靡間洪纖，洞若觀火。嘗以昭文張氏墨海金壺抉擇未當，且版燬，計所以重訂之者，乃盡出藏書，聚同志張文虎顧觀光輩商榷去取，討論眞實，準之以文淵閣本，反復讎校，或注案語，或繫札語，其取材分類，

略仿張例，凡十易寒暑，梓成守山閣叢書一百十種，六百五十二卷。復仿鮑氏知不足齋叢書例，輯爲小集，取抱朴子語，名曰「指海」，亦先後刻成十二集。會以海疆捐輸，敍選通判，抵京師，銓有日矣，遘微疾卒於寓齋。年四十有四。

張文虎

張文虎字孟彪，又字嘯山，江蘇南匯人。幼見插架書，輒自翻閱，信筆評其是非。家故貧，十六卽爲童子師，稍獲修脯以供甘旨。不喜帖括，肆力詩古文。道光丙戌，始補邑諸生。明年，丁母憂，境益窘。客授南唐張氏，讀惠錢江戴諸家書，嘆爲學自有原本，馳騫枝葉無益也。則取九經漢唐宋人注疏，若說經之作，由形聲以通其字，由訓詁以會其義，由度數名物以辨其制作，由言語事蹟以窺古聖賢精義所存；旁及子史是非得失，源流異同，以參古今風會之變；益無志於科舉。壬辰大比，試卷墨汗，題詩號舍而出。自

是不復應試。

金山錢熙祚輯守山閣叢書，以屬武陵山人顧觀光，顧推之自代。先後主其家三十年。凡所校讎，叢書外，復有指海珠叢別錄、續藝海珠塵、壬癸兩集、小萬卷樓叢書等，無慮數百種。一時考據家稱善本焉。

嘗三詣文瀾閣縱觀四庫書，手自校錄。胡培、輦陳、奐適同寓西湖，過從商榷甚歡。癸卯，自京師護熙祚喪南還，道維揚，謁阮元、阮深，契之，書函往復無間。咸豐初，李善蘭與英人艾約瑟輩譯重學及幾何原本後九本，爲與校刊參訂之役，艾等大折服，歎爲彼國專家弗能及。

遭赭寇亂，避難回里。曾文正聘主書局事，從皖之寧，暨劉毓崧校讎船山遺書。在寧局所刻，如十一經、四史、文選，皆其獨任。而於史記集解、索隱、正義、考核尤深。歷任督撫咸禮重之。初，江寧克復，保舉以訓導選用。光緒初，援例加州判銜。

所著書已刊者：史記札記五卷，舒藝室全集二十四卷。又嘗以漢魏以來古樂失傳，而古書之存於今者祇滋後人聚訟，乃因端以考其器數，審其聲氣，以究其變異，作古今樂律考一書。顧觀光作殷歷考，所以申鄭氏一家之言；爲證之經傳，知鄭氏誤執緯書及大傳之文，致召誥注破經從厯，而劉歆又損夏皆周，移前五十七年以求密合經文，乃作周初歲朔考以疏通之，併經寇亂散佚。又選錄唐元道州以下諸家文爲十八家文錄若干卷，欲破唐宋八家之固陋，亦未編定。卒年七十八。

莫友芝

莫友芝字子偲，自號邵亭，晚又稱瞿叟，貴州獨山人。父庶吉士與儔，官遵義府學教授，日倡導樸學。先生爲人默然湛深，篤治許鄭之學。當其時，鄭珍亦從教授遊，同志相友善，歷五六年，業益進，黔中士林官師舉交口推鄭莫，而兩人遂名冠西南。

家貧嗜古，喜聚珍本書，積既久，讀之恆徹旦暮不息，寢食並廢。爰通蒼雅故訓，六經名物制度，旁及金石目錄家言，率究及其奧。疏導源流，辨析正僞，鮮銖寸差失。復工詩善書，求者沓至。居常好游覽，喜談論；遇人無貴賤賢愚，一接以和。暇日相與商較古今，評隲術業高下，娓娓忘倦。顧外雖樂易，而中實介然有以自守。

自道光辛卯舉於鄉，其後連歲走京師，朝貴爭欲羅致，必慎擇其可，否卽婉謝之。會試報罷，籤取知縣，且選官，意不所樂，輒棄去。往從胡文忠於太湖，爲校刻讀史兵略。既又從曾文正安慶金陵。凡客文正所者踰十年，江南底定，寓妻子於白下，徧走江淮吳越間，盡識其魁儒碩彥。同治四年，蘇撫李鴻章請州縣吏於朝，有詔徵用，卒不出。十年以往，求文宗文匯兩閣書，赴揚州抵興化，病卒，年六十一。

先生生平志存文獻，思爲黔志一書，潤色邊裔。道光中，偕鄭珍同撰遵義府志，博采漢唐以來圖書地志，荒經野史，援證精確，體倒謹覈，成書四十八卷。時論以配水經。

注華陽國志。又輯明代黔人詩歌，因事存人，因人考事，爲黔詩紀略三十二卷。貴州文獻始爛然可述。

居金陵，得唐寫本說文木部殘卷，自謂『此吾西州漆書也。』以舉正段嚴二家校注，撰箋異一卷。至句容山中，蒐討梁碑，躬自監拓，惟恐一字見遺，撰梁石記一卷。

其餘有聲韻攷略四卷，過庭碎錄十二卷，宋元舊本書經眼錄三卷，附錄一卷，樗萌譜注一卷，邵亭詩鈔六卷，邵亭遺文八卷，遺詩八卷。編訂未竟者，則邵亭經說、書典、經眼錄，舊本未見書經眼錄、影山詞，各若干卷。

譚 瑩

譚瑩字兆仁，號玉生，廣東南海人。幼穎敏，於書無所不窺，而尤長於詞賦。年弱冠，應童子試，時阮元開府粵中，偶遊山寺，見題其壁詩，大奇之，果卽以縣考第一人入泮。

比入學海堂肄業。文達得所作蒲澗修禊序暨嶺南荔支詞百首，尤爲激賞。自是文譽日起，凡海內名流遊粵者靡不慕與締交。乃數奇，鄉場屢報罷。雖程侍卽恩澤素喜獎拔才雋，典試猶失之。直至甲辰科始獲雋。顧淡于榮利，無意進取，僅一循例計偕，嗣後遂不復北上。

任化州學訓導。州民樸魯少文，諄諄以詩書相訓迪。升瓊州府學教授，疊委管學海堂學長，粵秀越華端溪書院監院，凡數十年。後進有可造者，譽之弗去口。加以強記過人，凡先哲嘉言懿行，與夫地方沿革掌故，縱隔時甚久，能備述其顛末。故府縣諸志率延任纂修之役。而有功藝林，尤在校刊叢編巨帙，惟粵中先正遺書焉。

初粵中雖號富饒，而藏書家絕少；由阮文達倡樸學課士，風氣始開。惟版刻無多，轉購他處，價值倍昂，寒峻頗以爲苦。適洋商伍崇曜雄於貲，夙欽服玉生，乃勸其刊刻古書善本，以便流通。躬自讎校，每一書刊竟，復攷證其源流得失爲跋尾。先後成粵雅

堂叢書二十集，總一百八十種。半屬祕冊，王象之輿地紀勝二百卷，亦係字內孤本。

更輯嶺南遺書六十二種，粵東十三家詩集若干卷，楚庭耆舊遺詩七十二卷，則關於本省文獻者也。性質直坦，率用是得享修齡。咸豐中，軍興，以襄辦捐勞績賞內閣中書銜。卒年七十有三。

葉昌熾

葉昌熾字鞠裳，江蘇長洲人。爲人簡淡沈靜，好稽考目錄，辨別版本。光緒初，偕管禮耕，王頌蔚，客常熟瞿氏，編校書錄，所藏無不披覽。繼遊幕羊城，吳憲齋適視學來粵，相與討論金石文字，稱莫逆。壬辰，成進士，入翰林。出潘文勤門，卽館於其家。於是凡滂喜齋宋槧元鈔，又徧閱之。

每自恨家貧，不能多得異書。復歎自來藏書家節衣縮食，矧集善本，曾不再傳，遺

書星散，有名姓翳如之感。因網羅前聞，攬撫軼事，成藏書紀事詩六卷，共二百餘首；由宋迄清，貴如明衡徽諸藩，微如安麓邨錢聽默之屬，悉載靡遺。蓋著錄中之別格也。

邠州城西有大佛寺，石室纍纍，皆唐宋元人題刻。壬寅，被命度隴，盡拓以歸。排纘考訂，成邠州石室錄三卷。

既遊文勤所，遂獲交福山王文敏公諸人，益研求碑版。久之，積至八千餘通。更撰詒石十卷，爲後來考斯學者入門之資。舉夫制作之名誼，標題之發凡，書學之升降，藏弃之源流，以逮撫拓裝池瑱聞雅故，分門別類，條理秩然；則又與藏書紀事詩異曲同工者焉。

國變後，南歸。烏程劉承幹饒於資，好刻書，延繆藝風及先生佐其讎校，題跋尤出先生爲多。近頃始卒。

繆荃孫

繆荃孫字筱山，晚號藝風老人，江蘇江陰人。幼隨宦於蜀，師陽湖湯成彥，雙流宋玉棫。寄籍華陽，因舉四川鄉試。以被攻擊，還試於蘇，再登乙榜。吳棠督川，延致之幕下。時張之洞主蜀學，乃執贄稱弟子，爲撰書目答問以教士。光緒丙子成進士，散館，授編修。己卯，點順天鄉試同考官，得人爲盛。福山王文敏公以經學補薦，由先生力也。壬午，充國史館協修，分纂儒林文苑循良孝友隱逸五傳，忤總裁意，謝事歸。蘇學政王先謙重其才，聘主南菁書院。尋復入都，召見，以記名道府用。先後主奉天灤源，湖北經心講席。擢國史館提調。始，兩湖制府裕祿延修通志，至是又之鄂，任通志役，兼自強學堂分教。張之洞移督兩江，遂就鍾山書院聘，領江楚編譯書局事。書院改高等學堂，任總教習，爲釐訂學程殊詳備。乙巳，薦舉經濟特科，未赴。丁未，再從之洞於鄂，感歐化銳進，國

學日衰，說之洞剝，存古學堂，自任教務長。未幾，江寧端方奏派總辦江南圖書館，宣統元年，唐景宗復奏充京師圖書館正監督。庚戌攝政王召見養心殿，奏對明澈，以學部參議候補。會武昌軍興，謁假南返。袁氏當國後，清史開館，徵任總纂。然年老亦未能成行。旋授參政院參政。卒年七十六。

先生少卽博涉羣籍，長考據，通訓詁，尤精金石目錄之學。雖不若漢人校讎之守專門家法，而考訂同異，辨析源流，固非黃龔輩祇講版本者所可及。嘗主定遠方濬益家，佐成夢園書畫錄，故鑒賞復冠絕一時。駢文流暢，有宋人風度，惟散文稍平闌。乞休後，專事著述，撰有藝風堂讀書記一卷，藏書記八卷，續記十二卷，金石目十八卷，文集八卷，續集八卷，詩集辛壬稿，癸申稿若干卷。纂輯者：續國朝碑傳集一百卷，常州詞錄三十一卷。編刊者：雲自在龕叢書，藕香零拾，烟畫東堂小品，又若干種。

諸子學家列傳第二十

敘目

治諸子實較艱於羣經。蓋自漢世罷黜百家而後，斯學銷沈。六經有歷代注疏可資探討，諸子則舍老莊孫吳爲講道談兵者所依託，餘悉以背聖門之旨，遂棄置不復齒及。然卽所釋老莊孫吳，亦多空言，於訓義固無與也。殆清儒理董經史，引據尙古，子書既多出先秦，不得不以餘力旁治之久，乃愈覺其彌可珍貴，竟躋之羣經之列，徧爲之注。蓋由懷疑於宋明，而上溯六朝隋唐；由六朝隋唐，而上溯東漢魏晉；由東漢而西漢，由西漢而先秦；遞次進求，他日更有發揮而光大之者，此特其端緒耳。

汪 中 孫星衍（并見吳派經學家列傳）

畢 沅（另詳提倡樸學諸顯達列傳）

王念孫（見小學大師列傳）

嚴可均（見小學家列傳）

陳昌齊

莊達吉

洪頤煊 俞 樾 孫詒讓 胡 澍（并見皖派經學家列傳）

戴 望（見常州派今文經學家列傳）

〔王先謙〕（另詳提倡樸學諸顯達列傳）

王先謙祇
荀子可傳
（太炎）

陳昌齊

陳昌齊字賓臣，一字觀樓，廣東海康人。少有神童之目。十六補弟子員。乾隆庚寅舉鄉榜，聯捷成進士。入翰林，散館，授編修，累官至中允。歷充三通四庫國史諸館纂修官，轉河南道監察御史。嘉慶丙辰，升兵科給事中。辛酉，補刑科。疏言：粵東洋匪會匪相爲狼狽，苦瀕海民，若不及時懲創，誠恐釀患日深。上韙之。尋出爲浙江溫處道。因事置誤，部議降調，遂解紐歸。

先生生平博極羣書，自經史子集，以及乾象坤輿之奧，六書入聲九賦五刑之屬，星算醫卜百家衆技之流，靡不貫穿於胸中。戴東原應詔至京，一見輒心折，所校水經注，爲指正其譌舛，緣限於官書，未能更正。東原每引爲憾。邵二雲編修著爾雅正義，取以相質，亦爲駁正三十餘條。歸里後，阮文達督兩廣，聘任通志總纂，兼掌粵秀書院。卒。

年七十八。

先是嘗取漢書史記十三經注疏凡陸氏所未備者錄之爲經典釋文附錄。又著歷代聲韻流變攷，不戒於火，存稿被燬。餘書已刊者有呂氏春秋正誤二卷，淮南子考證六卷，楚辭韻辨一卷，測天約術一卷，臨池瑣談一卷，賜書堂集六卷。未刊者有大戴禮記正誤，老子正誤，荀子正誤，天學脞說，營兆約旨，天玉祕旨別傳，高郵王念孫序其書，許爲皆有以發前人所未發云。

莊達吉

莊達吉字伯鴻，江蘇武進人。邠州知州圻子，錢文敏公維城甥也。幼早慧，儻自喜。父奇其才，不以繩度束。甫弱冠，卽縱使游俠結客，見者咸傾靡。老師宿儒或訾以爲狂，弗之恤也。時省父往來秦中，用詞章受知於王蘭泉畢弁山，又與孫淵如洪稚存、錢

坵爲攷據訓詁之學。嘗讀道藏於南山之說經臺，得淮南子內篇，病其注爲後人所刪改，質諸錢坵。坵謂：『道書中亦非全本，然較之流俗所行者已多十之五六。』因發篋出舊所藏者相與校其同異，正其舛譌。後人誤合許慎高誘兩注爲一，旣爲之疏通旁證，一一抉擇；又辨音爲唐何誘作，非出高氏，均極精確。校成梓於官舍，迄今稱爲善本。故其名益盛。

少年時頗易科舉，及屢試不售，乃始厭苦場屋。值嘉慶戊午，鄉試報罷，遂請於父，納賞爲縣令。仍分發陝西。懼不克肖，致墮父宦績，則悉屏所好輿服聲伎，專力爲治。初署咸陽，再署大荔，補藍田，調咸寧，擢潼關同知。所至有循聲，羣稱爲「小包公」，相戒毋敢犯。比擢潼關，邠州君尙就養，緣天旱禱雨致疾，卒不起，年僅五十有四。

生平工篆書，善畫，通曉音律。三十後，更究心靈素之學。所著惟存秣陵秋，江上纒樂府二種，并校淮南子，餘多湮佚，至可惜焉。

經濟學三字起於清
道光末言
無典據應
從胡安定
治事之名
改爲治事
學
(太炎)

治事學家列傳第二十一

(原稱經濟學家)

敘目

士大夫乘時獲位，舉平日讀書所得，一一能見諸施行，或爲名臣，或爲良吏，國史紀載甚衆，無俟複述。獨有勝朝遺老，匡復既不可望，齎志莫伸，乃推本經術，質之當時典章制度，剴切陳辭，雖未必冀疇範見采于明王，要足供後世之取法。康乾以來，文禁周密，厥風衰矣。及夫清政解紐，內亂外患紛起，處士橫議又熾。而概括前後兩時期，其流別實原本乎周秦諸子，因得以類相從，寧舍徵實以獎空疏哉。

顧炎武

黃宗羲

劉獻廷 (并見先導大師列傳)

胡承諾

王

源 (并見先導大師列傳)

唐甄

包世臣

(龔自珍)

魏源(見攷史學家列傳)

湯鵬

周濟(見作史學家列傳)

凌堃(見皖派經學家列傳)

鄭獻甫

馮桂芬

龔多浮言
應刪
(太炎)

唐甄

唐甄原名大陶，字鑄萬，別號圃亭，四川達州人。從父宦於吳，蜀亂不得歸，因家焉。十四五歲，卽嗜古學，精進淬礪，不拘拘於師說，落筆卓有端緒。性孝友，色養愉愉，中外無間言。然處世乃剛直伉爽，深惡媿媮隨俗。家素貧，求爲祿養，中順治丁酉科四川鄉試，選授山西長子縣知縣。以循良著稱。顧因逃人事，罷去職。罷官還吳，僦居僅三數椽，炊烟恆絕，而振筆著書不輟。曰：『君子當厄，正爲學用力之時。窮陋生死，外也，小也；豈可求諸外而忘其內，顧其小而遺其大哉？』生平綜貫經史，揚榷風雅，非秦漢之書弗讀。嘗研精覃思，著衡書九十七篇，天道人事，前後古今具備。其中曰「衡」者，志在權衡天下也。後以連蹇不遇，更名「潛書」。又撰毛詩傳箋合義，春秋述傳，潛文，潛詩，日記，各若干卷。魏叔子見君潛書曰：『是周秦之書也！今猶有此人乎？』梅定九則遂

錄所著諸書，謂：「此必傳之作，當藏之名山，以待其人耳！」凡爲時推重若此。卒年七十五。貧不克葬，何義門爲請於八親王，賻白金五十兩。

包世臣

包世臣字慎伯，安徽涇縣人。幼從其父郡學君讀，甫齟齬，讀孟子至「五畝之宅，」卽問：「今日制民產何以不如此？」郡學君奇之。少長，雖亦習爲舉子業，而出語咸識本原。父尋卒，遂孤露，且家極貧。弱冠乃奔走四方謀衣食。客蕪湖，會天大旱，爲宋兵備作禱雨文，稟流傳於省中，巡撫朱文正公詢知出君手，召致門下。始徧攻羣經注疏，與張皋文沈小宛李申耆黃乙生錢獻之諸先生游，學日以進。時楚匪披猖，上鄉兵之議，文正歎絕，謂爲「賈晁復生」。於是名益噪。六赴秋闈，始獲一遇。其座主陳周兩侍郎返命，都中冠蓋莫不以得君爲賀。既十三上春官，復遭擯於有司。最後，道光乙未，乃

用大挑，試令江西。攝新喻年餘，坐事被誣劾以歸。寓居江甯，布衣憭然，每作書，自署曰「白門倦游閣外史。」咸豐癸丑，避粵寇亂，卒於途。

先生生值乾隆末葉，見當時百爲廢弛，賄賂公行，民治汙而民氣鬱，殆將有變，思所以禁暴除亂，故學兵家。又見民生日盛，一逢水旱，則道殣相望，思所以勸本厚生，故學農家。又見齊民跬步卽陷非辜，奸民趨死如鶩而常得自全，思所以飭邪禁非，故學法家。既已求三家之學於古，而飢驅行役者數十年，驗之人情地勢殊不相遠，斟酌古今，恆與當事論說所宜。罷官後，隱於雞筠山麓。稟集生平著述：曰中衢一勺者七卷，言水利漕運也；曰藝丹雙楫者九卷，論文論書也；曰管情三藝者十卷，詩賦詞也；曰齊民四術者十二卷，辨兵農禮法也；統稱安吳四種。凡宇宙之治亂，民生之利病，學術之興衰，風尚之醇漓，補救彌縫，百端具設。爲文本苟卿韓非呂覽，詩則導源陸謝，別編倦遊閣集三十卷，未刊。尤工書法，備得古人執筆運鋒結體分勢之奇，故推爲書家正宗焉。

湯鵬

湯鵬字海秋，湖南益陽人。道光三年成進士，授禮部主事。年甫二十，負氣自喜，爲文章震鑠奇特。當軸異其才，選入軍機章京，旋補戶部，轉貴州司郎中，擢山東道監察御史。年亦僅三十餘。意志蹈厲，謂天下事無不可爲者。其議論所許可，獨李文饒、張太岳輩徒爲詞章無當也。於是勇言事，未踰月，三上章。最後以言宗室尙書叱辱滿司官事，言過當；且在已奉旨處分後，罷御史，任戶部員外。而時方草奏，將大有論建，未及上而改官。既見其言不用，遂大著書，欲有所表白於天下。以爲事無論利鈍成敗，有所爲，當震暴人耳目；苟不得施於事而著之言，使吾書出而人以爲古嘗有是言，雖工弗貴也。於是爲浮邱子一書，立一意爲幹，而分數支支之；支之中又有支焉，則支復爲幹，支幹相演，以遞於無窮。大抵言軍國利病，吏治要最，人事情僞，開張形勢，尋躐要眇，篇數

千言者九十餘篇，最四十餘萬言。每遇人，輒曰：『能過我一閱浮邱子乎？』其自喜如此。又爲學術明林十六卷，指陳前代得失；七經補疏，明經義；止信筆初稟，雜記見聞事實。諸作皆出示人。惟止信筆初稟人多未見，或問之，曰：『此石室之藏書也。』

值英人擾海疆，當道議撫許通市。先生憤甚，已黜不得進言，猶條上尙書，請轉奏三十事。雖召見而無所詢，報聞而已。後美國求改關市約，有先生奏中所預計者，人以此服其精，非疏闊大略者也。既更爲本部四川司郎中，京察亦竟不得上考，感慨抑鬱而卒。年四十有四。詩才橫溢，晚多悲憤沈痛之作。存集二十六卷。

鄭獻甫

鄭獻甫，其名避文宗舊諱，以字行，別字小谷，廣西象州人。年十五，入州學。後十年，拔貢，中舉人。又十年，中進士。以主事用，分刑部。請假歸，丁父母憂，遂不出。掌教諸書院。

屢遭寇亂，流離轉徙，喪所著書。總督勞崇光延爲上客。廣東巡撫郭嵩燾奏君學深養遂，通達治體，請飭赴廣東差遺委用。君上書廣西巡張凱嵩，以年老求奏免。張復奏君品高守正，足勵風俗，請賜五品卿銜。君爲書力辭，而疏已上。得旨如所請。同治十一年十月卒於桂林榕湖書院。年七十二。遺命葬不擇時地。桂之官吏朋友門下士，繪像祀之。

象州亂後，民失田契，官失糧冊，訟獄繁興。君請於官，命民呈田數糧數，總算符舊額而止。鄉人服君忠信，無欺僞者。於是官給印照，訟獄遂息。君學識博通，而遇亂禍，所著法論，儲材議，士策，學官議，權論，治盜說，諸篇，皆對時政立論，言之痛切。尤不喜當時之爲文者，以爲道無所謂統，文無所謂派。自明人輯宋五子書，而道之統立；自明人選唐宋八家文，而文之派別。遂若先秦以來之賢人君子，東漢以來之鴻篇鉅製，皆可置之不論。具一孔之見，勒一途之歸，則陳陳相因而已。故惡夫徒知有五子八家者云。

君天資高朗，耿介豪逸，發言行事，純任自然，談笑譏貶，無所避忌。生平無嗜好，惟好書，終日不釋卷，博覽強記。十三經注疏，校勘記，皆有評點。尤熟諸史。爲文章，貫串古今，直抒所見，絕去修飾。凡所著文集六卷，詩集八卷，家記四卷，家藏書目解題四卷，愚一錄若干卷。愚一錄者，說經之書，先被賊劫去，晚年追憶而爲之者也。

馮桂芬

馮桂芬字林一，號景庭，江蘇吳縣人。弱冠補縣學生。道光壬辰舉於鄉。庚子，中一甲二名進士，授編修。文宗御極，大臣疏舉人才，以之與林文忠同薦。旋丁憂歸。比服闋，而赭寇已陷金陵。承詔勸捐輸練鄉團，事辦，敍克復諸城勞，晉五品銜，特旨擢中允。有間之者，因告歸，不復出。向張師潰，賊犯吳郡，羣議赴皖乞曾公援軍，慮不遽應，推先生具草，乃爲陳危急情狀，并時局利鈍，及用兵先後所宜，語甚詳摯。曾許之，令李鴻章率

水陸諸營東下，遂成平吳之功。吳平，李公開府蘇省，數就先生諮訪郡縣利病。如蘇松減漕額，長元吳三縣減佃租，數百年積重難返之弊，一旦頓除。先後主講惜陰敬業紫陽正誼各書院，爲諸生講論學術，成材甚衆。卒年六十六。

先生於書無所不讀，師事李申耆、李尙之兩先生。說經宗漢儒，亦不廢宋。精研小學，兼嗜疇人家言。著有說文段注考正，校邠廬逸箋三種，弧矢算術細草圖解，西算新法直解，校正李氏恆星圖，測定咸豐紀元恆星表，丈田繪圖章程，使粵行記，與修兩淮鹽法志，蘇州府志。尤務爲經世有用之學，凡水利農田鹽漕兵刑諸大政，莫不瞭然於胸中。作抗議四十篇，均關係於民生國命。亭林所謂「若果見之行事，不難躋斯世於治古之隆」者，仲長統昌言，荀悅申鑒，未足比也。顯志堂稿十二卷，并長於治事，不爲浮詞云。

厯算學大師列傳第二十二

敘目

厯算之學，我國表章在昔。至明季西學東漸，從者風靡，幾成「喧賓奪主」之勢；賴有達識，起爲溝而通之，於是其道益光。勿庵融會中西，傾動人主，累世濟美，名滿天下也固已；而曉庵苦心詣微，篤守舊聞，尤不可及。厥後慎修、東原、或羽翼新法，或闡揚古術，并無媿典型云。

（楊光先）

楊光先可
刪
（太炎）

王錫闡

黃宗羲

附子百家
（見先導大師列傳）

梅文鼎

附仲弟文鼎 季弟文鼎 子以燕 孫穀成 劉湘燿

江 永 戴 震(并見皖派經學大師列傳)

錢大昕

附從子塘 坵
(見吳派經學大師列傳)

王錫闡

王錫闡字寅旭，又字昭冥，號曉庵，又號餘不，別號天同一生，江蘇吳江人。少友張履祥，講學以濂洛爲宗。壯益耽究文藝，博覽羣書；厯象之學，尤所篤好。生於明季，當徐光啓等修新法時，聚訟盈庭，先生獨閉戶著述，潛心測算。每夜遇天色澄霽，輒登屋臥鴟吻間，仰觀景象，竟夕不寐。復發厯書玩索，精思於推步之理，宏亮而不滯。久之，則中西兩家異說皆能條其原委，考其得失焉。嘗謂厯法測實增減，宜求定率。說之曰：『古測既爲今日所疑，近測又非今人所信，畫一之法，何時可立。不如及今求其定率，既有微差，他日測驗修改亦易爲力矣。』

其論經星云：『夫距度既殊，則分至諸限亦宜隨易用求差數，其理始全。然必有平行之歲差，而後有朏朧之歲差；有一定之歲實，然後有消長之歲實。以有定者紀其

常，以無定者通其變，乃可垂久而無戾。」

其辨西法宮閏之失云：『大略西之宮閏實難與中法并行，而會通兩家又非目前諸人所及，故不勝齟齬之病。』新法推步交食密於舊法，而亦有差失。推求其故曰：『交食之法，西厓亦略盡矣。乃所推戊戌仲夏朔食已亥季夏望食差數已著，則致差之故豈宜不講。不知日食不惟虧復二限不在定限，卽食甚之時亦非眞遠。正論食甚已不能以入轉均數求其必合，况初虧復明，距度尤殊。地景日景，實因遠近損益。最卑之地景大，日入景深，食分不得反小，最高之地景小，月入景淺，食分不得反大。此與幾何公論自相矛盾，儻亦致差之一端乎？』

其論日月五星天因及新法推測之誤曰：『新法既謂星天以太陽爲心，則本天之行既爲歲行，乃復設本天仍以地心爲心。法既不定，安所取衷。考木火土三星之行，與金水二星不同。金於本圖右旋，木火土三星於本圖左旋，皆爲日天所挈而東。左旋

之數，土最疾，木次之，火又次之。自右旋論，則疾者反遲，遲者反疾。故今日在最高者法應遲，而視行爲疾；衝日在最卑者法應疾，而視行爲遲爲退。蓋本圖之遲疾爲左旋，而視行之遲疾則右旋也。此理甚明，何莫之察耶！

復統論新法舊法曰：『欲知新法之誠非，須覈其非之實；欲使舊法之無誤，宜釐其誤之由；然後天官家言在今可以盡革其弊，將來可以益明其故矣。舊法之屈於西法也，非法之不若也，以甄明法意者無其人也。若是則何從而可從乎天而已。古人有言：「當順天以求合，不當爲合以驗天。」法所以差，固必有致差之故；法所吻合，猶恐有偶合之緣。測愈久則數愈密，思愈精則理愈出。以古法爲型範，而取才於天行，考晷漏，審圭表，慎擇人，詳著法，則異同之見漸可盡泯；成憲一定，不難媲美羲和，高出近代矣。』

先生心以明大統厯爲疏，崇禎間，改用新厯法，亦未盡善，乃著曉庵新法，兼採中

西，去其疵類，參以己見，成厯法六篇，會通若干事，考正若干事，增補若干事，表明若干事，立法若干事。且於序中具列西人不知法意者五，當辨者十。其書定爲六卷。雖私家撰述，未見施行，而爲術精妙，識者莫不稱善。更彙括中西步術，作大統西厯啓蒙。丁未歲，因推步大統法，作丁未厯彙。辛酉八月朔日食，以中西法及己法豫定時刻分秒；至期，與徐發等以五家法同測，己法獨合。作推步交朔測日小記。西法謂「五星皆右旋，」則以爲土木火實左旋，當改歲輪爲不同心圈，則理數畫一。作五星行度解。術家言「日月右旋，」儒者云「左旋，」二說不同；今定爲日月實右旋。作日月左右旋問答。治厯首在割圓，作圓解。測天當據儀晷，造三辰晷，兼測日星，因作三辰晷志。其書又若干卷。以布衣終於家，年五十五。

梅先生勿菴曰：『從來言交食者只有食甚分數，未及其邊。惟王寅旭則以日月圓體分爲三百六十度，而論其食甚時所虧之邊凡幾何度。今爲推衍，其法頗精確。』

然則麻象攷成以上下左右算交食方法，蓋本於先生矣。惟先生無子，其遺書知之者少，故不如梅氏之學盛行。持平論之，曉庵精審，勿菴博大，各造其極，未可軒輊也。

梅文鼎

附仲弟文鼐

季弟文鼐

子以燕

孫穀成

劉湘燿

梅文鼎字定九，又字勿庵，安徽宣城人。年二十七，與弟文鼐共習臺官交食法，著天學駢枝六卷。值天學書之難讀者，必求其說，至廢寢食。疇人弟子，皆折節造訪。有問者，亦詳告之無隱。所著天算之書八十餘種。

初，先生嘗讀元史授時法經，嘆其法之善，作元史天經補注二卷。又以授時實集古算法之大成。然剟法五端外，大率多固古術。因參校古術七十餘家，著古今天法通考七十餘卷。授時以古術考古，今冬至，取魯獻公冬至證，統天術之疏，然依其本法步算與授時所得正同，作春秋以來冬至考一卷。元史西征庚午元術「西征」者，謂太

祖庚辰也。庚午元一者，上元起算之端也。志訛太祖庚辰爲「太宗」，不知太宗無庚辰也。又訛上元爲庚子，則於積年不合也。考而正之，作庚午元法考一卷。授時非諸古術所能比，郭守敬所著法草，乃法經立法之根。括其義之精微者，作郭太史法草補注二卷。立成傳寫譌舛，不得其說，不敢妄用，作大統立成注二卷。授時法於日纏盈縮，月離遲疾，並以垛積招差立算，而九章諸書無此術，從未有能言其故者，作平定三差詳說一卷——此發明古法者也。

先生又以唐之九執算法，實爲西法之權輿，其後有婆羅十一曜經及都聿利斯經，皆九執之屬。在元則有札馬魯丁西域萬年法，在明則有馬沙亦黑馬哈麻之回回法，西域天文書，天順時貝琳所刻天文實用，卽本此書。作回回法補注三卷，天文書補注二卷，三十雜星考一卷。表景生於日軌之高下，日軌又因於里差而變移，作四省表景立成一卷。周髀所言里差法，卽西人之說所自出，作周髀算經補注一卷。渾蓋之器，

最便行測，作渾蓋通憲圖說訂補一卷。西國日月以太陽行黃道三十度爲一日，作西國日月考一卷。西術有細草，猶授時之有通軌也，以天指大意隱括注之，作七政細草補注三卷。新法有交食蒙求七政蒙引二書並逸，作交食蒙求訂補二卷，附說二卷。監正楊光先不得已日食圖，以金環與食甚時分爲二圖，而各具時刻，其誤非小，作交食作圖法訂誤一卷。新法以黃道求赤道，交食細草用儀象志表，不如弧三角之親切，作求赤道宿度法一卷。謂中西兩家之法，求交食起復方位，皆以東西南北爲言；然東西南北惟日月行午規而又近天頂，則四方各正其位矣。自非然者，則黃道有斜正之殊，而自虧至復，經歷時刻，展轉遷移，弧度之勢頃刻易向。且北極有高下，而隨處所見不同，勢難施諸測驗。今別立新法，不分東西南北之號，惟人所見日月圓體，分爲八向，以正對天頂處，命之曰上；對地平處，命之曰下；上下聯爲直線，作十字橫線，命之曰左，曰右；此四正向也。曰上左，上右；曰下左，下右；則四隅向也。乃以定其受食之所在，則舉目

可見。作交食管見一卷。太陽之有日差，猶月離交食之有加減，時因表說有誤，作日差原理一卷。火星至爲難算，至地谷而始密，解其立法之根，作火緯本法圖說一卷。訂火緯表記，因及七政，作七政前均簡法一卷。金水歲輪繞日，其度右移；上三星軌迹，其度左轉；若歲輪則仍右移。作上三星軌迹繞日圓象一卷。天問略取黃緯不真，而列表從之誤。作黃赤距緯圖辨一卷。西人謂日月高度等，其表影有長短，以證日遠月近，其說非是。作太陰表影辨一卷。新法帝星句陳經緯刊本互異，作帝星句陳經緯考異一卷。測帝星句陳二星爲定夜時之簡法，作星晷真度一卷。——以上皆以發明新法算書，或正其誤，或補其闕也。

康熙間，清廷開局修明史，天文志爲吳任臣所修，徐善劉獻廷楊文言各有增定，最後以屬黃宗羲，黃又以屬先生。先生擇其譌舛五十餘處，以天草通軌正之，成明史志擬稿三卷。雖爲大統而作，實以闡明授時之奧，補元史之闕略。其總目凡三：曰發源，

曰立成，曰推步。又作天志贅言一卷，大意言明用大統，實卽授時；宜詳元史所闕以補未備。又回回法承用三百年，法宜備書明鄭世子之天學，袁黃之天法新書，唐順之之周述學之會通回法。以庚午元法例例之，皆得附錄。其西法方今見行，然徐李測驗改憲之功不可滅也，亦宜備載緣起。

康熙二十八年，先生至京師，大學士李光地請其作簡要之書，俾人人得其門戶，因作天學疑問三卷。四十二年，光地扈駕南巡，駐蹕德州，有旨取文鼎書，以天學疑問進，獎諭有加。四十四年又南巡，召對御舟中，賜御書扇幅及珍饌，並賜「績學參微」四大字。五十一年，命其孫穀成內廷學習；明年，賜舉人；又明年，賜進士。先生所著書，魏荔彤兼濟堂纂刻者凡二十九種，穀成別爲編次，更名梅氏叢書輯要，總二十五種，六十二卷。未刻者，今失傳。康熙六十年卒，年八十九。

(附) 仲弟文鼎字和仲。初學厯時未有五星通軌，無從入算，與勿庵取元史厯經以

三差法布爲五星盈縮立成，然後算之，共成步五星式六卷。早卒。

季弟文鼎字爾素。嘗著中西經星異同考一卷。以三垣二十八宿星名依步天歌次第臚列其目，而以中西有無多寡分注其下，載古歌西歌於後。古歌卽步天歌，西歌卽利瑪竇所撰經天該也。其南極諸星，則據湯若望算書及南懷仁儀象志爲考證補歌附之於末。至其累年算稿，勿庵爲錄存，名曰授時步交食式一卷。又有幾何類求若干卷。

子以燕字正謀。康熙癸酉舉人。於算學頗有悟入。有法與加減同理，而取徑特殊，能於恆星厓指中摘出致問，勿庵所謂『能助余之思也』。惜亦早卒，未充其學。

孫穀成字玉汝，號循齋，又號柳下居士。勿庵嘗疑日差既有二根，卽宜列二表。君以爲定期時既有高卑盈縮之加減矣，茲復用於此，豈非複乎？勿庵因其說而覆思，然後知交食表之非缺。比之童烏九歲能與太玄。康熙己未成進士，改編修累官至

左都御史。君通籍後，得肄業蒙養齋，以故數學日進。御製數理精蘊，麻象考成諸書，咸任分纂焉。立天元術，有明三百年來，雖唐荆川、顧箬溪所不能知，獨取西洋借根方法，證以授時麻草，悟其名異而實同，使洞淵遺法，一旦復顯於世。明史館開，與修天文麻志，呈總裁書，辨兩志不當合而爲一；及月犯恆星爲天行之常，無關休咎，不應登載；五星犯月入月，爲理所必無，宜削；諸事均具卓識。又撰時憲志，用圖論儀象論，亦有關於典制者。卒年八十三。諡文穆。所著增刪算法統宗十一卷，赤水遺珍一卷，操縵厄言一卷。復重編其祖勿庵麻算叢書，訂定爲梅氏叢書輯要六十四卷，雕版以行。

劉湘燿字允恭，湖北江夏人。性穎悟，負奇氣。少工書，未幾舍去，慨然求古今孤絕之詣，經世之業。尤傾服顧亭林，梅定九。作六書世臣說。六書者，日知錄，通雅，麻法，天學會通，方輿紀要，麻算叢書也。初聞宣城梅氏以麻算名當世，乃走千里受業其門。

湛思積悟，多所創獲。梅氏得之甚喜，其與人書曰：『金水二星曆指所說未徹，得劉生說而知二星之有歲輪，其理確不可易。』因以所著麻學疑問屬之討論。君爲著訂補二卷。復著五星法象編五卷。梅氏亦摘其精言入自撰五星紀要。又欲爲渾蓋通憲天盤安星之用，以戊辰厯元加歲差用弧三角法，作恆星經緯表根一卷，及月離交均表根，黃白距度表根各一卷，皆以補新法所未及。由是君之麻學，人爭推之。大將軍年羹堯聞其名，禮聘至幕下，頗親重；卒測其驕悖必敗，引去。遊諸節鎮大府間，雖時見諮詢，而所謂輿地、河漕、食貨、兵防之略，足以待世用者，舉末由見諸施行，知終無以達其志，遂歸而著書以老。惜無子，書多散佚不傳。

麻算學家列傳第二十三

敘目

自清聖祖篤好算學，提倡在上，嚮慕遂衆。凡經學家，研究六書外，兼治九數。加諸天元四元佚而復顯，代數微積月異日新，較之前哲，益多創獲。阮文達著疇人傳，羅士琳諸可寶，續補之，斯學變遷之迹，紀述略備。茲但擇其犖犖大者，最錄以例其餘。

薛鳳祚 附孫蘭

方中通

陳厚耀

程瑤田 孔廣森 附族叔繼涵 族弟廣牧

焦循 許桂林 (并見皖派經學家列傳)

褚寅亮（見吳派經學家列傳）

談泰

李潢

姚文田（見小學家列傳）

李銳

汪萊

董祐誠

羅士琳（附易之論）

張作楠

項名達（附戴煦）

徐有壬（附夏鸞翔）

劉衡

丁取忠（附吳嘉善）

李善蘭

無錫華氏兄弟傳（衛芳世芳）

薛鳳祚 附孫蘭

薛鳳祚字儀甫，山東淄川人。嘗師事定興鹿善繼，容城孫奇逢，著聖學心傳，發明「認理尋樂」之旨。嗣從魏文魁學天文，主持舊法。順治中，與西人穆尼閣游，遂改從西學，盡傳其術。因成天學會通十餘種。其曰「對數比例」者，卽西洋之「假數」也。曰「中法四線」者，以西法六十分爲度，不便於算，改從古法，以百分爲度，表所列止正弦餘弦，正切餘切，故曰「四線」。其推步諸書，曰「太陽諸行法原」，曰「木火土三星經行法原」，曰「交食法原」，曰「歷年甲子」，曰「求歲實」，曰「五星高行」，曰「交食表」，曰「經星中星」，曰「西域回回術」，曰「西域表」，曰「今西法選要」，曰「今法表」。皆會中西以立法。以順治十二年乙未天正冬至爲元，諸應皆從此起算。以三百六十五日二十三刻三分五十七秒五微爲歲實，黃赤道交度有加。

減，恆星歲行五十二秒，與天步眞原同。梅氏算書記所謂「青州之學。」時人以與王曉庵並稱。「南王北薛。」又著兩河清彙考，究黃河運河以及職官夫役道里之數，歷代治河成績，援據古今，疏證頗詳。

(附) 孫蘭字滋九，一名禦寇，江蘇江都人。明季補諸生，後棄去。於書無所不窺，尤精

九章六書之學。順治初，西人湯若望爲欽天監監正，君從之受麻法，遂盡通泰西推步之術。著書八卷，曰理氣衆數辨疑糾繆。又以中國土地在大圓中才八十一分之一，不推極之，則狃於習聞習見，而無以盡其變；於是作格理推事外方考證四論，以窮極夫天地之所以始終，山川之所以流峙，人所以生，國所以建，古今所以遞沿革，人物所以治亂，成古今凡三十二編，爲四卷。又推三光之變，謂「象懸於天，無與人事；而彗孛盈縮出見，皆有常度；水旱地震，亦有常經。」語皆科學至理。惟陰陽災變之說，惑溺已深，時人頗不謂善也。又作山河大地圖說，一以赤道爲心，一以北京天

頂爲心，明地圓之旨。阮文達公得其本，爲潤色之，易名輿地隅說，刊入文選樓叢書。嘗創河淮分流議，河臣王條上之，亦格不行。卒年九十餘。

方中通

方中通字位伯，安徽桐城人。故明翰林以智子。初以智著通雅五十二卷，於訓詁名物皆有徵實。君少傳父業，稽古有機思，喜量圭黍，察儀漏，以古九章法僅存條目，鮮能尋繹其義，乃據御製數理精蘊推闡之，復列數原律衍幾何約珠算筆算籌算尺算諸法，輯諸家說，刪取其長，制爲一書，名數度衍，凡二十四卷，附錄一卷。謂「九章皆出於勾股，環矩以爲圓，合矩以爲方，方數爲典，以方出圓，勾股之所生也。少廣，方圓所出也。方田商功，皆少廣所出。一方一圓，其間不齊，始出差分而均輪對差分之數盈朒借差求均。又差分均輪所出，而以方程齊其窮。度量衡原出黃鐘粟布出焉。黃鐘出于方

圓者也。』又謂：『古法用竹徑一寸長六分二百七十一而成六觚爲一握，後世有珠算，而古法亡矣。泰西之筆算籌算，皆出九九尺算，卽比例規，出三角。乘莫善於籌，除莫善於筆，加減莫善於珠，比例莫善於尺。』時廣昌揭暄亦明算術，與君論難日輪大小得光肥影瘦之故，及古今歲差之不同，須測算消長以齊之，別錄爲一書，曰揭方問答。他著有物理小識十二卷，及浮山文集。

陳厚耀

陳厚耀字泗源，號曙峯，江蘇泰州人。康熙丙戌進士。官蘇州府教授。李光地薦其通天文算法，引見，改內閣中書。聖祖命試以算法，繪三角形，令求中線及問弧背尺寸。先生具劄進，稱旨，命入直內廷，授編修，與梅穀成同修書。聖祖嘗謂梅穀成云：『汝知陳厚耀否？他算法近日精進，向曾受教于汝祖，今汝祖若在，尙將就正于彼矣！』又嘗

召至御座旁，教以幾何算法。上嘗問曰：『汝能測北極出地高下否？』對曰：『遇春秋二分用儀器測之，可得高度。若餘節氣，又有加減之異。然亦不準何也？』地上有朦氣之差，以人目視之，有升卑爲高，映小爲大之異，故以渾儀測之多不合，惟在天度數則不差耳。』又問：『地周三百六十度，依周尺每度二百五十里，今尺二百里，地周幾何？徑幾何？』對曰：『依周尺地周九萬里，今尺七萬二千里，以圍三徑一推之，地徑二萬四千，以密率推之，當得地徑二萬二千九百一十八里有奇。』又問：『地圓出何書？』對曰：『以周髀算經曾言之。』問：『何以見其圓也？』對曰：『職方外紀西人言繞地過一周四市皆生齒所居，故知其爲圓。且東測影有時差，南北測星有地差，皆與圓形相合，故益知其爲圓。』累遷司業，左諭德，以老疾致仕，卒於家。年七十有五。

先生治春秋，尤究心天算。嘗補杜預長麻爲春秋長麻十卷。其凡有四：一曰麻證，備引漢晉隋唐宋元諸史志及朱載堉麻書諸說以證推步之異，又引春秋屬辭杜預

論日月差謬一條爲注疏所無，大衍厯議春秋厯考一條亦唐志所未錄，尤足以質考證。二曰古術：古以十九年爲一章，一章之首，推合周術正月朔冬至前列算數，後以春秋十二公紀年橫列爲四章，縱列十二公積而成表，以求術元。三曰厯編：舉春秋二百四十二年一一推其朔閏及月之大小，而以經傳干支爲證佐。皆述杜預之說而考辨之。四曰厯存：以古術推隱公元年正月庚戌，杜預長厯則爲辛巳朔，乃古術所推之上年十二月朔，謂元年之前失一閏，蓋以經傳干支排次知之。先生則謂如預之說，元年至七年中書日者雖多不失，而與二年八月之庚辰，三年十二月之庚戌，四年二月之戊申，又不能合。且隱公三年二月己巳朔日食，桓公三年七月壬辰朔日食，亦皆失之。蓋隱公元年以前非失一閏，乃多一閏，因退一月就之，定隱公元年正月爲庚辰朔，較長厯實退兩月，推至僖公五年止，以下朔閏因一一與杜術相符，故不復續載焉。其所推較杜預爲密。原書采進四庫，傳刻漸稀。光緒間，長沙王益吾祭酒，督學江蘇，刊入皇

清經解續編。民國癸亥，泰縣韓止石省長，得羅士琳手輯本，刊入海陵叢刻第十二種，益足資明算經師證訂焉。又撰春秋戰國異辭五十四卷，通表二卷，摭遺一卷，春秋世族譜一卷。馬宛斯爲繹史，彙采三傳國語國策，先生則皆摭於五書於外，尤獨爲其難。氏族一書，與顧棟高大事表互證，則春秋氏族之學幾乎備矣。此外尙有禮記分類，七史正譌諸書，今不傳。

談 泰

談泰字階平，一字星符，江南上元人。由乾隆丙午舉人，大挑，選授山陽縣學教諭，轉南匯縣學訓導。淹通經史，專志選述，不爲世俗之學。凡音律算數，無不精通，尤長援引考覈，務求其是。嘗從學於錢竹汀先生，竹汀贈序中有云：『中法之紬於歐羅巴，由於儒者之不知數。東原氏歿，斯學無傳。比來金陵，得談子階平，其於斯學，殆幾於深造』

者。』蓋稱許如此。

先是，竹汀從子塘，剏「周徑率」階平，因作一丈徑木板，以篋尺量其圓周正，得三丈一尺六寸有奇，乃反覆引伸，廣援博證，撰周徑說一卷，以爲漑亭之說確不可易。復與江都焦里堂、歙縣汪孝嬰相友善。里堂著開方通釋，曾及之；互相證訂。又以五經中罕言算術，惟王制論里畝及之，然注疏歧誤，折中綦難，則取梅氏「方田度里」一篇，逐句疏解，加以詳推，成王制里畝算法解，并里算法解，各一卷。凡所撰算術書三十餘種，存者僅此而已。其考證經史之書，曰觀書雜識二十卷。別有詩文集若干卷。

李 潢

李潢字雲門，湖北鍾祥人。乾隆辛卯成進士，由翰林官至工部左侍郎。博綜羣書，尤精算學。推步律呂，并臻微妙。與開化載簡恪公共究中西之奧。兩人皆宗中法，志同

道合，遂爲莫逆交。嘗著九章算術細草圖說九卷，附海島算經圖說一卷。簡恪序其書，謂：『漢嘗言陳其數者，下學之言也；知其義者，上達之功也。有數先有象，有象皆可繪。舊注所云解此，要當以茶者一一顯之於圖。於東原氏所謂舛錯不可通者一一疏而通之，探頤索隱，鈎深致遠，臚名標目，咸式古訓。亦猶劉徽析理以辭，解休用圖之意也。』書甫寫定，卽一病不起，遺囑付吳門沈欽裴算校，越八歲，其甥程喬采延沈至家校訂，而後付刊，以成其志。

九章之外，最著者莫如王孝通之輯古唐制，開科取士，獨輯古四條，限以三年，誠以是書隱奧難通也。雖經陽城張氏以天元一術推演細草，但天元一術創自宋元時人，究在王氏後，似非此書本旨，則復本九章古義爲之訂正。凡其誤者糾之，闕者補之，成考注二卷，以明斜袤廣狹割截附帶分并虛實之原，務如其術乃止。遺稿亦喬采刊布，而武進李申耆爲之序云。

李銳

李銳字尙之，一字四香，江蘇元和人。幼開敏，有過人之資。於書塾見算法統宗，竊窺之，心知其義，遂爲九章八綫之學。補縣學生。家貧授徒自給。暇輒鑽研厯算，久而益精。

唐王考通輯古算經，詞理隱奧，無能通之者。乃與陽城張敦仁共著細草，詳論二十術，而商功之平地，役功廣袤之術，較若列眉。

嘗從同邑顧廣圻借得宋秦九韶數書九章，晝夜窮探不息，乃知天元一術與借根方異，著論暢衍郭守敬李冶之旨，兼補宣城梅氏所未備。

又謂：『四時成歲，首載虞書；五紀明厯，見於洪範；厯學乃致治之要，爲政之本。通典通攷置而不錄，不亦愆乎！』因著厯法通攷。其書體例，大略以顓頊夏殷六厯記載。

有闕；太初術本之殷厯，立法闕疏；三統法雖推法較密，而亦用太初四年增一日之術，是四分同於太初也。故斷自三統術始，至清初橢圓法止。其唐瞿曇悉達九執厯，宋荆執禮會天厯，史志佚其法，則求之於開元占經，及寶祐四年會天厯條流既具，書竟不就，惟成三統術注，四分術注，乾象術注，奉元術注，占天術注，日法朔餘強弱考六科而已。

阮元撫浙，曾延至西湖，爲校禮記正義，并佐輯疇人傳。元朱世傑四元玉鑑雖用天元一術，敦仁在南昌見其書，覺其菱草形正員法易讀難通，特函商俾爲推究。會已櫻疾，猶報尋指意，演成數段復之。書甫達而卒。年五十。

先生天稟高朗，潛心經史，徒以憂傷抑塞，致不永年，良可慨矣！所著尙有召誥洛誥攷，方程新術草，句股算術細草，孤矢算術細草，開方說，合刊爲李氏遺書若干卷。

汪 萊

汪萊字孝嬰，號衡齋，安徽歙縣人。其學實自得，不由師授。弱冠後，讀書吳葑門外數年，苦心冥索，盡得中西之秘，亦未嘗與吳中人士相接。嘉慶丁卯，舉優貢生，赴京師朝考，大學士祿康薦修國史天文志，議叙以教官用，選石埭縣學訓導。癸酉，卒於官，年止四十六。

天資敏絕，深經學，十三經注疏每背誦如流水，而又能心通其義。人有質疑問難者，隨事闡明，略無疑滯。既嗜疇人術，而性能攻堅，極繁頤幽祕，他人翻覆再三，未克理其緒，考嬰目一二過，輒默識靜會，已洞悉其本原，而貫通其條目，是非間隙，毫髮莫遁。人所言，不復言；所言，皆人所未言，與人所不能言，故其著述雖僅傳衡齋算學七卷，而簡奧似周秦古書。

八線之制，終於三分取益，用益實歸除法求之，乃以一表之真數，僅得十之二，因悟得五分之一，通弦與五分之三通弦交錯爲三角形比例立法，以取五分之一之通

弦，而弦切之數益密。梅氏環中黍尺有以量代算之術，惟求倚平儀外周之兩角，而縮於內半周之角未詳；則以爲易更立新法量取不倚外周之角度，而三角之量法始全。堆垛有求平三角立三角尖堆積法，不及三乘方以上，復爲推而補之，自三乘四乘以上之尖堆，皆可由根知積，因卽諸物遞兼之法以補古九章所未備。——凡此引伸觸類，莫不探幽索隱，條疏層解。所尤獨得者，爲糾正梅文穆公勾股知積之術，并與李尙之論天元一元正負開方之可知不可知。然卒因此及尙之齟齬。實則尙之究乎既商之後，孝嬰審於未商之先，言若殊趨，義實互證也。

董祐誠

董祐誠字方立，初名曾臣，江蘇陽湖人。幼穎異，未弱冠已與兄基誠騰蹕士林。舉嘉慶戊寅順天鄉試。

既負經世才，衣食奔走，足跡半中國。凡夫山川形勢，政治利弊，采覽所及，歷歷識之不忘。少時，喜爲沈博絕麗之文。稍長，更肆力於律厯輿地名物諸學。涉獵益廣，致力著述。尤善深沈之思，書之號鈞棘難讀者，過眼無不通曉。復爲出新意，闡隱曲，補罅漏。專門名家殫數十年之功而探索者，晨夕間已突然上之。嘗取西士杜德美圓徑求周諸術反覆推解，知卽圓容十八觚之術，引伸類長，求其壘積，實兼差分之列衰，商功之堆垛，而會通以盡句股之變。乃爲分圖著解，並立絃矢互求四術，成割圓連比例術圖解三卷。斜弧三邊求角，薛儀甫梅文穆二家義法未顯，知此術之專爲對數立也，因別爲圖解，更補求又一角術，成補術一卷。知橢圓如縱方，橢圓有大徑有小徑，有周有積，必知其二，然後可求其餘，猶縱方之句股形，成橢圓求周術一卷。得求諸乘方所成之方錐堆術，復以縱方堆推之，而得諸乘方所成之縱方堆術，成堆垛求積術一卷。又以錢大昕三統術衍雖詳覈，然于剏術之原猶欠具備，爲依太初元年月五步比而列

之，入以演譯之法，成衍補一卷。

惟素矜抱負，本欲有所施於世，特以偏曲一節著，非其志也。董故世胄，值中否，及三試禮部報罷，意不能無拂鬱；又所業卒隱蹟深微之書，讀之疲神，雖精慧過人，而用之無度，坐是卒就衰耗，年僅三十三，中道奄然，論者惜之。他著尚有水經注圖說殘豪四卷，文甲集二卷，乙集二卷，蘭石詞一卷。

羅士琳 附易之瀚

羅士琳字次瑔，號茗香，江蘇甘泉人。監生。循例貢太學，游京師，用攷取天文生，出院元門，故相從最久。阮公再撫浙西，初開詁經精舍，名彬畢集，因得徧交通人，於當代明算之士尤多相識。咸豐辛亥，詔徵舉考廉方正，郡縣交薦，以老病辭。癸丑，粵寇陷揚州，死之年垂七十。

先生少爲舉子業，已盡棄去，專力步算疇人之書，日夕研求。初精習西法，撰憲法一隅，闡明厯學。復撰比例匯通四卷，後雖悔其少作，實便初學問塗也。既獲覩元朱氏四元玉鑑，於是服膺嘆絕，遂一意專精於天元四元之術。以朱氏此書，實集算學之大成，乃殫力一紀，步爲全草，併有原書於率不通及列算傳寫之譌，悉加標識，補漏正舛，疑義更反覆設例以明之，推演訂證，廣爲二十四卷。阮文達爲之作序。

又嘗著春秋朔閏異月攷二卷，徧列黃帝以來七麻條，其同異以補宋五子之書之亡。又以祖氏綴術失傳，則融會諸家法意，作輯補二卷。又甄錄古今疇人，仍依阮氏體例，作續傳六卷。二十年後，集所校著，都爲觀我生室彙稿十二種，如玉鑑細草二十四卷，釋例二卷，續疇人傳六卷，校正算學啓蒙三卷，割圓密率捷法四卷，均別單行本外；已刊者尙有：句股容三事拾遺三卷，附例一卷，三角和較算例一卷，演元九式一卷，臺錐積演一卷，周無專鼎銘攷一卷，弧矢算術補一卷，推算日食增廣新術一卷，凡七

種。其餘：交食圖說舉隅，句股截積和較算例，淮南天文訓存疑，博能叢話，復若干卷。均未梓行。

(附) 同縣學友易之瀚字浩川，亦篤嗜算術，嘗從問難。著讀四元釋例一卷，增例一卷。

張作楠

張作楠字丹邨，浙江金華人。由處州府學教授，歷陽湖縣太倉州，升徐州知府。以不得於當道，將改簡，遂乞假歸。優遊林下者十餘年。

生平酷嗜西人麻算之學，居官不事應酬，嘗曰：『與其浪費無益，孰若以薄俸招致工匠製儀器刻算書，俾絕學大昌乎。』所著若干種，總稱翠微山房數學。大率皆西人成法，推而演之。量取坤輿全圖經緯線列爲全表，附諸日晷法，成揣籥小錄一卷。又

推算各節氣太陽距地平高弧列表於前，更取直橫各一尺表景亦如前法，列表於後，成續錄三卷。又取正弧及斜弧三角，括以二十八例，成弧三角舉隅一卷，弧角設如三卷。又測道光癸未天正冬至星度各中星列表，並附星圖及歲差日差諸表，俾可逐年逐日依法加減，使中星與時刻互求，成新測中星圖表一卷，金華晷景表二卷，金華更漏中星表三卷。又推癸未年各恆星，以至天漢起沒，黃赤經緯度，成恆星圖表一卷。又因八線及八線對度表十杪爲率，嫌其繁重，爰取簡便，以每度六十分列表，成八線類編三卷，八線對數類編二卷。又推北極出地諸度各節氣逐時刻太陽高弧度分，成高弧細草一卷。復彙采諸書量倉田各法，成倉田通法十四卷——雖大半不外乎鈔撮，然削繁就簡，亦足見其苦心矣。

項名達 附戴煦

項名達原名萬準，字步萊，號梅侃，浙江仁和人。嘉慶丙子舉人，考授國子監學正。道光丙戌成進士。改官知縣，不就職，退而專攻算學。年六十二卒於家。

先生與烏程陳助教杰、錢塘戴處士煦，交契最深。晚年造詣益精進。謂古法爲無所用，不甚涉獵，而專意於平弧三角。與助教意不謀而合。癸卯夏，陳以事至杭州，冒雨詣之，縱言至於三角。梅侃曰：『平三角兩邊夾一角，逕求夾角對邊，向無其法，竊嘗疑而得之，君聞之乎？』陳曰：『未也。』因錄其法以歸。其傾倒如此。著述甚富，傳者但有下學庵句股六術及圖解一卷。以句股相求和較諸題術稍繁雜，初學恆難了然，乃取舊術略爲變通，分術爲六，使題之相同者通爲一術，釐然悉有以御之，繁雜可無復慮矣。又著象數原始一書未竟，疾革時，遺書屬戴處士足成之。處士爲補六七兩卷。徐莊愍公索定本付梓。惜莊愍殉難，書與版同付劫灰。弟子夏鸞翔最有名。

(附) 戴煦字鄂士，浙江錢塘人。文節公弟也。補府學增廣生員。絕意進取，援例貢成

均聞文節殉難，亦赴井死。年五十六。幼卽好疇人學，晝讀夜布算，覃思有得，則起秉燭以記。少撰九章重差圖說一卷，句股和較集成一卷，又四元玉鑑細草若干卷，略同羅書，而圖解明暢過之。中年愈精進，著對數簡法二卷，續一卷，外切密率四卷，假數測圖二卷，復合四書付刊，總名曰求表捷術。其他有音分音義二卷，莊子內篇順文二卷，陶淵明集註十卷，玄空秘旨一卷，稿藏於家。

徐有壬 附夏鸞翔

徐有壬字君青，亦字鈞卿，浙江烏程人。用宛平籍，舉順天鄉試。道光己丑，成進士，改主事，官戶部。出守揚州，遷四川成綿龍茂道，歷滇臬湘藩，以至江蘇巡撫。咸豐庚申，粵寇陷蘇城，弗屈遇害，舉家殉焉。事聞，卹蔭如典禮，賜諡莊愍。

公精於推步，方在郎署日，宣廟嘗召詢：『圓明園水高於京城若干丈？西洋貢器

其用如何？』奏對稱旨。臺官往往就決所疑。始治算，得四元玉鑑，積思三晝夜，以意步爲細草，人見而奇之，爭相傳鈔以去。尤精於割圓堆垛之術。算術以割圓爲甚難，嘉定錢塘本沈氏筆談說，剋爲爲進位開方法，一時信之。乃以內容外切反覆課之，其說遂破。又對數表傳自西人，云以屢次開方而得其數，則取屢乘屢除法馭之，得數巧合而省力百倍。益精心探索，思入幼眇，深造自得如此。

所著務民義齋算學，曰：割圓密率三卷，橢圓正術一卷，弧三角拾遺一卷，朔食九服里差三卷，用表推日食三差捷法一卷，截球解義一卷，附橢圓求周術一卷，造各表簡法一卷。其見於目錄而未刻者爲堆垛測圓等七種，遺藁均佚。

(附) 夏鸞翔字紫笙，浙江錢塘人。諸生。以輸餉議敘，得詹事府主簿。年少聰穎，講究曲線諸術，洞析圓出於方之理。條列各法，更推演以窮其變。撰洞方術圖解二卷。謂

『橢圓及諸曲線其理皆出於平圓，苟會其通，則制器尙象，俛仰觀察，爲用無窮。』

撰致曲術圖解二卷。復嘗專立捷術，以開各類乘方通爲一術，可徑求平方根數十位；不論益積翻積，俱爲坦途。成少廣纒鑿一卷。又萬象一原九卷。刻汪氏振綺堂叢書中。

劉衡

劉衡字蘊聲，一字訥堂，號簾舫，江西南豐人。嘉慶中，副榜貢生，教習官學。秩滿，用知縣。初任廣東四會、博羅、新興等縣事。丁艱服闋，銓選四川墊江縣，調梁山，再調巴縣，擢錦州，進知保甯府，遷成都府，授河南開歸陳許道。請疾歸，卒於家。始以知縣候銓家居時，其祖若父訓謂：『令最親民，亦易厲民。』因日夕與之究古循吏爲民實政。故喜尋繹律義，所在以廉能著稱。歿後，粵人蜀人相率請入祀名宦祠。有庸吏庸言，蜀僚問答，讀律心得，暨小學書後之服官者咸奉爲圭臬焉。

生平伉直誠懇，遇人豁然無町畦，勤學強記，迄老弗衰。自經史百氏，以至六書，星經，地理，醫方，藥性，旁逮雜家小說，靡不通覽。尤嗜九章，句股，八線，測星，中西諸算法。嘗受學於李雲門侍郎，爲補輯古算經佚注二則。嗣與奉新趙敬襄，同里揭廷鏘，互相討論，益臻精進。撰六九軒算書五種，曰：日晷測算新義二卷，句股尺測星新法一卷，籌表開諸乘方捷法二卷，借根方法淺說一卷，四率淺說一卷。大要申明古義，旁通曲轡，務欲取艱深歸諸淺顯，使人人皆得其門而入。且特出新意以製器，如日晷之算尺，測星之句股尺，開諸乘方之籌與表，莫不御簡於煩，皆新器之獨造者也。遺稿，子良駒刊於兩淮運署。

丁取忠 附吳嘉善

丁取忠字果臣，號雲梧，湖南長沙人。爲湘中老宿，撰著自娛，不求聞達。而象數一

途，尤所深究。嘗自謂：『少喜步算，而苦無師承，又地僻不能得書，每每持籌凝思，寢食俱廢，垂四十年，然後古今言算之書稍稍掇集，而心力亦已衰矣。』咸豐改元，慕遊昭陵。庚申，校書於鄂，應胡文忠公之聘也。因得觀乾隆輿圖。又取魏氏海國圖志作爲密尺定分推算，撰輿地經緯度里表一卷。雖未盡精覈，然亦足備參證。

晚年悉移胡文忠所贈修脯廣刻諸算術，都二十有一種，以公海內同好，顏曰：白芙蓉算學叢書。藏板於古荷池精舍。其所自撰：粟布演草二卷，卽發商生息爲題，或一例而演數題，或一題而演數式；或用真數，或用代數，其式或橫列，或直下；雜然并陳，尙慮覽者卒然無從入手，更撰演草補篇，專詳於文以附之。又爲數學拾遺一卷，則積年讀書之所解悟，友朋之所譚論，往來書牘之所傳述，凡於古今人算書有所發明者，悉衷錄焉。光緒初卒，年七十餘。

(附)

吳嘉善字子登，江西南豐人。咸豐壬子進士，改庶吉士。散館，授編修。居京師，獲

交烏程徐莊愍公，同治算學。其後演述莊愍割圓八線綴術，敘中有感恩知己之語，可徵其交誼之篤矣。同治改元，避亂之長沙，識丁取忠。逾年客廣州。因南海鄒伯奇又識錢塘夏鸞翔，亦志同道合，並結針芥之契。光緒己卯，奉使法蘭西國，駐巴黎。所撰著書，首述筆算，次九章翼，曰：今有術，曰：分法，曰：開方術，曰：平方平圓各形術。推測方田者，曰：立方立圓術。推衍商功者，曰：句股術，曰：衰分術，曰：盈不足術，曰：方程術。於句股術後，次附平三角、弧三角、測量高遠三術。又次，則專述天元四元之書，爲天元一術釋例，爲名式釋例，並草爲四元淺釋。丁氏初用活字印行十七種，後悉刻入白芙堂叢書。公自巴黎受代還，旋卒。

李善蘭

李善蘭字壬叔，號秋舛，浙宋海甯人。補諸生。曾從陳碩甫受經。於訓詁詞章雖皆

涉獵，然好之終不及算學用心之篤。方十歲，見架上有古九章，竊取閱之，以爲可不學而能。從此遂好算學。應試杭州，得測圓海鏡句股割圓記以歸，業始進。三十後，所造詣益高。因思割圓法非自然沈思得其理，時有心得，輒復著書。與同郡戴煦、南匯張文虎、烏程徐莊愍公等及立世明算之士，率交善，時相質難。咸豐初，客上海，識英儒偉烈亞力、艾約瑟、韋廉臣三人，繙譯諸書。吳越淪陷，乃走依曾文正公安慶軍中。丁巳，用郭侍郎嵩燾薦，徵入同文館，派充算學總教習。敍勞積階至三品卿銜，戶部郎中，總理衙門章京。年七十餘，卒於官。

其所撰諸書，惟羣經算學攷未成，燬於兵燹。餘皆刻於金陵。總曰：則古昔齋算學。凡方圓闡幽一卷，專言理而不言數。弧矢啓秘三卷，則以尖錐立術而弧背八線皆可求。對數探源二卷，亦以尖錐截積起算，先明其理，次詳其法。堦積比類四卷，以立天元一詳演細草。四元解二卷，闡明元朱氏書，使讀者爲之豁然。麟德術解三卷，詳論史志

盈朒遲速二法。橢圓正術解二卷，新術一卷，拾遺四卷，就莊愍原書逐術補圖。火器真訣一卷，以平圓通火器之推算，俾可依款量算，不難命中。對數尖錐變法釋一卷，釋西法對數積與諸乘方尖錐不同之故。級數回求一卷，專明代數。天算或問一卷，則記友人門弟子問答之語。——共十三種。又附攷數根法一卷，凡四則，補幾何所未備焉。合二十四卷。

至於所譯書，則有：幾何原本後九卷，重學二十卷，附曲線說三卷，代微積拾級十八卷，談天十八卷。此外尚有植物學八卷，別刊。

無錫華氏兄弟傳 蘅芳 世芳

華蘅芳字若汀，江蘇無錫人。幼而敏慧，凡經史詞章輿地音律理化製造無不抉其精微。年十四，卽了解算法統宗飛歸等題。嗣讀李冶朱世傑諸家之書，天元四元術

遂豁然貫通。

咸豐初，西算代數幾何微積等漸次輸入，顧讀而能解者殊少，先生獨潛心冥索，能推闡而發明之。往往稠人雜遝中閉目危坐，構思沉沉，忽悟一算數捷法，爲生平所未到，則心地開朗，快若登仙。歲丙子，隨曾文正於安慶軍，領軍械所事。與同里徐壽推求動理，測算汽機，作「黃鵠」輪船，爲中國自造輪船之始。同治乙丑，文正奏就上海設江南機器局，先生擘畫爲多。及繙譯館開，又與壽分門筆述，譯成各書，文辭朗暢，兼信、達、雅三者之長。其間嘗兩至天津，一至湖北。每創一法，動傾中外。彙主上海格致書院暨兩湖書院無錫竣實學堂講席，一時承學之士因材施教，造就頗衆。而在格致書院時，四方來者尤質疑問難無虛日。隨宜指陳，悉滿其意以去。然每自謂：『口講之功，不若著書之效大。』故中歲後，殫志著述，撰算學筆談十二卷，以淺顯易明之語，闡發精深之理，數年間，重版十數。

其最精者：如開方別術併諸商爲一商，海甯李善蘭推爲空前絕後之作。積較術一卷，與近時日本譯行推差新法軌轍相同；而其成書遠在十數年前。凡精思深造卓然有成又如此。餘若行素軒算稿若干卷，算草叢存若干卷，并多新理。所譯代數術等十餘種，復若干冊。年七十卒於家。

弟世芳字若溪。年十八，入邑庠。已上下古今，泛覽百氏，無不貫。蘅芳既精疇人術，家藏算書頗富，乃潛心研求，不數年，盡通奧窔。應上海求志書院課，遇算題有艱深猝不易解者，舉能洞曉其理。江蘇學政黃體芳召肄業南菁書院，登拔萃科，就職直州判，名譽益著。佐幕於浙粵間，旋應鄂督張之洞聘，充湖北自強學堂教員。嗣後疊主致用精舍兼南菁馬州書院講席。適致用改組學堂，爲訂章授課，規畫井井，造就成材者甚衆，學風蔚然。光緒癸卯，舉經濟特科，再試被遺，而名不少損。南歸，就南洋公學總教習。

尋復入都，任商部實業學堂算學教員。講授務以詳明曉暢，啓發後進爲職志。勵學精勤，至老彌篤。所著恆河沙館算草等數種，學者謂能闡中西之秘。別有算術舉隅，今有術，雙套句股，三角新理，諸稿藏於家。

博物學家列傳第二十四

敘目

詩三百篇，多識鳥獸草木之名；爾雅舍詁訓外，亦重在箋疏蟲魚。是我國博物之學，由來蓋古。後乃中衰。惟歷代圖經本草稍事考驗，顧著錄於醫科，縉紳先生難言之。鄭夾漈曾注意及此，惜書闕有間。通志所載，僅存涯略。蔡許之於詩，陸羅之於雅，或病疏陋，或失穿鑿，蓋等諸「自檜」焉。獨清代固始吳氏植物名實圖考，京山李氏蠕範，縱不能衡以科學規律，要其精博浩瀚，斷推傑構。爰傳之以彰絕學。

吳其濬

李元

吳其濬

吳其濬字澹齋，河南固始人。家世貴胄，由舉人捐內閣中書。嘉慶二年，以一甲第一名及第，授修撰，放廣東考官。旋丁父母憂。服闋，值南書房。疊任湖北江西學政，累官至內閣學士，兼兵部左侍郎。奉命查辦湖廣總督周天爵濫刑諸款，得實，周論遣，卽署督缺，尋簡湖南撫巡。適崇陽縣逆匪鍾人杰連陷崇通，將進窺巴陵，偕提督台湧馳岳州防堵，諸鎮兵至，令分扼臨湘平江各隘，而自移駐湘陰，匪三千餘偷劫平江軍營，擊却之。未幾，湖北兵收崇通，鍾匪就擒，敘功調雲南巡撫。數月，改福建，奏請清查雲南銅廠情形及庫存款項。尋復調山西，以兼管鹽政，疏陳河東活引課銀短絀，擬裁減鹽政辦公銀萬兩充抵，均允行。晉省煙土充斥，羣販者或劫奪相械鬪，禁之尤力。道光二十六年，以舊疾屢發，請開缺，旋卒。贈太子太保，賜祭葬如例。

公雖弋巍科，登顯宦，顧留心博識之學。所讀四部書，苟有涉於水陸草木者，靡不剮而緝之，名曰長編；然後乃出其生平所耳治目驗者以印證古今，辨其顏色，別其性味，省詳論定，摹形繪狀，成植物名實圖攷三十八卷，并以長編二十二卷合之。首穀蔬，次草花果木，都數千餘種。誠可謂包孕萬有，獨出冠時者矣。惟分類或不若今植物學家之密，又遣辭間有文人習氣；大輅始於椎輪，要未足爲此書病也。

李元

李元字太初，號渾齋，湖北京山人。父訓讀于外，病歸，不能言，妻方娠，乃索筆囑曰：『少時有蠅叩戶，拒不納，用是或應有子，若生男，可命之曰元。』果遺腹六月而生。幼孤貧力學，夜無膏火，則默誦，有遺忘則爇香炷照之，其苦篤如此。乾隆辛卯，舉於鄉。後從座師某遊，學日以博。乙未，大挑一等。歷任四川仁壽金堂南充諸縣，所至有循聲。嘉

慶丙子乞病歸，惟載書數萬卷，尋卒於家。

先生學問賅洽，文筆淵雅，著述極富。官蜀時，刊渾齋七種，一：蜀水經十六卷，二：音切譜十八卷，三：聲韻譜十卷，四：寤索三卷，五：乍了日程瑣記三卷，六：通俗八戒一卷，七：蠕範八卷。其餘尚有春秋君國攷，五：禮撮要，歷代甲子紀元表，西藏志，葭萌小乘，往哲心存補編，日書理學傳授表，檢驗詳說，拙氏算術緝，古算術小解，明文淵海，吟壇嘉話等書，存稿未刊。易經集解，陽明年譜攷，渾齋全集，俱散佚。

其蠕範一書，取一切庶物，分理匹、生、化、體、聲、食、居、性、制、材、知、偏、候、名、壽十六門，精博奧衍，爲空前未有之書。或議其間採緯讖方術語，抑知淮南萬畢，伊古已然，渾齋學兼漢宋，并旁通音韻歷算輿地，凡所甄錄，固攷古家不厭其詳，要其別擇裁斷，非無本者所能跂及也。惟後鮮繼起，致絕學甫萌芽而遽廢絕爲可惜耳！

提倡樸學諸顯達列傳第二十五

敘目

康熙朝舉博學宏詞科，海內方聞之士，咸奔集輦下；馮益都徐東海諸公，乘時結納，用廣聲譽。健庵昆季，爲亭林先生外甥，學有本原，故出其門者，亦較益都爲盛特；不如大興二朱之實心宏獎耳。及芸臺相國，秋帆制府，起儒生，躋高位，颺歷中外者數十年，其所造就尤多。紀文達任四庫館總裁，復注意網羅俊彥。乾嘉之際，漢學勃興，厥功鉅矣。乃略其政績，詳舉提倡始末著於篇。而以祁文端潘文勤繼之，并備四朝掌故云。

崑山徐氏見齋傳 乾學 元文

大興朱氏兄弟傳 筠 珪

紀昀實無
提倡樸學
之專祇是
博覽耳應
刪

(太炎)

(紀昀)

畢沅

王昶 (見金石學家列傳)

阮元 附次子福 汪廷珍

祁雋藻

潘祖蔭

〔王先謙〕

崑山徐氏兄弟傳 乾學 元文

徐乾學字原一，號健庵，江蘇崑山人。爲顧亭林外甥。八歲能文，十三通五經。康熙庚戌進士。癸丑，以第三人及第，授編修。壬子，主試順天，拔韓菼於遺卷中，卒魁天下，咸服其藻鑑之精。升右贊善，丁內艱歸。

公守制家居，病近世喪禮流失，寢以成俗，舊典棄而不講；乃蒐討古今喪紀，因革興廢之由，分別部居，先經史，後羣籍，而以近代通儒碩學之議論附之，并加案語，折衷諸說，成讀禮通考一百二十卷。朱彝尊序稱其「摭采之博，而擇之也精；考據之詳，而執之有要；爲天壤間必不可少之書。」

起復，充日講起居注官，明史總裁。累官侍講學士，詹事，內閣學士，教習庶吉士，轉禮部侍郎。一切禮制，酌古準今，有不便者，多所釐正。奉命總裁一統志、會典、及明史、纂

鑒古輯覽，古文淵鑑。凡著作之任，無不領。尋充經筵講官，擢左都御史，遷刑部尙書。

溯由翰林洊升至大司寇，昆季俱位列卿，門第之隆，賓客之盛，一時無兩。而公尤知人，能得士。一時庶幾之流，奔走輻湊如不及。雖山林遺逸，亦爲強起。率迎致館餐而厚資之，俾至如歸。訪問故實，商榷僻書，以廣見聞。後生之才隽者，延舉薦引無虛日。卽片言細行之善，每歎賞不去口。華門寒峻，或窮困來投，輒竭所有，以助無吝色。賓退，則書卷隨身，從事鉛槧。縱飲闌寢倦，曾鮮休息之時。傳是樓藏書甲海內，晨夕讎校。尤篤志經學，凡唐宋來先儒經解，世所不常見者，靡不搜覽參考，雕版以行。卽世所傳通志堂經解，人知爲納蘭容若纂輯，不知實出於公也。

官御史日，飭臺綱，察軍政，嘗劾罷贛豫撫臣及山西甘肅兩總兵。時方分南北黨，諸臺諫益倚之，彈劾不避，結怨遂深。會張沂獄起，於是督撫暨內大臣撫拾罪狀，連章許奏，上寬大，置不問。公乃謝病乞歸，五疏始得請。仍命修一統志，做宋司馬光故事，書

局自隨。後終坐濼縣令朱敦厚事落職。卒於家。有旨召用，已不及矣。

所著讀禮通考而外，尙欲薈萃古今經說，各爲一書，以正羣譌，未就。其於史學，宋元通鑑一百八十四卷，屬草甫成；而明史稿中議大禮三案，東林理學諸源流，皆公之特筆，足爲實錄焉。詩文雍容和平，不失玉堂風度，有澹園集三十卷。

弟元文字公肅，號立齋。年十四，補諸生。順治十一年，賜進士第一。康熙初元，江南奏銷案起，坐罣誤，謫鑾儀衛經歷，閱四年，事白，復原官。丁外艱，與兩兄日居喪次，酌古禮行之。起復，補國史院修撰，遷祕書院侍讀，典試陝西。九年，遷祭酒，充經筵講官。累遷內閣學士，兼禮部侍郎。超拜左都御史。二十七年，二月，公兄乾學自總憲遷大司寇，上難其代，久之不補。七月，復還公故官。兄弟相代爲亞相，海內榮之。十二月，遷刑部尙書。甫旬日，調戶部。二十八年，拜文華殿大學士。公旣以廷議數與滿大臣忤，屢招黨訐，乃

具疏力求去；上許原官致仕，卽日辭朝。舟過臨清，關吏大索，雖醬醢之屬皆發視，僅得圖書數千卷，光祿饌金三百而已。皆嘖嘖嘆清官不置。三十年七月，薨於里第，年五十有八。

公之在成均也，毅然以師道自任。疏請準順治間例，令直省學臣選拔文行兼優之士，復鄉試副榜額，並送監肄業。得旨下部著爲令。復請廣監生中式之額，並請永停納粟一途，言其不可者有四；下所司，納例自河工外，得一切停止。洎學四年，端士習，正文體，條教大飭。充日講起居注官時，聖祖詔公用歷代通鑑與四書參講。公與桐城張文端取通鑑綱目，擇其事之關主德裨治理者，逐一進講，博採先儒之論，以己意附之，旁推交通，一以仁義爲本。及歲終，彙進講議。公具疏尤以「心法」爲諳諳。其責難陳善，多此類也。

康熙十八年，特召監修明史。學士充監修，非故事也，請辭不許。因請購遺書，徵遺

獻薦故給事中李清、主事黃宗羲、及原任副使曹溶、主事江懋麟、布衣黃虞稷、諸生姜宸英、萬言。部議不允，特旨從之。有詔召清等。宗羲、溶並以老不至，而各上所著書，詔並付史館。

公與兄健庵俱好士，延攬獎借如不及，累散千金，赴人之急。晚年官逾貴，常戚戚如有憂者。內行修潔，苞苴之使不及門。御家人嚴整，退食之暇，匡坐讀書而已。待兄弟極友愛，然恆以道義相規切。歷充孝經衍義、政治訓典、方略、一統志總裁。明史稿未成，嘗疏準宋史益衛二王例，以福、唐、桂三王事蹟載附傳，其明末諸臣盡忠所事者，直書無隱。詔曰可。至乾隆初，明史告成，頗用其例云。著含經堂集若干卷。

大興朱氏兄弟傳 筠 珪

朱筠字竹君，一字美叔，學者稱笥河先生。其先家浙之蕭山，曾祖必名始居京師，

遂爲順天大興人。年十三，通七經。與弟珪少皆以能文有聲於時。大學士諸城劉文正公延居邸第，凡參決大事，每從諮訪。中乾隆癸酉鄉試，明年成進士。改庶吉士。散館，授編修。充方略館纂修官。及丁父憂，服闋後，無意出仕，欲作名山大川之遊。會上夙聞公名，召坐詢家事，使爲強起。辭不獲已，遂復就職。卽授贊善。旋擢翰林院侍讀學士，充日講起居注官。己丑，欽派協辦內閣學士批本事。庚寅，典試福建。俄奉命督學安徽。以識字通經，誨士，序刊舊藏宋槧許氏說文，廣布學宮，語諸生曰：『古學權輿專在是矣！』婺源江慎修，歛汪雙池，皆品端學粹，著述等身，特躬拜其主，祀之鄉賢，藉資激勸。適有詔求遺書，欣然謂可大行其志。既悉心搜訪以獻，且上言：『中祕所貯永樂大典，裒集至富，但分析篇次，以四聲韻字爲部居，割裂破碎，與散佚無異。請旨勅下儒臣，採輯討論，以還舊觀，可得人間未見書數百種。』上覽奏嘉許，因開四庫全書館，校理各省上進之書及大典。且徵通雅之士戴震等五人爲纂修官。於是自大典輯出逸書凡五百

餘部，次第刊行，流播海內，天下學者莫不歡欣鼓舞，復知稽古之榮焉。尋坐公事，不如令式部議鑄三級，解任還朝，得旨：『朱筠學問尙優，著仍以編修用，在四庫全書處行走。』嗣充日下舊聞總纂官。己亥，再提督福建學政，教諸生務經古根柢之學。如在皖任滿，與弟珪相代。一時稱爲盛事。而閩士攀轅走送者數百里不絕，人饋一石，積試院成山，曰：『三百三十有三士亭。』既回京，未幾，病卒於家。年五十二。

公博聞閎覽，於學無不通。解經宗鄭孔，而兼參宋元諸儒之說。論史宗涑水，而歷代諸史亦皆攷究貫串，證其同異。爲文仿遷固淵雲，詩歌出入昌黎東坡。書法參會六書，有隋以前體格。既著聲施早，自年三十許，天下震驚其名者，以爲宿學者德。及既見止，爽然自失。爲人性質直，坦易無城府。內友于兄弟，外好交遊。尤喜獎拔士類。後生小子，一藝之長，或未及然者，假借稱譽，過於所試，雖得汰評之誚，不自屑也。前後從遊幾數百人，因材施教，拓越畦畛，比於樹藝，繇拱把至於百圍，咸達其性，靡所矯揉。才彥若

戴東原邵二雲王懷祖汪容甫輩，皆延至幕中，卒用績學顯。弟子以通經著者：興化任大椿，龍溪李威，陽湖洪亮吉，孫星衍，會稽章學誠，偃師武億，全椒吳鼐，均其首選也。惜所著書多未就，僅傳箚河詩文集二十卷。

* * * * *

弟珪字石君，號南厓。十一歲，卽傳高安朱文端之學。年十七，舉乾隆十二年鄉試，與叔兄筠同榜，名震都下。次年成進士，選庶吉士。習國書，尋授編修。累遷侍讀學士。二十四年，主河南鄉試，奉使祭告南嶽。明年，充會試同考官。秋，授福建糧道。毀和合諸淫祠，民大驚服。二十八年，擢按察使。閩人裘自位假平臺灣功，鸞武職獄連數十人，公誅正犯一人，諸受欺者皆不坐。旋兼署布政使。有告家譜妄逆者，讞之，僅戮一撰譜者屍。二十九年，父憂歸。三十二年，補湖北按察使。明年，調山西。又明年，就遷布政使。三十六年，權巡撫事。入覲，授侍講學士。四十一年，命上書房行走，侍仁宗皇帝學，直文淵閣事。

主福建己亥鄉試。四十五年，督福建學政。四十九年，扈蹕南巡，授內閣學士，閱江浙召試卷。五十一年，授禮部侍郎，主試江南，督浙江學政。五十四年，冬，還朝，充經筵講官。明年，春，總裁會試。秋，授安徽巡撫。五十九年，調撫廣東，尋署兩廣總督，授左都御史，兵部尚書，皆留巡撫任。嘉慶元年，授兩廣總督，兼署巡撫。六月，有旨內召，仍授安徽巡撫。明年，授兵部尚書，調吏部，皆留巡撫任。高宗上賓，仁宗馳驛召公，及至京哭臨，上執公手哭失聲，旋命直南書房，管戶部三庫。自是國家大政事，有所咨詢，皆造膝自陳。賜第西華門，紫禁城騎馬，加太子少保，充實錄總裁，典己未會試，調戶部尚書。七年秋，扈蹕灤陽，宣制以戶部尚書，拜協辦大學士。八年，兼掌院學士。九年春，駕幸翰林院，先期晉公太子太傅。十年正月，宣制拜體仁閣大學士，管理工部事。冬十一月，薨於位，年七十有六。給帑銀二千五百兩治喪，晉贈太傅，入祀賢良祠，予諡「文正」。上親臨奠三爵。

公端凝純粹，胸中無城府。於經術無所不通，取士務以經策較四書文，銳意求樸

學才士，門生徧天下。通人寒士，必揚其名於朝。典試事，不受外僚贈遺。承宣數省，平餘銀鉅萬悉不取。官於外，厓岸廉峻，中朝大官，絕無所援。管部事，持大端，不親細務。清操亮節，海內仰之。撫皖時，門人汪庶子學金來請益，市月歸，公曰：『何所聞而來？何所見而去？』汪曰：『一談一笑，無非天理，某所見乃大進。』其感人如此。尤篤孝友，父杖兄，跪而以身蔽受之。慟母氏早世，事庶母如生母。事諸兄悲愉如一體。執兄喪，咯血幾至毀。事寡嫂盡敬，撫兄子如己子。三鄙故交，靡不周卹。嘗曰：『吾三十九歲夜坐，忽腹間自暖，由脊上貫於頂，甘液自罅下注，由是流轉至老不絕，乃知朱子注參同契非空言也。』年四十餘，卽獨居，迄無妾媵。

公在翰林時，國家有大典禮，撰進雅頌詩冊文跋，高宗必嘉賞之，以爲能見其大，頌不忘規，或陳坐隅，或命諸皇子皇孫寫爲副。御製詩時，或命和。公官督撫時，仁宗皇帝在南書房，常頒手札，積一百二十九函，裝六卷，歸朝繳進，上亦書數年懷公詩數十

首爲二冊，題曰「兼葭遠目」，曰「山海遙思」，以示公。其於大學義利之辨，通鑑治亂之由，天命呼吸可通，民情憂樂無閒，反覆敷陳，不以爲迂闊而遠於事情也。公所著知不足齋詩文集，上命以刻本進，賜題律詩四章於卷首。高宗實錄由公總修八載而後成。

畢沅

畢沅字湘蘅，一字秋帆，自號靈巖山人，江蘇鎮洋人。少穎悟，十歲審聲韻，稍長，從沈文愨、惠松崖治經史詞章，學業益邃。弱冠後，游京師，中乾隆癸酉順天鄉試，用內閣中書，爲大學士傅公恆所器，令入直軍機處。庚辰會試，名在第二，上親擢第一。授修撰。館中經進文字，多出其手，典重有體。累遷至左春坊左庶子。出爲甘肅鞏秦階道。歷陝西按察布政諸使，尋升任巡撫。在陝六載，兼署將軍者再，總督者一。丁母艱，方及一年，

仍起原官。久之，調河南擢湖廣總督。左遷山東巡撫。會湖南苗疆有警，再任湖督。運兵籌餉，紅苗甫得蕩平，復接辦湖北教匪，昕夕不遑寧處，以積勞卒於辰州軍營。有旨加太子太保，賜祭葬。享年六十有八。

公識量閎遠，喜愠不形於色。遇僚屬以禮，不執己見，人人皆得盡言。苟遇大疑難，衆莫識所措者，則又沈機立斷，雖萬口莫能奪。久蒞方面，職事修舉，不以察察爲明，亦不以煦煦要譽。獨軍旅非所長，且馭下太寬，未免蒙蔽。卒坐是被累，身後遭籍沒，論者惜之。生平篤於故舊，尤好汲引後進。人有一藝長，必馳幣馳請，惟恐其不來，來則厚資給之。一時名儒才士，悉爲羅致幕下。每值公餘，詩酒酬唱無虛日。

公性好著書，逮官至極品，鉛槧迄未去手。謂經義當宗漢儒，故作傳經表二卷。謂文字當宗許氏，故作經典文字書五卷，及音同義異辨一卷。謂編年之史莫善於涑水，續之者有薛王徐三家，徐雖優於薛王，而所見書籍，若舊五代史李燾長編之類，猶未

備；且不無詳南略北之病。乃合幕府諸君，博稽羣書，攷校正史，手自裁定其義例，始宋終元，爲續資治通鑑二百二十卷。仍仿溫公別撰攷異，附於本條之下，凡四易槁，乃成。謂：史學當究流別，用會稽章學誠說，纂史纂攷一百卷。謂：史學必通地理，故校山海經十八卷，補正晉書地理志五卷，并輯晉太康三年地記一卷，王隱晉書地道記一卷。謂：金石可證經史，宦跡所經，搜聚頗備，作關中金石記八卷，中州金石記五卷。——除史籍攷未就，續通鑑別刊外，餘均刻入經訓堂叢書。

公在秦中，既督修西安府志八十卷，更參攷諮詢，作關中勝蹟圖志二十卷。詩文下筆立成，不拘一格，率皆自運性靈，要無違大雅之旨。有靈巖山人詩集四十四卷，經訓堂文集四十卷。其他稿尙多，散佚弗傳。

阮 元 附次子福 汪廷珍

阮元字伯元，號雲臺，江蘇儀徵人。乾隆五十一年舉人，五十四年進士。由翰林院編修，大考第一，擢少詹。歷官內閣學士，戶、禮、兵、工等部侍郎，山東、浙江學政，浙江、河南、江西巡撫，漕運、兩湖、兩廣雲貴總督，太子少保，體仁閣大學士。嘉慶四年，道光十三年，兩充會試總裁。十八年秋，予告回籍，晉加太子太保，支食半俸。二十六年，丙午科，重宴鹿鳴，晉加太傅，支食全俸。二十九年卒，年八十六歲。諭賜祭葬，予謚文達。

公生平持躬清慎，爲政務崇大體。督學時，士有一藝之長，無不獎勵；能解經義及古今體詩者，必擢置於前。總裁會試，必合校二三場文策；績學之士，多從此出。所至必以興學教士爲急。在浙江則立詁經精舍，在廣東則立學海堂，選諸生務實學者肄業其中，得士極盛。主持風會者五十餘年，士林尊爲山斗。蓋其一生，以座師朱文正公爲模楷，故其經術政事與文正相類云。

公撫浙時，安南艇匪肆掠，親督水軍禦諸台州，僞總兵倫貴利等皆伏誅。海盜蔡

牽屢擾閩浙，奏請以提督李忠毅公總統兩省舟師，不分畛域，立專注首逆，隔斷餘船之法，循環攻擊。識者謂牽之淹斃於溫州黑水洋，全得力於此策。

公撫江西時，嚴查保甲，破獲朱毛俚謀反鉅案，未嘗控弦發矢，銷叛逆於未萌。以功得賞宮保，花翎。

公督雲貴時，留鹽課溢額之半，協濟邊防。騰越廳邊外，野人出沒無常，甚爲民患；乃訪知保山縣境有獠，熟夷弩箭最精，爲野人所憚，因籌款招募，以資捍衛。野人懼，獻木刻乞降。是時提督曾勤勇公方官雲南副將，特薦其堪膺專閫。及曾公會勦廣東判獠，力戰先登，功居第一。中外咸以爲知人。

公督兩廣時，履任之初，卽籌緝捕經費，俾州縣無畏累諱飾之弊。廣西富賀懷集，廣東連山陽山，多盜，以接界之姑漣山爲逋逃藪，因調集兩省重兵三路合圍，掃其巢穴，先後獲會匪劫盜數千，內地一律肅清。又創建大虎山砲台以防外洋，奏禁鴉片烟，

不許帶烟之洋船入口。外洋護貨之兵船殺二民人於伶仃山，遂封閉其艙，不容貿易。數月後，查獻兇犯，始令照舊通商。故終其任，兵船不敢犯粵。

公論學之旨，在實事求是。自經史小學以及金石詩文，鉅細無所不包，而尤以發明大義爲主。所著性命古訓、論語孟子論仁論、曾子十篇注，推闡古聖賢訓世之意，務在切於日用，使人可身體力行。在史館時，採諸書爲儒林傳，合師儒異派而持其平，不稍存門戶之見。其餘說各經之精義，載於研經室集者，不可枚舉。所編經籍纂詁、十三經校勘記，傳布海內，爲學者所取資。疇人傳、淮海英靈集、鐘鼎款識、山左兩浙金石志，並爲考古者所重。卽隨筆記錄如廣陵詩事、小滄浪筆談等書，亦皆有關於掌故。所刻之書尤多，最著者爲十三經注疏、皇清經解。

公歸田後，怡志林泉，不與郡縣相接，而於地方義舉無不首先倡辦。待族黨故舊，事事從厚。汲引後進，尤覺周至。

(附) 次子福，字喜齋。以候選郎中，外簡湖北宜昌府知府。初，文達既撰曾子注釋，以與孝經相表裏，因命福撰孝經義疏補九卷。全載注疏音義原文，而以曾子十篇中凡可以發明孝經，可以見孔曾授受大義者，悉分系於各章各句之下；如有鄭注見引於唐以前書，復據以補入；而於說文所載鄭注舊文舊義，搜采靡遺，俾還鄭氏舊觀，且疏證之；古籍可相輔翼，並爲甄錄，兼下己意，曲鬯旁通，既博且精，得未曾有。雖曰補疏，而實與疏全經者無殊，卽此足徵其家學淵源矣。

汪廷珍字玉粲，號瑟庵，江蘇山陽人。早孤，家貧，攻苦力學，志趣高簡，不事聲氣，結納人多以迂怪目之。任大椿侍御，主講淮上，一見嗟嘆，期以國士。乾隆己酉，以一甲第二名及第，授編修。嘉慶初，擢侍講，遷祭酒。當國者惡其不附己，多方阻抑，公益自厲不少挫。累官左都御史，上書房總師傅，禮部尙書。道光癸未，臨雍禮成，詔加太子太保。乙酉，授協辦大學士。越明年，卒於位，贈太子太師，賜祭葬如例，諡曰文端。公於

書無所不窺，尤深於經術。十三經義疏皆能闡誦。平居講學，於漢宋不爲左右袒，一本義理爲折衷。其他民情政治之大，下及輿地名物算數方技，無不曲究。當是時，阮文達方用通經博學負盛譽，嘗勸公著書。答曰：『六經之奧，昔儒皆先我言之，豈敢復以此語相溷哉！但讀書所以析義，要歸於中有所主而已。』先後立朝三十餘年，風節侃侃，不棘不阿；而文章品誼，自高天下，海內推爲正人。又其虛衷延納，優卹寒賤，亦與阮公相亞云。

祁雋藻

祁雋藻字叔穎，又字實甫，學者稱春圃先生。安徽壽陽人。幼而歧癡，性至孝。年十二，父以事繫刑部獄，公隨侍讀書不少輟。越歲事白，遣戍伊犁，請從行，不許，乃奉母返里，益篤苦於學。年十八，舉鄉試。省父於甘肅蘭山書院，院故多藏書，乃以其暇研究經

史，縱覽諸子百家。公之殖學稽古，蔚爲一代儒宗，實基乎此。

公以嘉慶甲戌成進士。改翰林院庶吉士。丁外艱歸。散館，授編修。充仁宗實錄纂修官。道光元年，入值南書房。累遷至內閣學士，兼禮部侍郎銜。丙申，服闋，未補官，卽擢兵部右侍郎，陞左都御史。偕侍郎黃爵滋赴閩籌海防。旋加兵部尚書。辛丑，命爲軍機大臣。己酉，充上書房總師傅。以戶部尚書協辦大學士。文宗登極，授體仁閣大學士，仍筮戶部，充實錄館總裁。時上銳意圖治，粵氛不靖，深以議撫爲非，罷大學士穆彰阿，公遂首揆。席日召見便殿，詢用人行政之道，則爲敷陳經史，動踰晷刻，同列咸苦之，上顧未嘗倦聽焉。

洪楊兵禍，蔓延東南各省，公弟宿藻官江甯布政使，城守勞瘁卒。公感憤時事，憂傷愛弟，舊病復作。又與尚書肅順同值軍機，持論多不合。議京師錢票案，益相齟齬，乃稱病乞休去。及順敗，孝欽后以耆臣優詔起復，命以大學士銜爲禮部尚書，與前大學

士翁心存等偕直弘德殿，侍皇帝讀。頃之，用老病予告，薨於京邸，年七十有四。賜祭葬如例，贈太保，諡曰文端。

公爲人清介端重，雅負時望。典試及視學凡六次，五主禮闈，所得士幾徧天下。自甲子迄庚申，七年皆秉鈞衡，門無雜賓，不通賄賂。好許氏學。其視學吳中，獲景宋鈔本說文繫傳，錄諸版，於是小徐書始行於世。一時游其門者，如安邱王筠、順德苗夔輩，率精研訓詁聲韻，胥公提倡之力也。頗篤於故舊，每卹其後人，刻其遺書。歛程侍郎恩澤諸人著作，先後助之付刊。所自撰詩文，曰饒欲亭集，四十四卷。

潘祖蔭

潘祖蔭字伯寅，號鄭盦，江蘇吳縣人。故大學士世恩裔。欽賜舉人。咸豐壬子，以進士第三名及第，授編修。洊歷卿寺，值南書房。治事勤，甫辨色卽起，至官署恆在人先。輿

馬甚敝，同僚多笑之，不屑也。性坦率，重賢好士，見義敢爲，初不計禍福。左文襄被誣，禍幾不測。公獨上奏保舉人左宗棠，人材可用一摺，大旨謂：『楚軍之得力，由於駱秉璋之調度有方，實由於左宗棠之運籌決勝。宗棠之爲人，負性剛直，嫉惡如讎，官文惑於浮言，未免有引繩批根之處，致其潔身而退。夫以一在籍舉人，去留似無足輕重，而於楚軍事勢關繫甚大，有不得不爲國家惜者。請飭下曾國藩等，酌量任用，盡其所長，襄理軍務，毋爲羣議所撓。』云云。於是文宗詔詢所以用之者，超授四品京堂。厥後中興之功，以至蕩平四域，成之者雖文襄，介之者則公也。人徒目公爲翰墨侍從之臣，慎矣！官順天府尹，擢工部尙書。時翁同龢領國子監，世稱「翁潘」。然公誠篤廉直，殊非同龢所及。德宗大婚，內務府大臣喻共爲中飽，陽不省，光更以書致意，答至，光啓觀，則赤箋書「弗肯弗肯」四字。其風概又如此。光緒庚寅薨於位。謚文勤。

公幼好學，涉獵百家，尤喜搜羅善本書，金石碑版之屬。滂喜齋所儲，不以繁富相

炫，顧多精品。於經，通公羊春秋，爾雅。於史，通范氏後漢書。同光間，承襲魏餘風，今文經學盛行，許鄭之誼遂微。公益從而左右之。元和江標出其門，視學湘中，創設時務學堂，益務張「新周改制」之說，固清季學術變遷之一大關鍵也。惟生平絕少著述，除所刊滂喜齋叢書間存并世通儒遺著，自撰祇攀古樓彝器款識，秦輜日記等零星小品而已。

王先謙

王先謙字益吾，湖南長沙人。初學爲古文詞，師曾文正。己益泛濫羣籍，頗識制度名物。同治乙丑成進士。散館授編修。歷官國子監祭酒。

督江蘇學政，踵阮文達後，輯刊續皇清經解，凡二百十種，一千四百三十卷。所收雖不如文達之精萃，而有清一代漢學家經師經說每賴以傳，所遺者或寡矣。又仿姚

姬傳編續古文辭類纂二十八卷，亦嚴謹有義法。王湘綺嘗謂曰：「經解縱未能抗行芸臺，類纂差足以比肩惜抱。」聞之輒大樂。在蘇數年，多延通儒主南菁書院，造士甚衆。自蘇學還朝，卽謝病歸，爲城南書院院長，撰述逾富。

治經循乾嘉遺軌，趨重考證，而小學弗深，且釋名物不克貫通三代禮制，以此視文達終有「上下床」之別。惟尙書孔傳參正，辨析詳確，較他書爲醇。


復用考據以校讎諸史地志，成漢書補注一百卷，水經注合箋四十卷，亦多薈集羣言，自爲發明者少。獨荀子集解二十卷，用高郵王氏讀書雜志例，取諸家校本，參稽考訂，補正楊注凡數百事，可謂蘭陵功臣！

岑春萱撫湘，上所著書，得旨嘉獎，晉內閣學士。陳寶箴徐仁鑄等建湘學以開通風氣，先謙故守舊，議不合，屢書讓之。光緒己酉，乞糴變起，兩湖總督瑞澂疑其所主，奏劾免職。旋卒。別有天命以來十朝東華錄若干卷，虛受堂詩文集若干卷。

敘
傳

大啓玄風
丕振樸學

張一磨



敘傳

支氏之先，望出郟陽。堯舜時，有支父，與許由隱於山林，世稱高士。周安釐王時，秦敗魏於華，王且入朝於秦，周訴諫于王，弗聽。支期曰：『王視楚王，楚王入秦，王以三乘先之；楚王不入，楚魏爲一，尙足以捍秦，王乃止。』王謂支期曰：『吾始已諾於應侯矣，今不行者欺之矣。』支期曰：『王勿憂也，臣使長信侯請無內王，王待臣也。』支期說於長信侯曰：『王命召相國。』長信侯曰：『王何以臣爲？』支期曰：『臣不知也，王急召君。』長信侯曰：『吾內王於秦者，寧以爲秦耶？吾以爲魏也。』支期曰：『君無爲魏計，君其自爲計！且安死乎？安生乎？安窮乎？安貴乎？君其先自爲計，後爲魏計！』長信侯曰：『樓公將入矣，臣今從。』支期曰：『王急召君，君不行，血濺君襟矣！』長信侯行，支期隨其後。且見王，支期先入，謂王曰：『僞病者乎而見之，臣已恐之矣。』長信侯入見。

王。王曰：『病甚，奈何！吾始已諾於應侯矣，意雖道死行乎？』長信侯曰：『王毋行矣，臣能得之於應侯矣，願王無憂！』

漢宣帝時，月支王世子入居長安，遂以國爲姓。族本西域，流寓中華，佛學輸入，傳播之力爲多。支婁迦讖——亦直云支讖——操行純深，性度開敏，稟持法戒，以精勤著稱。諷誦羣經，志在宣法。漢靈帝時，遊於雒陽，以光和中平之間，傳譯梵文，出般若道行，般舟首楞嚴等三經。又有阿闍世王寶積等十餘部經，歲久無錄。安公校定古今，精尋文體，云似讖所出。凡此諸經，皆審得本旨，了不加飾，可謂善宣法要，弘道之士也。後不知所終。又有沙門支曜，譯成具定意經及小本起等。在靈獻之間，有慧學之譽。

吳孫權已制江左，而佛教未行。先有優婆塞支謙——字恭明，一名越——來遊

漢境初，漢桓靈之世，支讖既譯出衆經，有支亮字紀明，資學於讖，謙又受業於亮。博覽經籍，莫不精究；世間伎藝，多所綜習；徧學異書，通六國語。世稱『天下博知，不出三支。』謙爲人細長黑瘦，眼多白而睛黃。時人爲之語曰：『支郎眼中黃，形軀雖細是智囊。』漢獻末亂，避地於吳。孫權聞其才慧，召見悅之，拜爲博士，使輔導東宮，與韋曜諸人共盡匡益。但生自外域，故吳志不載。謙以大教雖行，而經多梵文，未盡翻譯，妙已善方言，乃收集衆本，譯爲漢語。從吳黃武元年，至建興中，所出維摩、大般泥洹、法句、瑞應本起等四十九經，曲得聖義，辭旨文雅。又從無量壽中本起，製菩薩連句梵唄三契，并注了本生死經等，皆行於世。

竺曇摩羅刈——此云法護——本姓支氏，世居燉煌郡。年八歲出家，事外國沙門竺高座爲師。誦經日萬言，過目則能。天性純懿，操行精苦。篤志好學，萬里尋師。是以

博覽六經，遊心七籍，雖世務毀譽，未嘗介抱。是時，晉武之世，寺廟圖像，雖崇京邑，而方等深經，蘊在葱外。護乃慨然發憤，志弘大道，遂隨師至西域，遊歷諸國。外國異言三十六種，書亦如之，護皆徧學，貫綜詰訓，音義字體，無不備識。遂大齋梵經，還歸中夏。自燉煌至長安，沿途傳譯，寫爲晉文。所獲賢劫正法華光贊等一百六十五部，孜孜所務，唯以弘通爲業。終身寫譯，勞不告勑。經法所以廣流中華者，護之力也。護以晉武之末，隱居深山。山有清澗，恆取澡漱。後有採薪者穢其水側，俄頃而燥。護乃徘徊歎曰：『人之無德，遂使清泉輟流。水若永竭，真無以自給，正當移去耳！』言訖，而泉流滿澗。其幽誠所感如此。後立寺於長安青門外，精勤行道。於是德化遐布，聲蓋四遠，僧徒數千，咸所宗事。及晉惠西奔，關中擾亂，百姓流移，護與門徒避地東下，至澗池，遭疾而卒。春秋七十有八。後孫綽製道賢論，以天竺七僧，方竹林七賢，以護匹山巨源。論曰：『護公德居物宗，巨源位登論道，二公風德高遠，足爲流輩矣！』其見美後代如此。

支孝龍少以風姿見重，加復神彩卓犖，高論適時，常披味小品，以爲心要。陳留阮瞻，潁川庾凱，並結知音之友。世人呼爲「八達」。時或嘲之曰：「大晉龍興，天下爲家，沙門何不全髮膚，去袈裟，釋梵服，被綾羅？」龍曰：「抱一以逍遙，唯寂以致誠。剪髮毀容，改服變形，彼謂我辱，我棄彼榮，故無心於貴而愈貴，無心於足而愈足矣。」其機辯適時，皆此類也。時竺叔蘭初譯放光經，龍旣素樂無相，卽得披閱，旬有餘日，便就開講，後不知所終矣。尙有支敏度，亦聰哲有譽，著傳譯經錄，今行於世。

支遁字道林，幼有神理，聰明秀徹。初至京師，太原王濛甚重之，曰：「造微之功，不減輔嗣。」陳郡殷融，嘗與衛玠交，謂其神情儁徹，後進莫有繼之者；及見遁，嘆息以爲重見若人。家世事佛，早悟非常之理。隱居餘杭山，沈思道行之品，委曲慧印之經，卓焉

獨拔，得自天心。年二十五出家。每至講肆，善標宗會，而章句或有所遺，時爲守文者所陋。謝安聞而善之，曰：「此乃九方歎之相馬也，略其玄黃而取其駿逸。」王洽、劉恢、殷浩、許詢、郗超、孫綽、桓彥表、王敬仁、何次道、王文度、謝長遐、袁彥伯等，並一代名流，皆著塵外之狎。遁常在白馬寺，與劉系之等談莊子逍遙遊篇云：「各適性以爲逍遙。」遁曰：「不然。夫桀跖以殘害爲性，若適性爲得者，彼亦逍遙矣。」於是退而注逍遙篇。羣儒舊學，莫不嘆服。後還吳，立支山寺。晚欲入剡，謝安爲吳興守，與遁書曰：「思君日積，計辰傾遲，知欲還剡自治，甚以悵然。人生如寄耳，頃風流得意之事，殆爲都盡，終日感感，觸事惆悵，唯遲君來，以晤言消之，一日當千載耳。此多山縣，閑靜差可養疾，事不異剡，而醫藥不同，必思此緣，副其積想也。」王羲之時在會稽，素聞遁名，未之信，謂人曰：「一往之氣，何足可言！」後遁既還剡，經由於郡，王故往詣遁，觀其風力。既至，王謂遁曰：「逍遙篇可得聞乎？」遁乃作數千言，標揭新理，才藻驚絕。王遂披襟解帶，留連不

能已。仍請住靈嘉寺，意存相近。俄又投迹剡山，於沃州小嶺立寺行道。僧衆百餘，常隨稟學。時或有惰者，遁乃著座右銘以勸之曰：「勤之勤之，至道非彌，奚爲淹滯，弱喪神奇，茫茫三界，眇眇長羈，煩勞外湊，冥心內馳，徇赴欽渴，緬邈忘疲，人生一世，涓若露垂，我身非我，云云誰馳，達人懷德，知安必危。寂寥清舉，濯累禪池，謹守明禁，雅玩玄規，綏心神道，抗志無爲，寥朗三蔽，融洽六疵，空同五陰，虛豁四肢，非指喻指，絕而莫離，妙覺既陳，又立其知，宛轉乎任，與物推移，過此以往，勿思勿議，敦之覺父，志在嬰兒。」時論以遁才堪經濟，而潔已拔俗，有違兼濟之道。遁乃作釋矇論。晚移石城山，又立棲光寺。宴坐山門，遊心禪苑。木食澗飲，浪志無生。乃注安般四禪諸經，及卽色遊玄論，聖不辯知論，道行旨歸，學道誠等。追蹤馬鳴，躡影龍樹，義應法本，不違實相。晚出山陰，講維摩經。遁爲法師，許詢爲都講。遁通一義，衆人咸謂詢無以厝難。詢每設一難，亦謂遁不復能通。如此至竟，兩家不竭。凡在聽者，咸謂審得遁旨，廻令自說，得兩三反，便亂。至晉哀

帝卽位，頻遣兩使，徵請出都，止東安寺，講道行般若。白黑欽崇，朝野悅服。太原王濛，宿構精理，撰其才辭，往詣遁，作數百語，自謂遁莫能抗。遁徐曰：「貧道與君別來多年，君語了不長進。」濛慚而退焉。乃嘆曰：「實紆鉢之王何也！」邈超問謝安：「林公談何如，嵇中散？」安曰：「嵇努力裁得去耳。」又問：「何如殷浩？」安曰：「亶亶論辯，恐殷制支超拔直上淵源，實有慚德。」邈超後與親友書云：「林法師神理所通，玄拔獨悟，數百年來紹明大法，令真理不絕，一人而已。」遁淹留京師，涉將三載，乃還東山，上書告辭曰：「遁頓首言：敢以不才，希風世表，未能鞭後，用衍靈化。蓋沙門之義，法出佛之聖，彫瀆反朴，絕欲歸宗，遊虛玄之肆，守內聖之則，佩五戒之貞，毗外王之化，諧無聲之樂，以自得爲和，篤慈愛之孝，蠕動無傷，銜撫恤之哀，永悼不仁。秉未兆之順，遠防宿命；挹無位之節，履亢不悔。是以哲王御世，南面之重，莫不欽其風尚，安其逸軌，探其順心，略其形敬，故令歷代彌新矣。陛下天鍾聖德，雅尚不倦，道遊靈樞，日昃忘御，可謂鐘鼓

晨極，聲滿天下，清風既劭，莫不幸甚。上願陛下，齊齡二儀，弘敷至法，去陳信之妖誣，尋丘禱之弘議，絕小塗之致泥，奮宏轡於夷路。若然者，泰山不淫季氏之旅，得一以成靈；王者非員丘而不禋，得一以永貞。若使貞靈各一，人神相忘，君君而下無親舉，神神而况不加靈，立德交被，民荷冥祐。恢恢六合，成吉祥之宅；洋洋大晉，爲允亨之宇；常無爲而萬物歸宗，執大象而天下自往。國典刑殺，則有司存焉。若生而非惠，則賞者自得；戮而非恕，則罰者自刑。弘公器以厭神意，提銓衡以極冥量。所謂天何言哉，四時行焉。貧道野逸東山，與世異榮，菜蔬長阜，漱流清壑，縵縷畢世，絕窺皇階。不悟乾光曲曜，猥被蓬華，頻奉明詔，使詣上京，進退惟咎，不知所措。自到天庭，屢蒙引見，優遊賓禮，策以微言。每愧才不拔滯，理無拘新。不足對揚玄模，允塞視聽，踧踖侍人，流汗位席。曩四翁赴漢，干木蕃魏，皆出處有由，默語適會。今德非昔人，動靜乖理，遊魂禁省，鼓言帝側，將困非據，何能有爲。且歲月僂俛，感若斯之歎。况復同志索居，綜習遼落，迴首東顧，孰能無

懷。上願陛下，特蒙放遣，歸之林薄，以鳥養鳥，所荷爲優，謹露板以聞。伸其愚管，裹糧望路，伏待慈詔。』詔卽許焉。資給發遣，事事豐厚。一時名流，並餞離於征虜。蔡子叔前至，近遁而坐。謝安石後至，值蔡暫起，謝便移就其處。蔡還，合褥舉謝擲地，謝不以介意。其爲時賢所慕如此。既而收迹剡山，畢命林澤。人嘗有遺遁馬者，遁受而養之。時或有譏之者，遁曰：『愛其神駿，聊復畜耳。』後有餉鶴者，遁謂鶴曰：『爾冲天之物，寧爲耳目之玩乎！』遂放之。遁幼時，嘗與師共論物類，謂『鷄卵生用，未足爲殺。』師不能屈。師尋亡，忽現形，投卵於地，殼破鷄行，頃之俱滅。遁乃感悟，由是蔬食終身。遁先經餘姚塢山中住，至於明辰，猶還塢中。或問其意，答云：『謝安石昔數來見就，輒移旬日，今觸情舉目，莫不興想。』後病甚，移還塢中。以晉太和元年閏四月四日終於所住。春秋五十有三。卽窆於塢中，厥塚存焉。或云終剡，未詳。遁善草隸。郗超爲之序傳，袁宏爲之銘讚，周曇寶爲之作誄。孫綽道賢論以遁方向子期。論云：『支遁向秀，雅尙莊老，二子異時，

風好玄同矣。』又喻道論云：『支道林者，識清體順，而不對於物，玄道沖濟，與神情同任，此遠流之所以歸宗，悠悠者所以未悟也。』尙有支法淵，以才華著稱。支法虔與遁同學，精理入神，先遁亡。遁嘆曰：『昔匠石廢斤於郢人，牙生輟弦於鍾子，寶契既潛，發言莫賞，中心蘊結，予其亡矣！』支法衡病死三日而蘇，於是出家持齋，戒律精苦，晝夜勤思大道，爲至行沙門。

* * * * *

支曇蘭少蔬食樂禪，誦經三十萬言。晉太元中遊剡。後憩始豐赤城山，見一處林泉清曠而居之。經於數日，忽見一人而形長數丈，呼蘭令去，又見諸異形禽獸來以恐蘭。見蘭恬然自得，乃屈膝禮拜，云：『珠欺王是家舅，今往韋鄉山就之，推此處以相奉。』爾後三年，忽聞車騎隱隱，從者彌峯。俄而有人著幘稱珠欺王通，既前，從其妻子男女等二十三人，並形貌端整，有逾於世。既至蘭所，暄涼訖，蘭問：『住在何處？』答云：『

樂安縣韋鄉山。久服風聞，今與家累仰投，乞受歸戒。蘭卽授之。受法竟，覲錢一萬，蜜二器，辭別而去。便聞鳴笳動吹，響震山谷。蘭禪衆十餘，共所聞見。晉元熙中，卒於山。春秋八十有三矣。

支曇籥寓居建業，少出家，清苦蔬食，憩吳虎丘山。晉孝武初，勅請出都，止建初寺。孝武從受五戒，敬以師禮。籥特稟妙聲，善於轉讀。嘗夢天神授其聲法，覺因裁製新聲，梵響清靡，四飛卻轉，反折還弄，雖復東阿先變，康會後造，始終循環，未有如籥之妙。後進傳寫，莫匪其法。所製六言梵唄，傳響於今。後終於所住，年八十一。復有支僧敦，少遊汧壘，長歷荆雍，妙通大乘，兼善數論，著人物始義論，亦行於世。

西晉支雄，位爲司空，勳銘竹帛。若子若孫，世居華州。今支氏之播遷宇內者，莫不

由茲而分派焉。隋末，荒饑，支叔才夜丐食野中，還進母，爲賊所執，欲殺之，告以情，賊閱其孝，爲解縛。母病癰，叔才吮瘡注藥。及亡，廬墓，有白鵲止廬傍。高宗時，表異其家。唐末，支祥爲武寧軍節度使，黃巢亂京師，遣州牙將時溥與陳璠率兵五千西討。

宋有支邦榮以中奉大夫直祕閣，任邕州刺史，多惠政及民。支允文湛深經學，登太平興國科進士第。又有支漸，年七十，持母喪，旣葬，廬墓側，負土成墳，蓬首垢面，三時號泣，哀毀瘠甚。白蛇狸兔擾其旁，白雀白鳥日集于壠木，五色雀至萬餘，回翔悲鳴，若助哀者。鄉人句文鼎，自娶婦卽與父母離居，覩漸至行，深自悔責，號慟而歸，孝養盡志。鄉閭觀感而化者甚衆。

支詠字道涵，幼穎敏，好讀書，研精六經，兼通諸子。年甫弱冠，舉於鄉。登宋理宗寶

祐四年文天祥榜進士。元兵南下，中原鼎沸，權奸柄國，斥逐賢良，不可勝數。公留京師數年，憤不受職。抗言史嵩之喪心誤國之罪，疏三上，不報。公嘆曰：『國事乃爾，尙可爲乎！』乃歸故里，遁跡山林。迨祥興己卯，宋已亡，公篤念舊君，常懷隱痛。既而聞元世祖遣使來徵，遂挈家南渡，愛京口江山之勝，因卜居。絕意巖廊，放情邱壑者三十餘年。以延祐丁巳卒于家，年八十餘矣。是爲吾族遷潤始祖。

詠生子二：長璞次琚。璞少好學，專治毛詩；旁及陰陽律麻，莫不精絜有得；著書數十卷藏於家，義不仕元，以布衣終。子二：承規，承矩，篤學任俠，見重鄉里。琚性純孝，廬墓三年，旌於有司。子一，承典。澹泊明志，以琴書自遣，時人號爲西城居士。後有支渭興，至順初進士。官至中奉大夫，四川行省參政。善屬文，別號龍溪，所著有龍溪詩集行于世。

降及有明，思誠公永樂初以舉人授迪功郎，實爲吾家嫡祖。道涵公七世孫也。宗族之以功名顯者，夔公登成化進士，任河南安撫使，卓著政聲。中夫公立，事母盡孝，舉鄉試，歷官翰林孔目，深于經學，時號「支五經」。心易公大綸，登隆慶辛未進士，萬歷間知奉新縣事，明敏有才略，尤留心民政，以考最擢推官。有功公可大，萬歷辛未進士，累官湖廣巡撫，征番之役功最大，請告歸里，卜築蘇州城隅，與賓朋相觴咏，優游林下十餘年。應瑞公登萬歷丁丑進士，官至陝西提督軍務，禦寇有大功。甯瑕公如玉，萬歷舉人，官刑部主事，有半衲庵集。

清初，支隆求字武侯，順治舉人，官沂水知縣，多惠績，致政歸，著書講學，有泊庵集。支清彥字少鶴，工書法，翰林院侍講學士，廣東提督學政。支本固字孔齋，雍正初進士，任徽州府知府，後陞雲南行省參政。其餘舉一榜，任守令者，代有其人。惟支景山字柏

崖，爲鹺商淮南總辦，凡揚鎮及西楚兩省所有各義舉，無不捐資樂助。復念宗黨繁衍，效范文正設立義莊，賑恤貧族。道光三十年，江蘇巡撫題請旌表，奉旨建坊給予「樂善好施」字樣。以例屢膺封贈資政大夫。壽八十六。蓋自此世擅鹽筴之利，財雄江淮矣。

支方廉字筠菴。由附貢生捐資辦賑出力，議敘郎中，簽分刑部山東司，兼理貴州司事。道光二十五年，銓選甘肅平慶涇道。丁內憂，回籍服闋後，袁端敏公督兵皖豫，奏調總理戎務。帶兵克復鳳陽臨淮各城，奉加鹽運使銜，簡任浙江溫處道。咸豐十年，署杭嘉湖道。時值浙垣甫經收復，襄辦防勦出力，奉加按察使銜。十一年冬，溫處各屬髮逆竄擾，多已淪陷，奉檄馳赴本任。經浙撫王公請以溫台處三鎮四協統歸節制。任事於危亡之際，徵兵籌餉，撫勦兼施，未及半載，所陷各州縣俱次第克復，乘勢進規鄰境。

台州各城，一律蕩平。旋卽興修學校，義倉，育嬰堂，恤嫠會，各善後事宜。奉旨賞戴花翎。士民愛戴，各屬供奉生祠。致仕歸田，年七十六，卒於家。子清瀋，字次筠。由中書科中書改官鹽大使，分發廣東，所蒞多政聲。尙有支昭訓字宅安，由附貢生任陽湖縣學訓導，改官同知，赴閩補邵武府同知，有幹才，檄署浦城縣事。歷署晉江縣，永春直隸州。支昭辰字藩北，以兵部主事贊畫袁端敏營務，積功歷保甘肅遇缺題補道，補鞏昌府知府。歷署大郡，清廉自矢，嚴懲豪猾，不畏強禦，士民頌之。後卒於甯夏釐局差次，貧不能歸槨，同僚醵金，始克歸喪。

支恆榮字芟青。同治庚午舉人，光緒丁丑進士，改庶吉士，授編修。少有至行，嘗割臂療母疾。及長，體清癯，而神明朗澈。刻苦自勵，邃於儒先性理之學。終日危坐，無惰容。見者肅然起敬。治公私事，條理井井。時仕路壅塞，士易奔競，編檢開坊尤遲滯。恆榮在

詞館二十有五年，自與同志講學外，日惟閉戶自精。庚子拳亂，洋兵入京，恆榮矢志堅定，與眷屬守京邸弗去。辛丑和議成，兩宮迴鑾，嘗召見翰林院諸臣。太后流涕言載漪、剛毅諸人縱容拳匪殃民誤國罪，諸臣默然。恆榮於班末抗言曰：「事雖至此，然我君臣上下戮力同心，天下事尙可爲！」太后詢姓名，又問曰：「汝云可爲，其辦法若何？」恆榮對曰：「首在用人。用人之道，在辨別忠奸。」意欲朝廷懲前毖後，任用守正不阿之士也。太后領之。既退，同官中有咎其位卑言高者，然恆榮之忠愛謇諤，略可觀矣。是歲，擢詹事府右春坊右贊善，五遷至侍講學士。先於癸未丙戌，兩充會試同考官，得士稱盛。而癸未自榜眼宗室壽耆例不由房薦外，狀元陳冕探花管廷獻，會元甯本瑜，皆出其門，尤爲佳話。嗣洪掌文衡，壬寅，癸卯，充山東湖南正考官。甲辰，任湖南學政。持躬以廉，導士以正，其校閱精細，尤不憚勞苦。丙午，授浙江提學使。時學堂初設，士氣囂張，而浙尤甚。長官濡忍，若奉驕子。恆榮以正自持，屹若山立。適某校長以曖昧被控，證據

稿鑿，恆榮將繩以法，而學校風潮大起，抵制恫嚇，譁張百端，仍堅持不爲動，卒斥革嚴究，士風爲之肅然。往時，某邸當國，賄賂公行，否則齟齬立至。有知府赴任浙中，來謁言某邸囑致意，置不答。恆榮嘗謂：『作事須有肩任，然不可鹵莽從事；去其燥心，持以毅力，乃克有濟。』又曰：『無欲則剛。』其嚴正之氣，無愧所言，惜未獲大施也。己酉，以病乞歸，僑居泰州。值世變，益杜門，罕通人事。甲寅冬卒，年六十七。

* * * * *

自道涵公至立亭公昭基，歷世二十二。生當清嘉慶二十年，誥封奉直大夫。家世經商，淡于仕進。遭洪楊之亂，家遂中落。立亭公隻身逃難，亂平，營錢業於江都，以微資致鉅產。蓋由於覈算精密，任事勤慎，尤能周知商情，故操奇計贏，款不虛糜。雖三經火劫，卒三復其產。又知人善任，教導後進，必誠必懇。吾鎮人至今多占全國金融界重要位置者，蓋有由矣。晚好施與，尤重文士，優禮資助，不遺餘力。既飽更世故，知商戰之危

危於兵事，卽生前收其肆，遺囑後嗣毋再營錢業，營必覆產。優遊十年而歿，年六十有九。子三人。長恆燿，邑增生，早世。次恆忠，太學生，光祿寺署正。不遵遺命，竟以營錢業虧欠，資產蕩然，鬱鬱而終。皆無嗣。

* * * * *

恆棟字樹屏，一字芟村，立亭公第三子也。幼而穎悟，六歲能詩。立亭公嘗指以謂人曰：『吾夫婦晚年力行善事而得此兒，昌吾後者必幼子也。』既早失怙恃，困苦力學，尤精算術，未有師承。每作一題思一理，沈潛玩索，反覆推究，必待澈悟而後已。因研究中國九數通考、九章算法，而通西法筆算數學；因研究中國勾股六術勾股學，而通西法幾何；因研究中國天元術，而通西法代數；因研究中國平三角、弧三角法，而通西法八線曲線。舉凡中國算書，莫不備購。爲閱日本算書，而學日文；爲閱西洋算書，而習英文。嘗發明「素數」，傳播東瀛，學者爭推重焉。早入泮水，屢困場屋。值庚子拳匪之

亂，乃投筆入戎幕，從五省援軍提督程文炳，歷皖豫秦晉，抵潼關。遇西太后光緒帝車駕，以附生陞見，得旨予五品頂戴。非所志也。南旋，至金陵，以所學課士，歷任高中小學算學教席，所造多英才。入民國，爲新聞記者，熟於世勢，詳於掌故，深觀默識，見事幾先，善政則經鼓吹而進行，秕政則經指謫而取消，社會受益于無形。緣此觸忌當道，都督馮國璋欲拘之，賴巡按使韓公國鈞解免。直言如故。綜其生平，敬事而信。雖處危城，日紀戰事，持論無偏無黨，故無干犯之者。行己介然，淡泊自甘，時論高之。年逾五十，知天下事終不堪言，持論益平。燕居之暇，頗以養花課孫自娛。有子曰懋祺，隨侍在側，日親庭訓。

懋祺生於江都。父既從軍秦晉，乃依母尤宜人居寶應。四歲從母識字。六歲就塾。七歲入小學。旋徙金陵。從父習東文算術。又延師館於家，讀四書五經。十四入中學，性

耽文史，而於其他科學少措意焉。居嘗慕曾文正之爲人，喜效其文，復究心相人術。年十六，母彌留，肅容危坐，誠以毋傲毋惰。既遵母訓，力自謙謹。隨父肄業上海省立商業學校。嘗侍遊蘇杭，澄揚所至，攬其形勝。再客金陵。年二十，婚於葉。念人之生，莫不有所成。習一技，嫻一藝，皆成也。特一技一藝之成，僅足爲一身一家之溫飽計，雖成而非偉也。古稱立德立言立功爲三不朽，有一於此，庶幾成之偉者矣。遂改名偉成，以自勉焉。年二十二，生子翀，方肄業滬之大同大學。值新潮湧進，頗拂舊貫。乃輟學家居，閉戶自精。博觀諸子，深究羣經，縱覽史籍，兼涉佛典。偶閱金剛經，恍若有悟，參稽衆說，爲之標點註釋以行世。既一意篤古，頗以「學絕道喪」爲憂，慨然有述作之志。初作「諸子研究」，輒喜憑藉新知，商量舊學。時梁任公先生啓超講學金陵，南北學子，從風者衆。值休寧戴震二百年生日紀念，乃作東原學說述要一文以應其徵。梁先生復以「刻苦深入乾嘉諸師之學」相勗。繼作尙書去僞，爲「羣經研究之一」，更於清儒之學

用力加勤。本省教育先進黃任之炎培，蔣竹莊維喬，爲序而傳之。盧紹劉文殿虎再任安徽教育廳長，寓書曰：『提倡樸學，皖爲最要。』囑作安徽樸學大師列傳，分期刊載於安徽教育月誌，與政令同布，俾學子觀感。因念清儒治學之法，饒有科學精神；而淳樸之風，尤足爲後人矜式；益廣其範圍，輯成清代樸學大師列傳一書。熊秉三總揆希齡，范靜生總長源廉，方以改進教育倡於時，見而好之，爲加品題。復就章太炎先生炳麟，商訂體例，斟酌去取；是書之系統淵源，乃益秩然就理。張仲仁宗伯一鑿，燕居吳門，以暇爲脔正文字。書成時年蓋二十有六矣。際中樞代嬗，舉國騷然，韓止石省長國鈞，執政鄉邦，從容坐鎮，猶以撫綏餘暇，宏獎斯文。固因數十年來，茲道衰息，將振而起之，姑以此書爲嚆矢也。遂於甲子之冬付梓。全書起順康，迄光宣，凡歷三百年，分吳皖常湘浙粵數派，區經史小學地理金石校勘目錄諸子治事厯算博物各家，前列先導大師，後殿提倡顯達，都凡三百七十餘人。贊曰：

明社既屋，志士奮起，匡復弗遂，事讎爲恥，退隱於學，鞭辟近裏，遺風所被，開我儒史述清代樸學先導大師列傳第一。

博野設教，頗夷講讀，身體力行，六藝是服，待衆不廣，其道日倍，後惟綿莊，無忝私淑，述北派經學家列傳第二。

觥觥元和，世濟其美，好博尊古，兩京壁壘，篤守家法，罔或越軌，清學全盛，此其嚆矢，述吳派經學家列傳第三。

惠派之先，臧沈著聞，誰歟嫡傳，仲林叔澐，嘉定常揚，并多軼羣，旁涉子史，流衍緒分，述吳派經學家列傳第四。

皖土淳質，夙振儒風，江戴授受，東原尤隆，綜覈形名，裁斷執中，研究方式，昭若發蒙，述皖派經學大師列傳第五。

戴君而後，學人知要，正統獨尊，轉相號召，北逮齊魯，南逾嶺嶠，事實求是，歷

久彌耀述皖派經學家列傳第六。

今文提倡，肇自陽湖莊氏濟美，實開其涂，施及劉宋，家法同符；他有作者，爰以類區；述常州派今文經學家列傳第七。

南風不競，敦藝未遑；卓哉壬老，崛起三湘；出入今古，語簡誼長；文采斐然，恣肆汪洋；述湖南派古今文兼采經學家列傳第八。

非漢不習，近於墨守；參之宋儒，體用兼有；蘭甫廣南，薇香浙右；桐城空疎，曠乎其後；述浙粵派漢宋兼採經學家列傳第九。

讀書始基，音聲訓故；亭林倡之，戴段景附；卓哉高郵，心力貫注；俾我後人，永服無斃；述小學大師列傳第十。

或治說文，若釋蒼雅；古韻分合，六書通假；思極要眇，鏗而弗舍；晉三藁友，此中健者；述小學家列傳第十一。

上溯往昔，千載而遙；簡策難稽，羣言遂囂；析疑辨僞，識解殊超；當今俗士，聞之舌橋；述南北懷疑派兩大家列傳第十二。

海曲一隅，蓋存史官；白衣入局，守缺抱殘；宛斯復初，并稱二難；實齋嗣興，名言弗刊；述史學大師列傳第十三。

搜逸南疆，徵文數典；吳潘櫻禍，私史遂鮮；後有作者，無敢越俎；整理故書，聊用自顯；述作史學家列傳第十四。

考據歷程，由甲逮乙；刪訂舊作，條理加密；更肆旁搜，彌補闕佚；勿訾破碎，精博罕匹；述攷史學家列傳第十五。

方輿之學，清初斯盛；周覽形勢，畢陳利病；山脉川流，委窮源竟；二顧闡胡，交相輝映；述地理學大師列傳第十六。

次風諸公，水地素優；星伯願船，乃詳邊陲；鄰蘇老人，沿革是求；正班注鄴，紹

述前修：述地理學家列傳第十七。

碑版勛史，彝器證經；歐趙以次，藍轉媿青；東方考古，尤稱典型；豈曰鑒賞，匪足重輕；述金石學家列傳第十八。

向歆七略，淵源具備；近儒校書，差得其意；廣購善本，著錄從類；丹黃數過，用力尤摯；述校勘目錄學家列傳第十九。

王道既衰，百家斯尚；遺辭佶屈，說理滉漾；墨辯舛脫，尤苦塵障；抉剔爬梳，盡歸達暢；述諸子學家列傳第二十。

若遜諸野，明夷待訪；或圖恢復，兵略弘獎；訖清既衰，中原板蕩；處士抗議，獨昭弗爽；述治事學家列傳第二十一。

周官九數，保章所職；藝事日疎，西法爰偪；松陵宣城，披荆斬棘；從者披靡，終造峯極；述厯算學大師列傳第二十二。

算經校刊，古法是敦，旁參譯籍，窮流溯源，綿歷九朝，著述實繁，若汀壬叔，尤推顯門，述厯算學家列傳第二十三。

通儒所恥，一物莫知，仲尼多識，在無常師，偉矣二齋，遍訪周諮，勒成弘編，獨出冠時，述博物學家列傳第二十四。

學術隆替，繫於大老，交遍海內，投紵贈縞，宏文獎誘，奧義研討，迺使寒峻，悉獲深造，述提倡樸學諸顯達列傳第二十五。

支氏著姓，譜乘所錄，代有聞人，數難更僕，閱予小子，樸學自勛，傳此先哲，冀步芳躅，述敘傳終。

中華民國十四年十月初版
中華民國十七年三月再版

清大 代師 樸列 學傳

版

有 所



權

本書

精製一巨冊定價三元四角
平裝兩厚冊定價二元八角

——外埠寄費加一——

著 者 支 偉 成

發 行 者 趙 南 公

印 刷 者 泰 東 圖 書 局

上海四馬路一二四——五號

總發行所 上海泰東圖書局

分局 南京 花牌樓
長沙 南陽街

代售處 各省各大書局



無譜之曲

蔣山青著

這是作者第二期詩歌選集，多半未曾發表過。有的是悽情的歌唱，使你讀後不由地緊蹙眉頭，激發着酸楚的同情；有的是歡情的吟咏，使你可以窺探那熱烈的情懷，充滿着青春的意趣；有的是敘事詩，壯偉或嫵婉，也能使你長留着清新的印象。印刷裝訂，極爲精緻，全書一冊，定價三角五分。

上海泰東圖書局發行



楊幼炯先生著

社會學述要

本書採取近代社會學各種最新進最精確之理論，將社會學之內容及其研究之目的和方法與他社會科學之關係詳細述明，頗足與讀者一明瞭之觀念，殊適用於高級中學及大學預科之課本，如蒙學校大批購置無任歡迎。全書一冊，定價五角。

上海泰東圖書局發行



最新
出版
少年維特之煩惱劇本

全書一冊 定價六角

少年維特之煩惱爲文豪歌德之傑作。現由曹雪松先生編爲劇本，可供之於舞台，將其真髓活脫脫的呈現於我們的眼前，凡讀過少年維特之煩惱的不可不讀，凡愛好文藝劇本的更不可不讀。并由豐子愷先生作畫，趙景深先生作序，印刷精緻乃其餘事。

上海泰東圖書局發行

上海图书馆藏书



A541 212 0014 9244B

